

Aposol Nup Meme

Aposol yeñön Uña Töröñangö

ösumnöñ nup meget.

Jim-asa-asari

Dokta Luknöñ buk qetñi “Kraistkö Ölöwak Buña” ohoba kösohotñi toroqeba buk qetñi “Aposol nup meme” ohoyök. Jisösnöñ gwarekurupñi mutukñi kusum enñii Uña Töröñan sölölohöm enñiiga Kraistkö keu buzupñi jim sehigeri, Luknöñ miañgö kösohotñi aukñe almamgöra möta kewö (1.8) ohoyök, ‘Yeñön mi Jerusalem sitinöñ könahiba Judia prowins dop köla Samaria prowinsnöñ anda toroqeba gölme görañe eu emu likeplikep angetka dop köl teköba anök.’ Mutuk Juda könagesö uruñe nup megetka uruñini melenña guligetka Kraistkö qeburuñ könahiba yöhöba sehiba anda anda kantriñi kantriñi dop köliga urumelenñ könagesö yeñgö bohonñini ahök. Kösohotñi oyonñei, Luknöñ yeñgö uruñini böñjön almamgö kapan köla keu kötni yahöt kewö ohom asariyök,

1) ‘Kraistkö alaurupñan Rom mindimindiri gawman mi tuarenjon qahö ak enñiba malje. Yeñön mi memba et almeğöra tuaköpek qahö akze. Tosatñan mewö mötpeak, mi böññi öne wahötpapuk.’

2) ‘Juda yeñön jike nup meget korembenji aiga ölni asuhumapköra mamböta malgeri, Jisösnöñ mönö ölni mi memba kaba enñiyök.’ Keu kötni mi.

Jisösgö Buña keuñi kuñguba jim sehiba zioz könahiba mem köhöigetka toroqeba aniga

urumelen yengö kambuñinan qariyök. Mianğö dop “Aposol nup meme,” kösohot mi juliga keu bahöñi bohonñi karöbut kewö akze: 1) Jisösnöñ Suep mire öngöiga gwarek yeñön Jerusalem malgetka Kraistkö Buña keuñan könahiba qeburun yöhöyök. 2) Yöhöba qariba Palestain gölmegö prowins tosatñe anök. 3) Kunbuk qariba kantrinji kantrinji Sutñire Köwet liliköba tat anjei, mi dop köla teteköñe siti bohonñi Rom anök.

“Aposol nup meme” mianğö keu bohonñi mi Uña Töröñangö könañi aka nup memenji. Aposol aka mötnarip ambazip yeñön yambu dölökñangö (Pentekost) nalöñe Jerusalem köulukögetka Uña Töröñan ösumñambuk uruñine geyök. Uruñine geba sölölohöba mem köhöim enğiiga denđa kantri liliköba nup megetka öñji könañi könañi asuhuyök. Zioz ambazip aka yengö jitmeme yeñön Kraistkö Buña keu mi könakönahine denöwö jiba malgeri, Luknöñ mianğö keuñi ohoiga mi ölop buk kianğoreñ oyoñda mötpin. Ambazip uruñini melenđa mindiriba nañgöm anğuba malgeri, yeñön Buña keugö kukösumñi möt kutugetka miri dop aukñe asuhuyök. Denöwö asuhuyöhi, Luknöñ mianğö kösohotñi ohoba Uña Töröñangö kukösumñi kondel neñgiza.

Buk kianğö bahöñi bohonñi 4 mi kewö:

1. Buña keu nañgöba jibingöra jöjöröget 1.1-26
 - a) Jisösnöñ jimkutukutu ala Uña enğimamğö jiyök 1.1-14
 - b) Judas Iskariotkö salupñe Matias meköget 1.15-26
2. Jerusalem sitinöñ Buña keu nañgöba jiget 2.1-8.3

3. Judia aka Samaria Buŋa keu nanğöba jiget 8.4-12.25
4. Polnön misin nup memba malök 13.1-28.31
 - a) Misin nup liliköba megetka 1 ahök 13.1-14.28
 - b) Jerusalem totoko ala keu jöhöget 15.1-35
 - c) Misin nup liliköba megetka 2 ahök 15.36-18.22
 - d) Misin nup liliköba megetka 3 ahök 18.23-21.16
 - e) Pol Jerusalem, Sisaria aka Rom kösö mire tarök 21.17-28.31

Jisösnön zioz könahiyök.

¹ *O Tiofilus!

Luk nönön kösohotni mutukŋi ohoyali, miangören Jisösnön nup könahiba memba liliköba ambazip kusum engiba malöhi, miangö kösohotŋi pakpak arengöba albi eknön.

² Jisösnön nup memba melaimelai azi aposolurupŋi möwölöhöba kusum engiba mala Uŋa Töröŋgö ösum qakŋe nup memegöra jim kutum engiyök. Mi engiiga Anutunön waŋgiri Suepnön öngöyök. Nönön kösohotni ohoyali, mi miangören ohom teköyal. Merak miangörenök kösohot mi toroqeba ohomam.

³ Jisösnön sihimbölö möta kömumba kömupnöhök wahöta wehön 40 gölmenön toroqeba malök. Nalö miangö uruŋe aposolurupŋi sömaŋi gwötpuk asuhum engiba Anutu bemtohoŋgö könäŋi toroqeba jim asarim engiba malök. Mewö mala aiwesök tandök könäŋi könäŋi memba kondel

* **1:1:** Luk 1.1-4

enɣiyök. Yeñön mi eka Jisösnöñ guliba maljawi, mi ölop möt yaköget. Aiwesök ekeri, yeñön mi nañgöba jiba dangunu ewö kinje aka kunñan mi qeapkömamgö osima.

⁴*Nalö kunöñ yembuk mohotje mala kewö jim kutum enɣiba jiyök, “Inini Jerusalem siti ki mönö zilañ kude mosötme. Iwinan ‘Kalem uruñine al enɣimam,’ jiba keuñi jöhöi jibi mötkeri, mi mönö öljambuk akña aiga enön mönö miangöra mamböta malme.

⁵*Mutuk Jonöñ ambazip o töhöñöñ melun mem enɣiba malökmö, Anutunöñ nalö kude köriiga Uña Töröñi uruñine ala mianön melun mem enɣima.” Mewö.

Jisösnöñ Suep mire öñgöyök.

⁶Aposol yeñön nalö kunöñ tokogetka Jisösnöñ sutñine asuhuiga kewö qesim wañgiget, “Kembu, göñön mönö nalö kewöñe me wani nalönöñ Israel kantrigö tohoñi mi kunbuk kuñguba mem köhöiman?”

⁷Qesim wañgigetka kewö jii mötket, “Iwinöñ nanñi kukösum qakñe yambu gwani aka aua nalö areñgöba ali ahözawi, mi mönö enön mötmeañgö dop qahö.

⁸*Mi qahöpmö, Uña Töröñan eta uruñine gemawañön mönö kukösum enɣiiga letota nöñgö könani nañgöba jiba malme. Mi Jerusalem sitinöñ könahiba Judia prowins dop köla Samaria prowinsnöñ anda liliköba toroqeba gölme gorañe eu emu likeplikep angetka dop köl teköba anma.”

* **1:4:** Luk 24.49 * **1:5:** Mat 3.11; Mak 1.8; Luk 3.16; Jon 1.33

* **1:8:** Mat 28.19; Mak 16.15; Luk 24.47-48

9 *Jisösnöj keu mi jim teköiga Anutunöj jeñini qakne wangita wahöriga kousunöj eta esuhuiga euyangörenj öngöiga ekingö uget öngöba atatop (ji-ataton) köliga jaruba kinget.

10 Mewö öngöiga suepnöj eu ehiba kingetka miangörenjök azi yahöt malukuñiri tuat lalamñi yetkön kösutñine asuhuba kinohot.

11 Kinda kewö jiyohot, “Galili azi injini mönö denöwögöra suepnöj eu ubayök kinje? Anutunöj Jisös ki engö sutñineyök wangita Suep mire eu öngöi ekzei, yañön mönö tandök mewöñanök kunbuk lilingöba etma.” Mewö.

Judas Iskariotkö salupñe Matias meget.

12 Mewö jiyohotka aposol yeñön Jerusalem siti kösutñe kundunji qetñi Oil ip kundunji miangörenjök lilingöba eta 1 kilomitagö dop kaba sitinöj kañgotket*.

13 *Jerusalem kañgota miri urunji kun qakne tat malgeri, miangörenj anda öngöget. Öngögeri, yeñgö qetñini kewö: Pitö, Jon, Jeims aka Andru; Filip, Tomas, Bartolomyu aka Matyu; Jeims Al-fiusgö nahönñi, Saimon Zelot politik azia aka Judas Jeimsgö nahönñi†.

14 Azi pakpak mienjön urumohot aka ambi yembuk kapañ köla köuluköba malget. Yeñgö sutñine Jisös munurupñi aka namñi Maria yeñön mewöyök malget.

* **1:9:** Mak 16.19; Luk 24.50-51 * **1:12:** Juda yeñön 1100 mita mi Sabat kendonöj qahö ongita anjema. Miangöra Köna keu qahö ongita kaget. * **1:13:** Mat 10.2-4; Mak 3.16-19; Luk 6.14-16 † **1:13:** Zelot pati yeñön nanñini kinkin mbingöra Rom mindimindiri gawmanbuk tuaköpek aka urukönöp aka malget.

15 Köuluköba mala wehön kunöŋ mötnarip ambazip jaŋgöŋini 120 miangö dop tokogetka Pitönöŋ sutŋine wahöta keu kewö jiyök,

16 “Azi alaurupni! Jisös memba jöhögeri, Judasnöŋ yeŋgöra köna kondelök. Uŋa Töröŋan Judasgö keu mi mutuhök kiŋ Deiwidkö uruŋe sanep ali numbu jitŋan jiiga Sumbara buk (Buŋa Liŋet buk Sam) miangöreŋ ohoget ahözawi, mianön mönö öŋambuk ahuyök.

17 Jisösnöŋ Judas möwölöhöi nanine kambunöŋ kun mali nupŋi memapkö kuŋgui melaimelai azi bohonŋi aposol ahök.

18 *“Judasnöŋ ahakmeme bölöŋi aiga söŋgöröŋi waŋgiget memba mianön gölme köröŋi kun bohonŋi meyök. Mi memba miangöreŋ imbi auba nöropŋan melenŋa gölmenöŋ kuŋguiga gölömŋi juliga irip kömoŋgokŋi datŋi munŋi mi körek usuba erök.

19 Mewö ahiga Jerusalem ambazip pakpak miangö buzupŋi möt teköba gölme miangö qetŋi nanŋine keunöŋ Akeldama qetket. Mi nanine keunöŋ Sep Gölme köröŋi.”

20 *Pitönöŋ toroqeba kewö jiyök, “Sumbara (Sam) buk miangöreŋ keu kun kewö ohoget ahöza, ‘Miriŋi mönö baloŋi gwamön kinma. Mi kunŋan toŋi qahö aka maliga miriyök kinma,’ aka keu kun kewö ahöza, ‘Kunöŋ ölop yaŋgö salupŋe galöm nup memba kinma.’

21-22 *“Mewögöra aka nini azi kun möwölöhöba kuŋguinga nembuk jitŋe meme aka dangunu ewö

* **1:18:** Mat 27.3-8 * **1:20:** Sum 69.25; 109.8 * **1:21-22:** Mat 3.16; Mak 1.9; 16.19; Luk 3.21; 24.51

kinda Jisösnöŋ kömupnöhök wahöröhi, miangö Buŋaŋi naŋgöba jiba mali dop kölma. Jonöŋ Jisös o melun mem waŋgiiga Kembunöŋ nalö miangöreŋök qeŋjarökŋöŋ anda nupŋi könahiba memba neŋgö gölmenöŋ liliköba anda kaba mali Anutunöŋ sutnineyök waŋgita öŋgöyök. Azi nalö pakpak miangöreŋ kambunine mohotŋe mala korini, mönö yeŋgöreŋök kun möwölöhöinga dop kölma.”

²³ Pitönöŋ mewö jiiga azigö jaruba azi yahöt qetŋiri qetket. Kun qetŋi Josef, qetŋi alaŋi Barsabas aka qetŋi kun Jastus. Azi kungö qetŋi Matias.

²⁴ Qetŋiri qeta kewö köuluköba jiget, “O Kambu, gi ambazip urunini körek pakpak möt kutuzan. Miangöra gi azi kietköreŋök niŋia möwölöhözani, mi mönö kondel neŋgiman.

²⁵ Judasnöŋ goŋgiba geŋmoŋ aka eta aposol nup mosöta bölöŋamŋaŋgö dop ayuhuba geyöhi, yaŋgö salupŋe azi kunöŋ mönö aposol aka kinda melaimelai azigö nup memba malma.”

²⁶ Mewö jiba yetkö kiawen (kas, lot) algetka Matias asuhuyök. Asuhuiga aposol 11 yeŋgö sutŋine dum kun waŋgigetka kambuŋine toro-qeyök. Mewö.

2

Uŋa Töröŋan eta gwarek uruŋine geyök.

¹ *Jisösnöŋ kömuyöhi, nalö miangöreŋök sonda 7 teköiga wehön 50* miangöreŋ yambu jeŋi qeŋe

* **2:1:** Lew 23.15-21; Dut 16.9-11

* **2:1:** 50 mi Grik keunöŋ Pentekost.

nalöŋi kam kuŋguiga urumelen ambazip pakpak yeŋön tokoba kendon tatket.

² Tatketka mianğoreŋöhök Suepnöhök yuai kun biliksik eri kouruk ketanji asuhui mötket. Dimbomnöŋ köhöikŋanök qemakzawi, mönö mianğö tandök ewö asuhaba eta miri tatkeri, mi körek kokolak qeyök.

³ Miri kokolak qeba yuai mianğön denğenda sehiba könöp bölam tandök ewö nöropŋini qakŋe öŋgöi eket.

⁴ Mewö asuhuiga Uŋa Töröŋan körek yeŋgö uruŋini kokolak qeiga gölme tosatŋe keu ahözawi, mi könahiba jiget. Uŋa Töröŋan sölölohöba keu sanep alöhanğö dop aukŋe jiget.

⁵ Juda ambazip tosatŋan Anutu göda qeba kantri könaŋi könaŋi suep bapŋe tat anjei, mianğoreŋ denğanda mala Jerusalem lilingöba kageri, tosatŋi mewöŋi mewöyök sitinöŋ malget.

⁶ Mewö mala kouruk ketanji mi möta ambazip kambu gwötpukŋan kaŋgota tokoget. Tokoba kingetka mötnarip ambazipnöŋ keu murutŋi murutŋi jigeri, mi pakpak möta nanŋak nanŋak möt asariba mianğöra aurumpurik aka köŋkuŋ aket.

⁷ Köŋkuŋ aka welipköba jiget, “Mötket! Azi ki keuŋi keuŋi jizei, yeŋön mönö körek Galili ambaziwa akze me?”

⁸ Nini kantri murutŋi murutŋi mianğoreŋ ahaba kota malinga yeŋön mönö denöwö aka malqarip kantrininağö dop keunini nanŋik nanŋik jigetka mötzin?

⁹ Nini Partia ambazip, Midia ambazip aka Elam ambazip ki kinjin. Nini tosatŋan Mesopotemia

malin. Tosatņan Judia malje aka tosatņan Kapa-dosia gölmenöņ malget. Ambazip tosatņan Pontusgöra, tosatņan Eisia prowinsgöra akzin aka yeņön nanini keunine keu jigetka mötzin.

¹⁰ “Tosatņan Frigia gölme mosöta ki kaba malje. Tosatņan Pamfilia taon mosötket. Tosatņan Ijipt kantrinöņ malget. Tosatņan Sairini gölme likepņe Libia kantrinöņ malget. Tosatņi nini Rom sitiyök kusukņanök ki kaba maljin.

¹¹ Nini tosatņan Juda ambazip ahuba maljin aka tosatņan kantri tosatņe ahuba könangep Juda ambazip ahin. Mewö kinjin aka yeņön keu jigetka nini keunini mohot mohot mi ölop möt kutuzin. Neņgöreņök tosatņan gölme jölannji qetņi Krit mosöta köwet kutuba kaget. Tosatņan Arebia keu jize. Nini mewöņan maljinmö, yeņön söņgaiba Anutunöņ aņgöletot öņgöņgöņi ahöhi, mienģö könaji mi nanine keunöņ nanņik nanņik jigetka mötzin.”

¹² Mewö jiba körek yeņön auruba lalalulu sik-sauk aka nanņini kewö jim qesim aņguget, “Kiaņgö könaji mönö denöwö?” Mewö qesim aņguba keu jaruba tönpin kinget.

¹³ Tönpin kingetmö, tosatņan mepaqepaik aka kewö jiget, “Yeņön wain o nahömņambuk gwötpuk nempa enjololoņ akze.” Mewö.

Pitönöņ Uņa Töröņaņgö könaji jim asariyök.

¹⁴ Mewö jigetka Pitönöņ aposol 11 yembuk mohotņe wahöta kinda köhöikņanök qeta ambazip kambu yeņgöra kewö jii mötket, “Alaurup, Juda ambazip aka ambazip körek Jerusalem maljei, nöņön yuai asuhuzawaņgö könaji jibi kezap ala mi mötket.

15 Inini tosatnan nenğora kewö jize, ‘Yenön o köhöikni negetka uruñinan enjololon akza.’ Mewö mötmörizemö, nenön mewö qahö akzin. Ki söñangö 9 kilokni akza. Söñan mi o nene nalöya qahö.

16 Qahöpmö, kezapqetok azi Joelnöñ Buña keu kewö jiyöhi, mianñon mönö ölnambuk akza,

17 *‘Anutunöñ jiza: Kembugö kaka nalöñan törimawi, nöñon nalö miangöreñ Uñani Töröñi mokobiga ambazip körek yenğö qakñine öngöma. Öngöba sölölohöba kutum enğuasöriğa kewö asuhuma:

Enğö nahönböraturupñinan kezapqetok keunji keunji jimakñe.

Enğö gwabö seramurupñinan jeñini melenñi imutñi imutñi ehakñe.

Enğö ambazip namñi yenön gaunñi gaunñi ekñe.

18 Uñani Töröñi mokomami, mi azi aka ambi weleni qeba malmei, yenğö qakñine mewöyök öngöiğa kezapqetok keu jimakñe.

19 Nöñon anğöletot suepnöñ albıga uget eu öngöiğa ekñe aka gölmenöñ aiwesök mi kewö ekñe:

Yuai sepnambuk, könöp öngöngöñi aka köwak köndumñambuk mi asuhume.

20 Wehön jeñan pandaman meıga köiñnöñ pisihıba sep ewö akña.

Mewö asuhıga miangö andöñe Kembugöreñ nalö ketanñan kam kuñguma.

Wehön mi aködamun aka qetbuñanambuk.

* 2:17: Joel 2.28-32

21 Denike yengöreŋök kunŋan kun Kembugö qetŋi qeta köulukömawi, yaŋön mönö amöt qem waŋgiiga letotma.’ Joelnöŋ mewö ohoi ahöza.

22 “O Israel ambazip, iŋini mönö kezap ala keu ki mötket: Anutunöŋ Jisösgö malmal nalöŋe sölölohöm waŋgii mali aŋgöletot, aiwesök aka aiaka ösum-mumuŋambuk mi eŋgö sutŋine gölmenöŋ aukŋe asuhuget. Iŋini mi ölöp mötze. Anutunöŋ yuai mi asuhum waŋgiba mewö mianöŋ Nazaret azi miangö könaŋi naŋgöba jiba kondel eŋgiba malök.

23 **“Anutunöŋ mönöwök Jisösgö keuŋi qeljiŋe jöhöba möt kutuba kewö jiyöha ahöza, ‘Amötqeŋe Toŋan mönö pinjit azi yengö böröŋine etma.’*

Keu miangö dop Anutunöŋ Jisös qahö aŋgön köli eŋgö böröŋine erök. Mewö eriga iŋini kömumapkö qetketka kian kantri gawman yəŋön Mosesgöreŋ Köna keu qahö möta töndup jim kutugetka böröŋinan Jisös memba maripomnöŋ qeget kömuyök. Kömuyökmö, sepŋan mönö eŋgö qakŋine öŋgöyöha ahöza.

24 **Jisösnöŋ kömuyökmö, kömupkö kösö gwaröŋe eri kömup Toŋan i jöhöba nalö köröpŋi galöm köl waŋgimamgö osiyök. Mi Anutugöreŋ qahö dop kölök. Miangöra yaŋön i mem guliba kömupkö sihimbölöŋeyök meköiga wahörök.*

25 **Kiŋ Deiwidnöŋ Jisösgöra kewö jiyök ahöza, ‘Nöŋön garaŋguruŋ aka talbilenbuköra Kembunöŋ böröni öŋe malja.*

* **2:23:** Mat 27.35; Mak 15.24; Luk 23.33; Jon 19.18

* **2:24:** Mat 28.5-6; Mak 16.6; Luk 24.5

* **2:25:** Sum 16.8-11

Yañön nalö dop qöhöröñne kini imut ewönöñ eka maljal.

²⁶⁻²⁷ Mewö mala kömumam-mö, kömupkö uñem mire gebiga andö qahö nuñguman.

Göñön nangi wölböt azi sarakñi tök-kutukutuñi ni mönö meköm niñginöñga kömupkö lömnöñ ahöba qahö gisahömam.

Miangöra urunan sösöñgai aiga numbu nesilamnan renduñ liñet köla maljal.

Silenan mewöyök guliba wahötmawanğöra al mamböta jörömqöröm aka luhut memba ahöma.

²⁸ Göñön malmal köhöikñanğö könañi kondel niñginöñga möt kutumam.

Nöñön göhö jemesoholge pöndañ malbiga göñön uruni sösöñgainöñ kokolak qeman.’ Deiwidnöñ Jisöğöra mewö jii ahöza.

²⁹ “O alaurupni! Pitö nöñön bem ambönini kin Deiwidkö könañi mi awösamkakak qakñe aukñe kewö jim asarimam: Deiwidnöñ kömuiga löm kölgetka qaksiriñan merak sutnine ki ahöza.

³⁰ *Deiwidnöñ kezapqetok azia aka malöhañön kewö mörök: Anutunöñ gwölönarökurupñi yeñgöreñök kun möwölöhöba kuñgui nanñi ewö azi kembugö dum tatatñe tatma. Anutunöñ keu mi jöhöba jöjöpañ keunöñ jim köhöiba malök.

³¹ Kunñan tatmawi, mi qeljiñe eka mörök. Amötqege Toñi Kraist yañön kömupnöhök wahötmawi, Deiwidnöñ mi möta kewö jiyök, ‘Kraistnöñ mala kömumapmö, kömupkö uñem mire geiga Anutunöñ i andö kude qei ahöma.

* **2:30:** Sum 132.11; 2 Sml 7.12-13

Yanğö silenji mi kude mosöri qamötñan kömupkö lömnöñ qahö gisahöma.’

³² Anutunöñ Jisös mem gullii wahöriğa mewö mi-añön keu mi ölnambuk ahök. Nini körek mi je kötninan eka nañğöba jiba dangunu ewö kinjin.

³³ Jisösnöñ wahöta mala Anutunöñ wañgiri öñğöba böröñi ölnje tatza. Mianğöreñ tata Iwinöñ Uña Töröñi melaimapkö jim jöhöyöhi, yañön (promis) mi möta i mokoï eriga ölnji merak ki asuhui eka mötze.

³⁴ *Deiwidnöñ Suepnöñ kude öñğöyök. Yañön nanñak keu kewö jii ahöza, ‘Anutunöñ Suep miri uruñe nani Kembunañğöra kewö jim kutui mörök:

Göñön mönö kaba böröni ölnje asakmararañ kianğöreñ eta tata malman.

³⁵ Mewö tata malnöñga nöñön nalö sutñe kianğöreñ tuarenjoñjurupki tim tötala luhut al enğimam.

Luhut al enğibiga yeñön tala geba sihimbölö möta sahöta köna döp ewö akñe.

Mewö aketka göñön ölop wahöta yeñgö qakñine tiba söñgaiba malman.’

³⁶ “O Israel ambazip, inini Jisös maripomnöñ qegetka kömuyökmö, Anutunöñ Jisös mi kuñguiga Kembu aka Amötqeçe Tonji Kraist ak neñgiba malja. Israel kambu pakpak inini mönö mianğö könañi möt yaköme.”

³⁷ Pitönöñ mewö jiiga ambazip kambunöñ möta uruñini qesiñni Pitö aka aposol tosatñi yeñğöra kewö jiget, “Azi alaurup, nini mönö dendenöwö ahin dop kölma?”

* 2:34: Sum 110.1

38 Jigetka Pitönöŋ kewö jii mötket, “Inini mönö uruŋini melenget. Mohot mohot uruŋini melengeraŋgö dop neŋön mönö Jisös Kraistkö qetŋe o mem melun mem enŋibin. Mi enŋiinga Anutunöŋ siŋgisöndokŋini saŋgoŋda mosöta Uŋa Töröŋ kalemŋi mi buŋa qem enŋima.

39 Anutunöŋ Uŋa mi enŋimamgö jim jöhöyöhi, keu mi mönö nanŋini aka enŋö gwölönarökurupŋini enŋöra aka jiyök. Enŋöra aka tosatŋi köröwen mal angetka Anutu Kembuninan enŋoholmawi, yaŋön jöhöjöhö keu (promis) mi mönö körek enŋöra aka mewöyök jiba jöhöi ahöza.”

40 Pitönöŋ mewö jiba toroqeba qambaŋ keu tosatŋi gwötpuk mianŋön uruŋini kuŋguba kewö jiyök, “Ambazip misimkaulup ki gölmenöŋ maljei, Anutunöŋ mi amöt qem enŋiiga letotmegö mötza. Yembuk sihimbölö miwikŋaibepuköra mönö uruŋini melenŋda ambazip goŋgoŋi mi jabö ala enŋömosötme.”

41 Pitönöŋ mewö jiiga ambazip jesöŋgöŋan keuŋi möt anŋön kölgetka o melun mem enŋiget. Mi mem enŋigetka könagesöŋine toroqeketka jaŋgöŋinan wehön mianŋöreŋök 3000 mianŋö dop qariyök. Mewö.

Mötnariŋ yeŋön uru jöhöm anŋuba malget.

42 Uruŋini melenŋeri, yeŋön urumohok aka urunöŋ jöhöm anŋuba nalö dop anŋeka tokogetka aposol yeŋön Buŋa keu kusum enŋigetka beret mindipköba nemba köuluk nup memba malget. Pöndaŋ malmal mewöŋi malget.

43 Mewö kinda Anutugö qetŋan bölibapuköra jönöm undu-undu aka malget. Mewö malgetka

Anutunöŋ sölölöhöm enŋiiga aposol yeŋön jitŋe memeniŋi aka nup megetka anŋöletot aiwesök murutŋi murutŋi asuhuget.

⁴⁴* Anutu möt narigeri, yeŋön körek malmalŋini mohotŋe mala sukinap (ainemaluku) yuainiŋi pakpak mindiriba mohotŋe memba malget.

⁴⁵ Mewö memba mala gölme sukinap yuainiŋi bohonŋi memegöra algetka söŋgöroröŋi enŋiget kayöhi, mi sutŋine mözöqözöröŋ aka osigeranŋö dop mendenŋ anŋuba malget.

⁴⁶ Mewö mindiriba mala qösösök (qörörök) uru-mohot aka nalö dop jöwöwöl jikenöŋ tokomalget. Beret mi miriŋini dop mindipköba nemalget aka numbu neneniŋi mi geŋmonŋini qahö sö söŋgai qakŋe tata nemalget.

⁴⁷ Aiakanŋini mewö aka Anutu möpöseiba malgetka ambazip pakpak yeŋön i enŋek soriba malget. Enŋek soriba malgetka kambuŋinan qari-iga Kembunöŋ nalö dop ambazip tosatŋi uru meleŋ enŋiiga letota mindimindiri arenŋine toro-qeget. Mewö.

3

Pitönöŋ lokon azi kun mem ölöwahök.

¹ Juda yeŋön mare dop 3 kilok köuluközema. Mare kunöŋ Pitö Jon yetköŋ köuluk nalö miangören jöwöwöl jikenöŋ öŋgöyohot.

² Öŋgöyohotka miangören azi kun nam körö uruŋeyök lokon asuhiba tat malöhi, mi anŋuba kaba jöwöwöl jikegö kiripo nanŋuŋe alget. Alaurupŋan silim dop kaba kululunöŋ anŋuba

* **2:44:** Apo 4.32-35

kiripo nanġu qetġi Nanġu Eksihimġambuk qetkeri, mianġoreġ alget tarök. Tata ambazip jikenöġ öġgögeri, yeġön moneġ kalem waġgimegöra ulet enġiba malök.

³ Mewö algetka tari Pitö Jon yetkön jöwöwöl jikenöġ öġgöbitkö ahotka etkeka i mewöġanök kalemgö ulet etkiyök.

⁴ Ulet etkiiga jemesoholġi uba eka Pitönöġ kewö jii mörök, “Mönö niri netkeknöġ!”

⁵ Mewö jii möta je kusumusulġi qahö etkehiba yuai kun böröġireyök niġgimahotkö mambörök.

⁶ Etkehiga Pitönöġ jiyök, “Nöġgöreġ silwö me goul moneġ qahö ahözapmö, nöġgöreġ yuai kun ahözawi, mi ölop ġihimam: Gi mönö Nazaret azi Jisös, Amötqeġe Tonġi Kraistkö qetġe wahöta an-man!”

⁷ Mewö jiba böröġi öġġe memba kököbihiiga wahörök. Wahöriga könaġi aka gwaköt sihitġi mönö mianġöreġök köhöiget.

⁸ Köhöigetka wahöta luhuba yetpuk jöwöwöl jikenöġ öġgöba mianġöreġ anda kaba sereġsereġ unduba Anutu möpöseiyök.

⁹ Mewö anda kaba Anutu möpöseim waġgiiga ambazip kambu pakpak yeġön mi eket.

¹⁰ Mi eka kewö jiget, “Azi ki kalem waġgimegöra jikegö kiripo Nanġu Eksihimġambukö kösutġe tata uleta malöhi, mönö mia.” Mewö jiba möt waġgiba “Sileġe wani yuaia asuhuzapto?” jiba auruba nemböġini teköi welipköget. Mewö.

Pitönöġ jöwöwöl jikenöġ Buġa keu jii mötket.

¹¹ Welipkögetka ulet azi mianön sundan Pitö Jon yetpuk mohotġe anda kaiga ambazip kambu

körek pakpak yeñon ösumñinan kösutñine kaba jöwöwöl jikegö tohon uruñe öngöba kiñ Solomongö sombem söranñambuknön tokoba kinda ehiget.

12 Mewö ehigetka Pitönön engeka könahiba kewö jii mötket, “O Israel alaurupni, inini mönö wanigöra yuai ki eka auruze? Wanigöra niri uba netkehize? Azi kianñon ölöwaka köna anda kazawi, mi mönö netkö ösumnön me Anutugö Buñane pitirik maljirañgöra aka qahö. Mewö kude mötmörime.

13 *Nanine ambösakonini Abraham, Aisak aka Jeikob yeñgö bem Anutunön mönö Nahönñi Jisös asakmararañ wañgiiga jitñememenji öngöñgöñi ahiga ölni asuhuiga ekze. Inini Jisös mi memba galöm yeñgö börönjine algetka premiö Pailötnön pösatmamgö keuñi jöhöba jiyökmö, eñon Jisös mi yañgö jeñe qañ köla andö qem wañgiget.

14 *“Inini azi diñdiñi aka sarakñi mi andö qem wañgiba azi qeçe azi kun pösatmapkö kapañ köla qeta qesiget.

15 Mewö qeta qesiba mewö mianñon malmalgö Toñan kömumapkö keuñi jigetka kömuyök. Kömuyökmö, Anutunön i mem guliiga kömupnöhök wahörök. Netkön mi jeninan eka nañgöba jiba yañgö dangunu ewö kinjin.

16 Mewö kinda Jisösgö qetñi möt narim wañgiba maljit. Azi ki eka möt wañgizei, mi mönö qet mianñgö ösumñan mem köhöiiga kinja. Jisösnön sölölohöm netkii mötnariñniran asuhui mianñgö qakñe kinda jim kutuziga köna gwakötñan ölöwak teköiga inini körek mi ekze.

* **3:13:** Eks 3.15 * **3:14:** Mat 27.15-23; Mak 15.6-14; Luk 23.13-23; Jon 19.12-15

17 “O alaurupni! Jisös kömumangö kapan kölgeri, enjön mi mönö gukmaulem qakne aket, mi mötzal. Nanjini aka galömurupninan mewöyök yuai ak wangigeri, miangö könanj kude möt kutuba lan aket.

18 Mewö aketmö, miangö likepni Anutunöñ kewö ahök: Anutunöñ keunji mönöwök kezapqetok ambazipurupni pakpak yengö jitjine aliga qeljine kewö jiba ohoget, ‘Anutugö Amötqeqe Tonj Kraistnöñ mönö sihimbölö mötma.’ Miangöra injini mewö aketka Anutugö keu miangön mönö mewö öljambuk ahök.

19 Miangöra mönö uruñini melenja Anutugöreñ lilingöba kagetka singisöndokjini kutuba sanjoñma.

20 “Anutunöñ oyaenjoyaen Tonj akza. Injini öne lan malbepuköra Anutunöñ Jisös qeljine möwölöhöyök. Miangöra injini mönö uruñini melenjetka Amötqeqe Tonj Kraist melaiiga engöreñ kaiga yambuk qekötahögetka malmaljinan guliiga oyaenjoyaen nalöñinan kam kuñguma.

21 Anutunöñ möpñangö möpñe könahiba keunji kezapqetok ambazipurupni tök-kutukutuñi pakpak yengö jitjine aliga qeljine kewö jiba malget, ‘Anutunöñ Amötqeqe Tonj angön köl wangii Suep mire tata mali yuai pakpak kunbuk arengöba kölönjaimawi, mönö nalö miangöreñök melaiiga Suep mosöta etma.’

Jisösnöñ keu miangö dop eta nengöreñ kayök.

22 *Mosesnöñ kewö jii mötket,
‘Kembu Anutunöñ Juda kambu engö sutñineyök kezapqetok azi kun mem guliiga wahöta

* 3:22: Dut 18.15, 18

Moses ni ewö akɲa.

Yaŋön ipɲina kinda engöra keu jimawi, mönö mi pakpak kezap ala möta tem köla malme!

²³*Kunɲan kun kezapqetok azi miangö keuɲi qahö tem kölmawi,

Anutugö könagesö eɲön mönö yaŋgö keuɲi jim teköba ayuhum waɲgime.’

²⁴Kezapqetok ambazip Samuelgöreɲök könahiba kota keu jigeri, mienön mönö körekmakörek mewöyök kezapqetok keu nalö kewöŋe ölnambuk akzawi, mia qeljiɲe jiba malget.

²⁵*Anutunöŋ amböskonurupnini yembuk jöhöjöhö areɲi aka Abrahamgöra kewö jii mörök,

‘Göhö gwölönarökurupki yeɲgöreɲök kunɲan ahuba wahötmawi, Anutu nöɲön mönö yaŋgöra aka gölmegö ambazip kambuɲi kambuɲi pakpak kötuatköm engibi oyaenkoyaen akɲe.’

Anutunöŋ jöhöjöhö keuɲi indeli kezapqetok ambazipnöŋ mi toroqeba jim köhöiba malgeri, mi mönö engöra aka ali ahöza.

²⁶Anutunöŋ Nahönɲi mem gulii wahöri kötuatköm engimapköra melaiiga mutuhök engöreɲ erök. Miangöra mönö döлки uruɲini melenɲa nanɲik nanɲik malmalɲinaɲgö köna bölöɲi andö qeme. Mewö aka oyaenkoyaen akɲe.” Mewö jiyök.

4

Pitö Jon yetköŋ jike kaunsöl kambunöŋ kinohot.

¹ Pitö Jon yetköŋ ambazip kambu yeɲgöra keu mewö jiyohotka jike nup galöm yeɲön, jikegö

* 3:23: Dut 18.19 * 3:25: Jen 22.18

kiripo galöm bohonjan aka Sadyusi (Jike nupkö kapankölköl) yejon wahöta jenire kangetket.

² Gwarekyahötjan ambazip kambu kusum engiba kewö jiyohot, “Jisösnöj kömupnöhök wahörök. Miangö dop kömugeri, yejon mewöjanök guliba wahötme.” Mewö jiyohotka urujini böliiga yetkörej kangetket.

³ Kangeta etkömemba miri sönyauyöhangöra aka kösö mire al etkiba jiget, “Miri gianjiigun keu jakenje al etkibin.”

⁴ Mewö jigetmö, Buja keunjiri mötkeri, yengörenök jesöngöjan urujini melenja Jisös möt nariget. Möt narigeri, yengö jangöjninan qariiga 5000:gö dop aka malget.

⁵ Miri gianjiiga galömkölköl aziurupjini, Juda yengö jitje memeurupjini aka Köna keugö böhi yejon Jerusalem tokoget.

⁶ Tokoba jike nup galöm bohonji qetji Anas yanön sutjine tarök. Mewöyök Kaiafas, Jon, Aleksander aka jike nup galöm bohonjangö saiwaurupji tosatji pakpak mi mohotje tatket.

⁷ Tatketka Pitö Jon etkuangita jenine al etkiget kinohotka kewö qesim etkiget, “Etkön mönö denöwö ahot? Dagö qetji qerohotka ösumji etkualöjni letorök?”

⁸ Qesim etkigetka Uja Töröjan Pitögö uruji kokolak qei kinda kewö jii mötket, “Kantrigö galömkölköl azi aka jitjememeurupjini, mötket!

⁹ Niri lokon azi denöwö alabauk ak wangiziga könanji guliba ölöwahök, merak mewö qesim netkize.

¹⁰ Miangöra miangö likepni mi ölop jibiga injini aka Israel ambazip könagesö pakpak mötme. Enjon

Nazaret azi Jisös, Amötqeqe Tonini maripomnöŋ qegetmö, Anutunöŋ i mem gulii kömupnöhök wahörök. Jisös qetŋaŋgö ösumŋan mönö azi ki möhamgöiga eŋgö jeŋine ölöwaka kinja.

11 *Keu kun kewö,
‘Miri meme azinöŋ köt tandö kun andö qeba mosötketmö,
Anutunöŋ mi aliga ain tandö kömbönaŋi bohonŋi akza.’

Ain tandö bohonŋi mi Jisös.

12 “Jisös mohotnöŋ mönö amöt qem neŋgiza. Qet kun köuluköinga mi osimemö, Jisösgö qetŋan mönö dop kölja. Anutunöŋ qet kun Suepkö bapŋe qahö neŋgiiga ahöza. Qahö! Qet mohot mi qeta letota Suepkö buŋaya akin.”

13 Mewö jim teköiga tandökŋiri eka kewö jiget, “Azi yahöt kietkön mötmöt mire qahö öngöba töndup keu köhöikŋi köhöikŋi jiba awösamkakak kinda suahö ewö akzahot.” Mewö jiba köŋkuŋ aka welipköba könaŋiri möt kutuba jiget, “Alakŋa! Azi yahöt mietkön mönö Jisösbuk mala letorohot.”

14 Könaŋiri möt kutuba jiba lokon azinöŋ ölöwaka yetpuk kinöhi, mi eka keuŋiri qeapköbingö osiget.

15 Mi osiba jike kaunsöl kambu eŋgömosöta yaigep gemahotkö jim kutuget geyohotka nanŋinök keu jaruba goro aket.

16 Goro aka jiget, “Nini azi yahöt ki mönö denöwö ak etkibinto? Yetkön jim kutuyohotka aŋgöletot qainŋi kun asuhuyöhi, mi Jerusalem körek pakpak yeŋön möt teköze aka nini mi mewöyök qaŋ kölbingö osizin.

* 4:11: Sum 118.22

17 Mi osizinmö, mianğö keuñi ambazip sutñine kunbuk sehiba anbapuköra mönö ölop kewö jim kutum etkiinga dop kölma, ‘Injiri mönö Jisösgö qetnön keu kunbuk kude jimahot.’ Mewö jiba köhöikñanök jim qetal etkiinga sörauyohotka kunñan kun mi qahö möri teköma.”

18 Mewö jim jöhöba etkoholget öngöyohotka kewö jim kutum etkiget, “Injiri mönö Jisösgö qetnön keu kun kude toroqeba jiba ambazip kusum engimahot.” Mewö jiba sonço köhöikñi al etkiget.

19 Mewö jim kutum etkigetmö, Pitö Jon yetkön melenđa kewö jiyohot, “Netkön engö jimkutuku-tuñini tem kölbitköra Anutugören keu memba et aljiga omani akapuk. Mi Anutugö jemesoholje dop kölja me qahöwi, mi mönö nanñinak kewöta jiba jöhöme!

20 Mewö me mewö jiba jöhöbeakmö, netkön yuai eka möriri, mi köyatiba keu bök malbiranğö dop qahö.”

21 Mewö jiyohot mötketka ambazip körekñan anğöletot asuhuyöhi, mianğöra Anutu möpöseiget. Mewö möpöseigeranğöra aka “Likepñi denöwö ak etkibinak?” jiba köna kun qahö miwikñaiget. Qahö miwikñaiba galöm meme keu köhöiba jim etkiba etkömosötketka erohot.

22 Anğöletot asuhuiga lokon azi ölöwahöhi, mi (yara) yambuñi 40 lök onğita malök. Mianğöra mönö Anutu gwötpuk möpöseiba malget. Mewö.

Mötnarip yenön köuluköba kin köhöiget.

23 Jike nup galöm bohonñi aka jitñememe yenön Pitö Jon galöm meme keu jim etkiba etkömosötketka nanñiri alaurupñiri yengören

lilingöba anohot. Anda keu pakpak jigeri, mi jiyohotka mötket.

24 *Mi jiyohotka möta urumohot aka uruñini qezaköba jölñini memba wahöta Anutu kewö köuluköm wanğiget, “O Kembu öngöngöñi ketañi, göñön Suep, gölme, köwet aka yuai pakpak miengöreñ ahözawi, mi miwikñaim engiba Tonjina akzan.

25 *Göñön mönöwök nangi Uña Töröñi melainöñ eta nup azigi Deiwid, neñgö ambönini yangö numbuñe keugi ali göhö jitki memba kewö jiyök, ‘Urumelenğö kopa yeñön mönö wuanöngöra göjuñi göjuñi memakze?

Kantriñi kantriñi yeñön mönö denöwögöra aka mötmöt omanñi omanñi mötmörimakze?

26 Gölmegö kiñ kembuñi kembuñi yeñön gölmeñinangö dop wahörakze.

Pom jembonñi jembonñi yeñön mindiriba tokomakze. Mewö qeburuñ yöhöi Kembu aka yangö Amötqeçe Tonji qetal etkimakze.’

27 *Ölña, keu miangö dop siti kianğöreñ asuhuyök. Gi Nahöngi Töröñi Jisös kuñgunönga Amötqeçe Tonjina akza. Yanñön asuhuiga azi kembu yahöt Herod aka Pontius Pailöt yetkön Rom gawman galöm aka nanine Israel isikurupnini yembuk mindiriba totoko ala tuarenjoñ ak wanğiget.

28 Gi nangak ösumgi aka jitkahö dop yangöra yuai asuhumapkö keuñi jiba qeljine jöhöba arengönöñ. Yeñön yuai mi ak wanğigetka keu areñ pakpak mi mewö ölnambuk ahök.

* **4:24:** Eks 20.11; Neh 9.6; Sum 146.6 * **4:25:** Sum 2.1-2 * **4:27:** Mat 27.1-2; Mak 15.1; Luk 23.1, 7-11; Jon 18.28-29

29 “O Kembu, nini gi welen qem gihiinga merak galöm meme keu neŋgizei, gi mönö mi eka naŋgöm neŋginöŋga ölop göhö Buŋa keugi suahö ewö awösamkakak kinda jiba malbin.

30 Göŋön mönö börögi surunöŋga kawöl ambazip mi Nahöŋgi Töröŋi Jisösgö qet ösumŋe ölöwakŋe aka aŋgöletot aiwesök murutŋi murutŋi asuhumakŋe. Keu mi ölna.”

31 Mewö köulukögetka miri tokoba tatkeri, gölme mi memenjaliba utuköiga Uŋa Töröŋan körek pakpak uruŋini kokolak qeiga anda suahö ewö awösamkakak kinda Anutugö Buŋa keu jiba malget. Mewö.

Mötnariŋ ambazipnöŋ uru jöhöm aŋguget.

32 *Urumelen kambu ketanŋi yeŋön urumohot aka mötmöt mohot aka malget. Yuai pakpak ahöm eŋgiyöhi, mi göhöreŋök me nöŋgöreŋök, mewö qahö jigetmö, yuai pakpakŋini mi mutulaŋgöba mohot aiga malget.

33 Mewö malgetka Anutugö ösumŋan eŋgualöŋniga köhöigetka aposol yeŋön jitŋini memba dangunu ewö kinda Kembu Jisösnöŋ kömupnöhök guliba wahöröhi, keu mi naŋgöba jiba malget. Mewö malgetka Anutunöŋ kalem möriamŋi ketanŋi mokom eŋgiiga ambazipnöŋ göda qem eŋgiget.

34 Mewö malgetka miangö dop sutŋine kunŋan yuai kungöra qahö mözöröŋgöba osiba malök. Körek pakpak nene nupŋi nupŋi aka miriŋi miriŋi miengö tonŋi akeri, yeŋön mi bohonŋi memegöra

* 4:32: Apo 2.44-45

alget. Mewö algetka söngöröni monen kaiga mi memba kaget.

³⁵ Memba kaba aposol yengö böröjine algetka körek pakpak mözöröngöba osigerangö dop mi sutjine mendenja engiba malget.

³⁶ Azi kun qetji Josef, aposol yenön qetji Barnabas qetkeri, mi nanine keunöj: Uru nanğönanğö azi, yanön gölme jölanni qetji Saiprus miangören asuha qariba jike nup azia (Liwait) malök.

³⁷ Yanön mewöyök nene nup gölmeni bohonji memegöra ali monen kaiga söngöröni mi memba aposol yengören kaba böröjine alök. Mewö.

5

Ananias Safaira yetkören tilipqilip

¹ Mewö aka malgetmö, azi kun qetji Ananias anömni qetji Safaira yetkön nup gölmenjirangö bahöni bohonji memegöra alohot.

² Alohotka söngöröni kaiga azinöj monen bahöni nanğöngöra anğön köla asamböri anömnan mi möt teköi bahöni kun memba kaba aposol yengö böröjine alök.

³ Böröjine alökmö, Pitönöj kewö jiyök, “O Ananias, gi mönö wuanöngöra Satan qahö qetalnönga urugi kokolak qeza? Yanön urugi kokolak qeiga göjön esapköba Uşa Töröni isimkakalek ak wanğiba nup gölmegö monen bahöni anğön köla asambötzan?”

⁴ Gi miangö toni aknöni, nalö miangören mi nangi bujaya ahök me? Aiga nup gölmeği bohonji megetka söngöröni kayöhi, monen mi mönö göhö bujaya ahök me? Gi mönö wuanöngöra urugan

keu jöhöba yuai ki akzan? Gi munen jiba mewö mi-anön ambazip qahö tilipköm nenjizanmö, Anutu nanji mönö tilipköm wanjizan!”

⁵ Mewö jiiga keu mi möt sasauba tala gölmenöñ geba kömuyök. Mewö kömuiga ambazip pakpak miangö buzupñi möta sömbu mötmöt ketanji aket.

⁶ Kömuiga azi gwabö yeñön kota qamöñji memba esuhuba anjuba anda löm kölget.

⁷ Aua karöbut teköiga anömñan yuai asuhuyöhi, mi qahö möta kayök.

⁸ Kaiga Pitönöñ anömñi Safaira kewö qesim wanjiyök, “Injiri nup meme gölmenjiri bahöñi bohonñi memegöra alohotka monen kayöhi, mi miangö dop me qahö? Mi jinöñga mötpi!”

Qesim wanjiiga kewö melenök, “Monen mi ölnja miangö dop kayök.”

⁹ Mewö melenniga jim wanjiyök, “Injiri mönö wuanöñgöra urumohok aka Kembugö Uña Töröñi tilipköm wanjizahot? Mötnöñ, apkan kömuiga azinöñ memba anda löm köljei, yeñön mönö nanju ki dopdowigetka kourukñi mötzan. Yeñön gi mewöyök esuhuba anjum gihiba anme.”

¹⁰ Mewö jiiga miangörenök tala Pitögö könaje geba kömuyök. Kömuiga azi gwabö yeñön kota qamöñji miwikñaiba memba anjuba anda apñangö qöhöröñje löm kölget.

¹¹ Löm kölgetka urumelen kambu jömukñi yeñön möta awöwöligetka buzupñi sehiiga körek pakpak mötketka sömbu mötmöt ketanji aket. Mewö.

Aposol yeñön ambazip gwötpuk mem ölöwak enjiget.

12 Mewö aketka Anutugö kukösumñan aposol inahöm enjiiga nup memba böröñini ambazip qakñine algetka Anutunöñ aiwesök anğöletot meiga sutñine gwötpuk asuhuget. Ambazip Jisös möt narigeri, körek yeñön jöwöwöl jikegö tohoñ uruñe öngöba kiñ Solomongö sombem söranñambuknöñ tokoba kambu mohot aka malget.

13 Mewö tokoba malgetka ambazip tosatñan keñgötñini möta ziriñziriñ aketka kunñan totokoñine qahö öngöyök. Mewö qahöpmö, ambazip kambu yeñön göda gwötpuk qem enjiba malget.

14 Mewö tokoba malgetmö, töndup ambazip sehisehiñi yeñön kambuñini toroqem enjiba malget. Azi aka ambi kambuñi kambuñi yeñön Jisös möt nariba uruñini melengetka kambuñinan qariba sehüyök.

15 Aposol yeñön nup mewö megetka ambazip sehisehiñan ölöwaket. Mewö ölöwakeranğöra aka tosatñan kawöl ambazip enğuanğita kululu köla anğuba köna gorañe mewöyök dum möhamgöba möki tumbula miangöreñ al enjiba kewö jiget, “Pitönöñ kaba neñgoñgitmawi, imutimutñan mönö nalö miangöreñ yeñgöreñök kungö qakñe öngöi ölöwakawak!”

16 Mewöyök taon aka miri Jerusalem siti liliköba tat anjei, miengöreñök ambazip kambu gwötpukñan öröba kaget. Mewö kaba ambazip kawöl enğöhöyöhi aka ömenöñ töñöt memba* kölköljinjin ak enjigeri, mi enğuanğita kaba

* **5:16:** Töñöt mi kewö: Ömenöñ numbuñi möwöngöiga keu bök malja.

kaṅgotket. Kaṅgotketka körek yeṅön ölöwaket. Mewö.

Garatanöṅ aposol kösö mireyök enḡuanḡiri etket.

¹⁷ Mewö aka malgetka jike nup galöm bohonḡan aka yaṅgö sunḡurumurupḡi Sadyusi (Jike nupkö kapaṅkölköl) pati naṅgöm waṅgigeri, körek yeṅgö irimḡini seholiiga urupik aket.

¹⁸ Urupik aka aposol enḡömemba jöhöba gaw-mangö kösö mire al enḡiget.

¹⁹ Al enḡigetmö, sunḡem miangöreṅ ahögetka Kembugöreṅ garata kunöṅ kösö miri naṅgunḡi öröba enḡuanḡita yaigep eta kewö jiyök,

²⁰ “Mötket! Inini mönö anda jöwöwöl jikenöṅ öṅgöba ambazip jeṅine kinda malmal dölökḡaṅgö könaṅi pakpak aukḡe jigetka mötme.”

²¹ Mewö jii möta miri ḡiaṅiiga jöwöwöl jikenöṅ öṅgöba kinda Buṅa keu kusum enḡiget. Mewö kinda kusum enḡigetka jike nup galöm bohonḡi aka alaurupḡan naṅgöm waṅgigeri, yeṅön aṅgota jike kaunsöl kambu aka Israel jitḡememeurup köl öröm enḡigetka mohotḡe tokoget. Tokoba kinda opotöröp tosatḡi aposol enḡuanḡitpingö melaim enḡigetka kösö mire anget.

²² Angetmö, i miangöreṅ qahö miwikḡaim enḡiba öne lilingöba kösohotḡini kewö alget,

²³ “Nini öḡḡa kösö mire aṅgota naṅgunḡi köhöikḡi kötökḡi kölget kini wahip azinöṅ naṅgunöṅ kingetka ehin. Mi ehinmö, naṅgunḡi öröba öṅgöba miangöreṅ azi kun qahö miwikḡaizin.”

²⁴ Mewö jigetka jikegö kiripo galöm bohonḡi aka jike nup galöm bohonḡi yeṅön keu mi möta uruḡini lalalulu siksauk aiga jiget, “Oponḡ! Merak mewö

asuhuba könangep kunbuk supapköiga denöwö akapuk!”

²⁵ Mewö jigetka kunjan kota kewö jii mötket, “Mötket, azi kösö mire al engigeri, yenön mönö jöwöwöl jikenöŋ kinda ambazip Buŋa keu kusum engize!”

²⁶ Mewö jii mötketka jikegö kiripo galöm bohonjan opotöröp engömeiga anget. Anda “Ambazipnöŋ köt gila nengubepuk!” jiba kenğötŋini möta lolonjanök jöwöwöl jikenöŋ öngöba aposol enğuanğita kaget.

²⁷ Mewö enğuanğita kaba jike kaunsöl kambu yenğö jeŋine alget kingetka jike nup galöm bohonjan kewö qesim enğiyök,

²⁸ *“Inini Jisösgö qetŋe keu kun kude kusum enğime! Neŋön mewö jiba sonğo köhöikŋi al enğiinmö, keu mianğö ölnan mönö denöwö asuhuyök? Enön mönö toroqeba kusum enğiba mala Jerusalem siti ki Jisösgö keunöŋ kokolak qegetka maljin. Aiga azi mianğön kömumba sepŋi mokoiga enön nengöra kewö jimakze, ‘Yağö keunan mönö Juda nengö qakŋine öngöyöha ahöza.’”

²⁹ Mewö jiyökmö, Pitö aka aposol tosatŋan kewö melenğet, “Neŋön ambazip engö jimkutukutuŋini tem kölbingöra aka Anutugöreŋ keu andö qeinga qahö dop kölma. Qahö!

³⁰ Anutunöŋ nanine ambösakonurupninanğö bemŋina akza. Inini Jisös ip kembang möndöba qegetka kömuyökmö, Anutunöŋ i mem gulii wahörök.

* 5:28: Mat 27.25

³¹ Anutunöŋ i mem guliba waŋgita öŋgöi nanŋi böröŋi ölŋe ali tatza. Euyangöreŋ tari Anutunöŋ sinŋisöndoknini mosöt neŋgimamgöra kuŋgui Pom Kembunini aka Amötqeŋe Tonini akza. Mewö aka Israel könagesö urumelen ak neŋgimamgö mötza.

³² Nini yuai mi eka keu pakpak mi naŋgöba jiba dangunuŋi aka kinjin. Uŋa Töröŋan mewöyök keu mi naŋgöba jimakza. Anutunöŋ Uŋa Töröŋi ambazip jitŋi tem köl waŋgimakzei, mönö yeŋgö uruŋine ala buŋa qem eŋgiza.”

³³ Pitönöŋ keu mewö jiiga jike kaunsöl kambu yeŋön mötketka uruŋini sounöŋ qesiŋqesiŋ ewö qesiŋnök. Qesiŋniga uruŋini könöp jeiga aposol eŋguget kömumegö mötket. Mewö.

Gamalielnöŋ alaurupŋi jim mölöwörim eŋgiyök.

³⁴ Mewö mötketmö, Farisi (Köna keugö kapankölköl) azi kun qetŋi Gamaliel yaŋön jike kaunsöl kambu yeŋgö sutŋine tarök. Yaŋön Köna keugö böhi azia mali ambazip pakpak göda qem waŋgigetka jitŋememeŋina ahök. Mewö aka wahöta aposol eŋguaŋgitetka yaigepŋe geba borom kun mambötmegöra jim kutuyök.

³⁵ Mewö jim kutui gegetka jitŋememe alaurupŋi kewö jii mötket, “Israel aziurup, iŋini azi ki denöwö ak eŋgibeak, miangöra mönö ölöpŋanök galöm mem aŋgume.

³⁶ Mutuk emune azi kun qetŋi Teudas yaŋön wahöta ‘Nöŋön ketanamŋina akzal,’ jiiga merak (yara) yambu tosatŋi teköi maljin. Teudasnöŋ mewö jiiga azi 400:gö dop yambuk öröröŋ jöhöba mindiriba malgetmö, kunŋan qei kömui tosatŋan aziurupŋi imbi köl waŋgigeri, mi kuŋgum

engigetka buratigetka qeburuninan pömsöm qeba qahöwahök.

³⁷ “Yanğö andöñe Galili azi kun qetñi Judas asuhuyök. Yanön takis memegöra ambazip qetñini ohoba arengögeri, nalö mianğören asuhuyök. Asuhaba ambazip mölöwörim enğiiga karim akñegöra sunğurum alabaukurupñi aket. Mewö aketmö, i mewöyök qegetka kömuyök aka tosatñan sunğurumurupñi imbi köl wañgigeri, mi kungum engigetka buratiget.

³⁸ Mewö aiga nöñön kewö jibi mötket: İnini mönö azi kienğö silenine yuai lañ kude akñe. Yeñön nup ki megetka qeburun ahuzawi, mi gölme ambazipkö mötmöt areñineyök ahuza ewö, mi mönö sohoba pömsöm qeba qahöwakña. Mianğöra i mönö engömosötketka etme.

³⁹ Mi qahöwakñapmö, Anutugö mötmöt areñnöñök ahubawak ewö, eñön mönö qeburun mi jöhöbingö osime. İnini Anutu nanñi qetala tuarenjon ak wañgiba malbepuk. Nanñini könañini mewö miwikñabepüköra mönö galömñini mem añgumel!”

⁴⁰ Gamalielnöñ mewö jüiga goro keñi añğön köla wuatangöget. Mi wuatangöba aposol engoholget kotketka opotöröpköra jigetka raukapan (raurapan) mem engiget. Raukapan mem engigetka jike kaunsöl kambu yeñön aposol mi Jisösgö qetñe keu kun toroqeba jibepükö sonğo köhöikñi al eñgiba “Eta anme,” jiget.

⁴¹ Mewö jigetka jike kaunsöl kambu mosöta anget. Könanöñ anda kewö jiget, “Jisösgö qetköra aka qetbuñanini mewö mem sohozei, mi Anutunöñ mötza. Yanön nini sihimbölö mewöñi

mötpinangö dop möta nengehiga ölop dop kölja.” Mewö jiba uruninan mianğora ölöwahiga sönğaiget.

⁴² Sönğaiba nup toroqeba memba silim dop jöwöwöl jikenön öngöget aka mirinji mirinji mianğoreñ anda Buña keu kusum engiba malget. Jisösnön Amötqeçe Tonji Kraist akzawi, yeñon mianğö Ölöwak Buñañi jiba mianön ambazip urunini kuñguba malget. Mewö.

6

Nupbauk azi (dikon) 7 meköm engiget.

¹ Gwarek jañğoninan qariba öngöiga Juda ambazip kambu yahöt aka malget. Tosatñan kantri tosatñeyök kaba Grik keu jiget aka tosatñan nanñine gölmeñine mala kota Arameik aka Hibu keu jiget. Mewö malgetka nalö mianğoreñ goranora (noragora) asuhuyök. Grik keu jigeri, yeñon kewö jigetka böliyök, “Aposol yeñon nalö dop nene inap mendeñ neñgimakzemö, Grik keu ambi malö neñgö nene inap bahöñi mi bahösapsap neñgimakze. Örorön qahö misigetka qahö dop kölja.”

² Mewö jigeranğora aka aposol 12 yeñon gwarek kambu köl öröm engiget tokogetka kewö jiget, “Neñon silegö nup memba nene mendeñda engiba Anutugö Buña nupköra nalönini ölop qahö dop köli urugö nupninan etpapuk. Mi kude dop kölja.

³ Mewögöra alaurupnini, mötket! Eñon mönön nanñini sutñineyök nupbauk miwikñaim engime. Uña Törönjan azi urunini kokolak qeiga Anutunön mötkutukutunji qainñi kun al engii qetbuña ölopñi memba kinjei, mönön azi mewöñi 7 meköm engime.

Mi meköm engigetka nup mi enjiinga mi galöm köla memba malme.

⁴ Yeñön mewö malmemö, naninak nalö jömukñanök köuluköba Anutugören Buña keu jegep kinda jim sehiba malbin. Nup miangören mönöpöndañ kinbin.”

⁵ Mewö jigetka kambu pakpak yeñön “Ölöp dop kölja!” jiget. Mewö jiba azi qetji Stiwen meköget. Stiwen mi Anutu köhöikñanök möt narim wanjiiga Uña Töröñan uruñi kokolak qei malök. Toroqeba azi kewö meköba möwölöhöm engiget: Filip, Prokorus, Nikanor, Timon, Parmenas aka Nikolas. Nikolas mi kian kantrigö siti qetji Antiokia miangören ahuba könangep Juda azia aka uruñi Kraistkören melenök.

⁶ Mi meköba möwölöhöm engigetka aposol yeñgö jemesoholjine öngöm angetka böröñini nöropñine ala köuluköba kötuetköm engiget.

⁷ Anutugören keu jim sehiyetka töhötmöriamñambuk aiga gwarek yeñgö jañgöñinan Jerusalem sitinöñ qariba sehiyök. Jike nup galöm yeñgö kambunöhök sehisehiñi yeñön mewöyök uruñini melenđa Jisös möt nariget. Mewö.

Stiwen meraköba memba jöhöget.

⁸ Anutugö kalem möriamñi aka kukösumñi mi-anön nupbauk azi Stiwegö uruñi kokolak qei kinda aiwesök anğöletot ketañi ketañi mi ambazip sutñine mei asuhuget.

⁹ Mi asuhugetmö, Juda tosatñan wahöta Stiwen anğötuarenjoñ ak wanjiget. “Lolohoba

kageraᅇgö köuluk miri kambu”^{*} yeᅇgö sutᅇjine Juda tosatᅇaᅇn Sairini aka Aleksandria Ijpt siti yahöt mianᅇgöreᅇᅇök liliᅇgöba kaba kinget. Azi mewöᅇaᅇan mindiriba wahöta Silisia aka Eisia prowinsnöhök kageri, yeᅇgö kambunöhök Juda azi tosatᅇi eᅇᅇgömembra mohotᅇe Stiwenbuk möndöᅇda goranora aka jitnakölik erauget.

¹⁰ Mewö jigetmö, Uᅇa Töröᅇaᅇn Stiwen sölölohöi mötkutukutu ketaᅇaᅇgö qakᅇe keuᅇi melaᅇda jiyöhi, mi Juda yeᅇᅇön qeapköbingö osiba etket.

¹¹ Osiba eta mömölaköba anda azi tosatᅇi mi-wikᅇaiba kuᅇgum eᅇgiba kaba kewö jiget, “Yaᅇᅇön mepaqepaik keu jiba mianᅇön Moses aka Anutu qetal etkii mörin.”

¹² Mewö jiba anda ambazip kambu, yeᅇgö jitᅇememe aka Köna keugö böhi miᅇᅇgö urugege keu jigetka uruᅇjini könöp jeyök. Könöp jeiga kölölohoba kaba Stiwen öroba meraköba memba jike kaunsöl kambu yeᅇgö jeᅇjine anget.

¹³ Anda azi tosatᅇi eᅇᅇᅇaᅇᅇgitketka kota Stiwengö silene keu munene ala kewö naᅇgöba jiget, “Azi kianᅇön mönö jöwöwöl jikenini aka Mosesᅇöreᅇ Köna keu tuarenᅇoᅇ aka qahö mosörakzapmö, mi toroqeba jimahakza.

¹⁴ Tuarenᅇoᅇ aka kewö jii mörin, ‘Jisös, Nazaret azinᅇön mönö jöwöwöl jike ki köndeᅇniga qeᅇe-laᅇlaᅇ ahöma aka Mosesnᅇᅇ Köna keu neᅇᅇii ahözawi, mi uteköma.’ ”

^{*} **6:9:** Köuluk miri kambu kuᅇᅇgö qeᅇᅇi mi kewö asuhui qetket: Ambazip pomᅇi yeᅇᅇön tosatᅇi bohonᅇjini eᅇᅇᅇmegetka buᅇaᅇjini aka toᅇinaᅇgö weleneᅇjini öne qeba mala (sleiw) böroᅇjineyök lolohoba kageri, yeᅇᅇön mönö nanᅇjini köuluk miri kambuᅇjini ala qeᅇᅇjini mi mewö qetket.

15 Mewö jigetka jike kaunsöl kambugö totokonöŋ tatkeri, yeŋön körekŋan Stiwen törörök ugetka kaisoŋgolomŋan Suep garata tandök ewö ahiga eka mötket. Mewö.

7

Stiwenöŋ keu likepŋi melenŋa jii mötket.

¹ Stiwen keu jakeŋe al waŋgetka kini jike galöm bohonŋan kewö qesim waŋgiyök, “Keu mi ölna me muneŋa?”

Stiwenöŋ Abrahamgö kösohotŋi jiyök.

² *Qesim waŋgiiga likepŋi kewö melenŋök, “Aziurup, iwi darumuni, nöŋön kewö jibi mötket: Nanine ambönini Abrahamnöŋ Mesopotemia gölmenöŋ maliga asakmararaŋ Toŋi Anutu yaŋön asuhum waŋgiiga Mesopotemia mosöta Haran mirinöŋ anda malök.

³ Anutunöŋ kewö jii mörök, ‘Gi nangi miri gölmeŋi aka tinitosolomurupki enŋömosöta gölme kun kondel gihimami, mönö kiangöreŋ anda malman.’

⁴ *Mewö jii möta Kaldia gölme mosöta Haran gölmenöŋ anda malök. Miangöreŋ mali iwiŋan kömui Anutunöŋ melaim waŋgiiga inŋini nalö kewöŋe ki maljei, mönö gölme kiangöreŋ kaba könahiba tata malök.

⁵ *Gölme kiangöreŋ tata maliga Anutunöŋ gölme kitipŋi borom kun köna tamböŋaŋgö dop mi qahö buŋa qem waŋgiyök. Gölme kiangö toŋi qahöpmahöp qahöpmö, Abrahamgö gwölönarökŋi

* 7:2: Jen 12.1 * 7:4: Jen 11.31; 12.4 * 7:5: Jen 12.7; 13.15; 15.18; 17.8

qahö ahuiga Anutunöŋ nalö mianğoreŋök yaŋgö keu qeljiŋe kewö jiba jöhöyök,
 ‘Nöŋön gölme ki mi gi aka göhö andöge gwölönarökurupki ahumei, mönö eŋğöra eŋgibi mianğö tonji akŋe.’

⁶*Mewö jiba toroqeba keu kewö jiyök,
 ‘Göhö gwölönarökurupkan gölme kungen anda kian aka malme. Kian aka malgetka gölme mianğö tonji yeŋön jöhöm eŋgigetka tonjanğö welenŋini öne qeba malme. Mewö malgetka tulumgöm eŋgigetka nup lömbötŋi lömbötŋi öne megetka söŋğöröŋi qahö eŋgigetka (yara) yambu 400:gö dop wahöjalij qakŋe malme.

⁷*Mewö malmemö, nöŋön könaŋgep gölme ambazip welenŋini qeba malmei, mi ke-unöŋ ala jim teköm eŋgimam.’

Mewö jiba toroqeba jiyök,
 ‘Mewö asuhuiga gwölönarökurupkan gölme mi mosöta gölme kianğoreŋ lilingöba kaba waikni memba möpöseim niŋgiba malme.’
 Mewö.

Aisak, Jeikob aka Josefyeŋgö kösohotŋini jiyök.

⁸*“Anutunöŋ Abrahamğöra mewö jiba aiwesök kewö akŋegöra jii mörök, ‘Iŋini nömbuk jöhöjöhö akŋegöra mönö nöŋgö aiwesök esöŋini köla azi silenine yandiba malme.’ Mianğö dop Abrahamnöŋ nahönŋi Aisak ahuiga silim 8 aiga mianğoreŋ aiwesök mi silenje yandiyök. Aisaknöŋ nahönŋi Jeikob qiwikŋaiba aiwesök

* **7:6:** Jen 15.13-14 * **7:7:** Eks 3.12 * **7:8:** Jen 17.10-14; 21.2-4; 25.26; 29.31-35.18

mi yandiyök aiga Jeikobnöh nahönurupñi qiwikñaim engiba miangö dop yandim engiyök. Jeikobkö nahönurupñi 12 yeñön Israel neñgöreñ ambösakonurupnina aket.

9 * “Ambösakonurupninan munñini Josef mi andö qem wañgiba bohonñi memegöra algetka tosatñan söñgörüñi memba wañgita Ijipt kantrinöh anda algetka malök. Mianğöreñ malökmö, Anutunöh yambuk kinök.

10 * Yambuk kiniga köñjiliñ könañi könañi qakñe öngöi möröhi, körek miengöreñök mönö meköm wañgiyök. Meköm wañgiba kalem möriamñi wañgii mötkutukutuñi ölopñan asuhuyök. Mi asuhuiga Ijipt kantrigö farao kiñ yangö jeñe añgori ehi dop köliga azi kembu kuñgum wañgii Ijipt kantri aka farao kiñgö jakömbuak miri yuainñi galöm köl engiba malök.

11 * Galöm köl engiiga bödi nalöñi kam kuñguiga Ijipt pakpak aka Kenan gölme mi dop kölök. Mianğöra ambazipnöh kahasililiñ ketañi möta malget. Mewö mala nanine amböurupninan nene miwikñaibingö meme yangap meget.

12 “Mewö megetka ‘Ijipt gölme mianğöreñ padi ahöza,’ mewö jigetka Jeikobnöh mörök. Mewö möta nahönurupñi, nanini amböurupnini mi nalö mutukñi melaim engii mianğöreñ anget.

13 * Mewö anda mala lilingöba iwiñinağöreñ kaget. Könañgep indimñi kun kunbuk angetka Josefñöh könañamñi indeli mötket. Mötketka farao

* 7:9: Jen 37.11, 28; 39.2, 21
* 7:13: Jen 45.1, 16

* 7:10: Jen 41.39-41

* 7:11: Jen

kiḡnön mewöḡanök tinitosolomḡi enḡeka könaḡini möt kutuyök.

14 *Möt kutuiga Josefnön keu ala iwiḡi Jeikob aka tinitosolomurupḡi pakpak mi köl öröm enḡii yaḡöḡen anget. Ambazip angeri, yeḡö jaḡḡöḡini mi 75 ahök.

15 *“Jeikob mewö waḡitketka Ijipt gölmenön anök. Anda mala miḡöḡen kömuyök. Amböurupninan mewöyök kömum teköget.

16 *Kömum tekögetka qamötḡini memba aḡuba Kenan gölmenön liliḡöba Sekem mire kaba löm köl enḡiget. Mönöwök Abrahamnön Sekem (Sikem) mala gölme kun azi qetḡi Hamor yaḡö gwölönarökurupḡi yeḡöḡenök moneḡnön söḡöḡönḡi meyöhi, mönö miḡö qaksiriḡe köt köteḡ urorohoba miḡöḡen al enḡiget.” Mewö.

Mosesnön Ijipt kantrinön ahuba mala korök.

17 *Stiwenön toroqeba kewö jiyök, “Anutunön mönöwök jöhöjöhö keu Abraham waḡiyöhi, mi öḡambuk akḡapkö nalönḡi töriba dopdowiyök. Dopdowiyöhi, miḡö dop Israel yeḡön Ijipt gölmenön ahum sehiba malgetka kambuḡinan qariba öḡöyök.

18 Qariba öḡöiga farao kiḡ kunön wahöta könahiba Ijipt galöm köl enḡiyök. Kiḡ dölöḡni miḡön Josefḡö könaḡi mi qahö möta malök.

19 *Yaḡö könaḡi kude möta nanini könaḡesö mi isimkakalek qakḡe tilipköba amböurupnini mulungöm enḡii malget. Mewö malgetka kiḡnön

* 7:14: Jen 45.9-10, 17-18; 46.27 * 7:15: Jen 46.1-7; 49.33

* 7:16: Jen 23.3-16; 33.19; 50.7-13; Jos 24.32 * 7:17: Eks 1.7-8

* 7:19: Eks 1.10-11, 22

köhöiba Israel kewö jim kutum enġiyök, ‘Inini mönö morö azi sepsepņini memba yaigepņe anda onöņ gilgetka geba kömume.’

20 * “wö jiiga nalö mianġörenök morö kun qetņi Moses asuhuyök. Anutunöņ i eka möri dop kölök. Mosesnöņ ahuiga iwinamņan i köiņ karöbut mianġö dop miriņire galöm köla malohot.

21 * Köiņ karöbut mi teköiga namņan waņgita yaigepņe anda köndenöņ o qakņe ala mosörök. Mosöta ani farao kiņġö böratņan miwikņaiba meiga nahöņņi aiga galöm köl waņgii malök.

22 Mewö maliga Ijpt yeņġören mötmöt aka aiaka pakpak mi kusum waņgigetka mianġö dop Ijpt yeņġören mötkutukutu azi ketani ahök. Yaņön keuņi aka ahakmemeni mi ösum-mumu qakņe jiba aka malök.

23 * “Mosesġö (yara) yambuņi 40 teköiga mianġören Israel darumunurupņi yeņġö prowinsnöņ anda enġekņamġö mötmöriba keuņi jöhöba anök.

24 Anda Ijpt azinöņ Israel azi kun yambuk öne töhön aņgururuk aka öröm ureim ak waņgiba qeyöhi, mi ehök. Mi eka anda Israel azi mi bauköm waņgiba andöņe anda likepņi melenġa Ijpt azi mi qeba qem kömuyök.

25 Qem kömuiga Anutunöņ Mosesġören nariba Israel ambazip farao kiņġö böroņeyök meköm enġimamġöra kukösum waņgii kayök. Yeņön Moses eka könaņi mewö ölöp möt asarize, mewö mötmöriyökmö, yeņön mi qahö möt asariba öne töņpin malget.

* 7:20: Eks 2.2 * 7:21: Eks 2.3-10 * 7:23: Eks 2.11-15

26 “Miri gianjiiga kunbuk yengören ani Israel azi yahötñan auyohotka etkehök. Etkeka esapköba sutñire luai ahumapkö möta kewö jiyök, ‘Azi yahöt, injiri darumuna. Nannjiri mohot mianjön mönö wuanöngöra mewö ayuhum anğuzahot?’

27 Mewö jiyökmö, azinöñ alañi mem bölim wañgiyöhanjön mönö Moses könöpuk utala kewö jim wañgiyök, ‘Gi mönö nengören galöm aka jimtekötekö azia akzan me? Dañön mewö kuñgum gihiiga kinjan?’

28 Gi uran Ijpt azi qenöñ kömuyöhi, mönö mewö ni nuñgumamgöra jizan me?’

29 *Mewö qesim wañgiiga keu miangöra aka Ijpt kantri mosöta ölöñ köla Midian gölmenöñ anda kiana malök. Mewö mala ambi memba nahönyahötñi yahöt qiwikñaim etkii malget.” Mewö.

Mosesnöñ gölme qararañkölkölñe yambu 40 malök.

30 *Stiwenöñ keu toroqeba kewö jiyök, “Mewö malgetka (yara) yambu 40 teköiga miangören Mosesnöñ gölme qararañkölkölñe liliköba kundunji qetñi Sainai miangö könañe mali Suep garata kunñan asuhuyök. Mi ip köhösö kemañe könöp bölam asuha qahö jem kutuyöhi, miangören asuhum wañgiyök.

31 Mewö asuhum wañgiiga tandök miangöra welipköba könañi eka möt kutumamgöra kösutñe ani Anutugörenök keu kun kewö kai mörök,

32 ‘Nöñön göhö ambösakonurupki yengö Anu-tuñina akzal. Nöñön Abraham, Aisak, Jeikob yengö

* 7:29: Eks 18.3-4 * 7:30: Eks 3.1-10

Kembunina mala kota maljal.’ Mewö jii möta jönömni könahiba unduiga miangörej göröken uba ekñamgö keñgötñi mörök.

³³ “Keñgötñi mörökmö, Kembunöñ kewö jii mörök, ‘Gölme tiba kinjani, mi gölme kömbukña. Miangöra gi mönö köna esugi qeköman!

³⁴ Nöñgö ambazip kambu-urupni Ijipt maljei, mi mulumgöm engigetka sihimbölö qakñe aum-möriba malje. Nöñön mi eka maljal. Yeñön osongom engui sahöt uletzei, nöñön mi möt teközal. Nöñön yeñgö böröñineyök meköm enjgimangöra etzal. Miangöra gi mönö dölki wahöta ki kanöñga melaim gihibiga Ijipt anman!’ Mewö jiyök.”

Mosesnöñ Israel enjguanñiri yambu 40 könanöñ malget.

³⁵ *Stiwenöñ keu toroqeba kewö jiyök, “Yeñön Moses qañ köla köndat wañgiba kewö jiget, ‘Gi mönö galöm aka jimtekötekö azia akzan me? Dañön mewö kuñgum gihiiga kinjan?’ Mewö qañ köla jigetmö, Anutunöñ Moses mi melaim wañgiiga yeñgö pom kembunina ahök. Suet garatanöñ ip köhösonöñ bölam jeyöhanñoreñ asuhum wañgiyöhi, yañön mönö Anutugörej buzup keu mi memba kaba uruñi kuñgui mekömekö aziñina ahök.

³⁶ *Israel mekömekö aziñina aka ambazipurupñi mi aiwesök anñöletot könañi könañi memba Ijipt kantrinöhök meköba enjguanñiriga mosöta Köwet Pisikñi miangörej kaget. Emu kagetka miangörej aka gölme qararañkölkölñe mewöñanök toroqeba aiwesök anñöletot murutñi murutñi mi (yara)

* 7:35: Eks 2.14 * 7:36: Eks 7.5; 14.21; Jan 14.33

yambu 40 mianğö uruŋe memba kondeli eka malget.

37 *Mosesnön pom kembuŋina mala Israel könagesö yeŋğora kewö jiyök, ‘Anutunön Juda kambu eŋğö sutŋineyök kezapqetok azi kun möwölöhöba kuŋguiga ni ewö akŋa.’

38 *‘Israel yeŋön gölme qararanğölkölŋe kaba malgetka pom kembuŋini aka nanine amböskonurupnini yembuk mala könagesöŋini galöm köl eŋgiyök. Galöm köl eŋgiba kundunŋi qetŋi Sainai mianğöreŋ öŋğöi Suep garata kuŋŋan keu jii möta yambuk malök. Mewö mala Anutunön malmal köhöikŋaŋğö keuŋi sundan jii möta malöhi, yaŋön keu mi mianğö dop jiiga neŋğö Buŋaya ahök.

39 ‘Yaŋön pom kembuŋina malökmö, nanine amböskonini yeŋön keuŋi tem köl waŋgibingö ölan eŋğöhöiga andö qeget. Andö qeba utal waŋgiba uruŋini möŋaiiga Ijpt kantrinön kunbuk liliŋğöbingö sihimŋi mötket.

40 *Mewö möta Mosesgö datŋi Aron yaŋğora kewö jiget, ‘Mosesnön pom kembunini aka Ijpt kantrinöhök meköba neŋguaŋgiriga kaini, yaŋön kundunŋe öŋğöba tandök denöwö akzawi, nini mi qahö mötzin. Mi qahö mötzinaŋğora göŋön ölop tandö lopionŋ menöŋga mienön jitmemenini aketka könaŋine toroqeba anbin.’

41 *‘Mewö jiba mianğöreŋök goul memba mi-aŋön lopionŋ kun bulmakau moröŋaŋğö tandök meget. Mi memba jöwöwöl memba kaba al

* 7:37: Dut 18.15, 18 * 7:38: Eks 19.1-20.17; Dut 5.1-33 * 7:40:

Eks 32.1 * 7:41: Eks 32.2-6

wanjiba lömbuan ohoba yuai böröñinan megeri, mianjö sösongai aka möpöseiget.

⁴²* Mewö aketmö, Anutunöñ mi eka ölan yöhöiga andö engui Suepkö senjelau Tonji waikñini memba möpöseim enjimegöra enjömosörök. Kezapqetok azi Amosnöñ keu kun ohoi Buzup Kimbinöñ ahözawi, mönö mianjö dop kewö aket,

‘O Israel ambazip, inini gölme qararanjölköñje kaba (yara) yambu 40:gö dop mala nalö mianjörej sömbup jöwöwöl ohoba naluk tosatñi memba kaba niñgiba malget me qahö?

⁴³ Mi qahöpmö, enön mönö bem qetñi Molok yangö opo seri koumñi mi anjuget aka bem qetñi Refan yangörej senjelau imutñi mi anjuba kaba malget.

Enön imut lopion mi waikñiri memba möpöseim etkibingö meget buñanina ahök.

Mianjöra aka nöñön mönö inini közöl enjibi kerökurupñinan kaba enjuañgitketka anda mala köröwen Babilon kantrigö andöñje öñgöba malme!’ ” Mewö.

Stiwenöñ opo seri jikegö keuñi jiyök.

⁴⁴ * “Ambösakonurupnini yenön gölme qararanjölköñje kaba mala Anutugö dangunujñi kuñguba opo seri jike memba anjuba malget. Mi memba anjuba Anutunöñ jikenji memegöra Moses jim kutum wanjiba söpsöp imutñi kondel wanji ehöhi, mönö mianjö dop meget kinök.

* **7:42:** Amos 5.25-27 * **7:44:** Eks 25.9, 40

45 *Mosesnön ambösakonurupnini galöm köl enğiiga yejön opo seri jike mi anğuba malget. Könanğep Josuanön wahöta galöm köl enği gwölönarökurupninan jike mi buña qem anğuba toroqeba kaba mala kantri ki kanğotket. Kantri ki kanğotketka Anutunön gölme toni kambuñi kambuñi enğuatangöi angetka gölmeñini anğön köla meget. Memba tata malgetka kiñ Deiwidnön asuhuyök.

46 *“Yañön asuhuba Anutu jemesoholñe kalem möriamñi miwikñaiaba kewö qesim wañgiyök, ‘Anutu Jeikobkö bemñi, göñön ölop jinönga nönön jim kutubi nini göhöra jöwöwöl jike bohonñi membin.’

47 *Mewö qesim wañgiyökmö, Solomonön jiiga Anutugöra jöwöwöl jike meget.

48 Mi megetmö, Öngöngöñi Ketanñi yañön azinön miri böröñinan megeri, miangören qahö malja. Miangö keuñi kezapqetok azi kunñan kewö ohoi ahöza,

49 *Kembunön jiza: Nöngören jakömbuak dum tatatni mi Suepnön ahöiga gölme mi könananğö döpnñi aiga miangören tiba tatzal. Inini mönö nöngöra miri tandökñi denöwö megetka dop kölbawak?

Me miri denikeangören miwikñaim niñgigetka miangören öngöba luhut memba malbilenak?

50 Yuai pakpak mi mönö nanak nani börönan miwikñaim enğial mi mötze.’ ” Mewö.

* 7:45: Jos 3.14-17 * 7:46: 2 Sml 7.1-16; 1 Hist 17.1-14 * 7:47: 1 Kiñ 6.1-38; 2 Hist 3.1-17 * 7:49: Ais 66.1-2

Stiwenöŋ kaunsöl yeŋgö uruŋini kuŋguyök.

51 **“O qegetal ambazip, eŋgö uruŋinan mönö duhuiga kopa akze! Kezapŋinan köungöba qahö kötökŋi tohoza! Mi duhuzawaŋgöra Anutugören keu qetala kezapjupjup ahakze. Ambösakonŋinan Uŋa Töröŋi tuarenjōŋ ak waŋgiba malgetka eŋōn mönö yeŋgö dop toroqeba mewōŋanök Uŋa Törōŋi sundan dop andö qemakze!*

52 *Engö ambösakonurupŋinan kezapqetok ambazip awamŋi qahö sesewerowero ak eŋgiba malget. Yeŋgörenök daŋōn mönö kahasililiŋ qahö miwikŋaiyök? Yeŋōn Azi Solanŋan asuhumapkō kezapqetok keuŋi jigetka i eŋguget kömuget. Yeŋōn kömugetka Azi Solanŋan nanŋak asuhuiga inini i mamalolo ak waŋgiba qeget kömuyök.*

53 *Anutunōŋ garataurupŋi melaim eŋgiiga Suepnöhök eta Köna keu eŋgigetka Buŋaŋini ahökmö, eŋōn mi qahö tem köla malget.” Mewö.*

Stiwen kötnōŋ qeget kömuyök.

54 *Stiwenōŋ keu mewö jiiga jike kaunsöl yeŋōn mötkeri, mi uruŋini sounōŋ qesiŋqesiŋi ewö qesiŋnök. Qesiŋniga uruŋini könöp jeiga ambarik (amdabö) yöhöba wahöta kinget.*

55 *Mewö aketmö, Uŋa Törōŋan Stiwegö uruŋi kokolak qeiga jeŋi Suepnōŋ görōken ui öŋgōiga Jisös Anutugö asakmararaŋ uruŋe euyangören Anutugö börōŋi ölŋe kini ehök.*

56 *Jisös eka jiyök, “Mötket! Suepnōŋ aŋaŋiiga Suep gölmegö Azi Ölŋan mönö Anutugö börōŋi ölŋe kiniga ekzal.”*

* **7:51:** Ais 63.10

57 Mewö jii möta qet gigilahögetka göju ketanji wahöriga kezapņini böröņinan gwözöņda körekņan luhuba anda qeraköba meget.

58 Mewö memba taon göraņe örörahöba anda yaigepņe ala kötnöņ könahiba gila qeget. Mewö qegetka tosatņan mi eka kinda malukunini qeköba mölohoba azi gwabö Solgö kösutņe alget.

59 Mewö aka kötnöņ gila qebayök kingetka Stiwenöņ Anutugö köuluköba kewö jiyök, “O Kembu Jisös, gi mönö uņani memba aņgön kölman!”

60 Mewö jiba siminņan geba köla qet gigilahöba jiyök, “Kembu, siņgisöndok ki akzei, miangö lömbötņi mönö yeņgö qakņine kude alman!” Mewö jiba nöņ qeba kömuyök. Mewö.

8

Solnöņ urumelenj kambu sesewerowo ak enģi denģet.

1 Stiwen qeget kömuyöhi, mi Solnöņ mewöyök möri dop kölök. Nalö miangöreņök sesewerowo ketanji ahuiga Jerusalem sitigö urumelenj kambu kazik ak enģiget. Miangöra yeņön körekņanök siti mosöta denģa Judia aka Samaria prowins yahöt mi dop köla angetka aposol yeņönök kapaņ köla sitinöņ malģet.

2 Ambazip Anutu göda qeba waikņi memba malģeri, yeņgöreņök tosatņan Stiwen kömuyöhaņgöra jingēj köla gwötpuk sahöta qamötņi memba anda löm kölģet.

3 *Löm kölģetmö, Solnöņ urumelenj könagesö jaņgaurāģa mem enģiba miriņi miriņi liliköba

* 8:3: Apo 22.4-5; 26.9-11

öngöba urumelen azi aka ambi örörahöba enngömembra gili etketka jiiga kösö mire al enngiget. Mewö.

Filipnön Samaria sitinön Buja nup meyök.

⁴ Urumelen ambazipnön dennda miri dop anda kaba liliköba malgeri, yenön Ölöwak Buja jiba mi-anön ambazip urunini kunnguba malget.

⁵ Filipnön Samaria prowinsgö siti kunön geba Amötqege Tonji Kraistkö könanji jim asarim enngii mötket.

⁶ Mia jim asarim enngiba anngöletot meiga letotketka ambazip kambu yenön mi eka keu jiyöhi, mi urumohot aka kezap ala möta anngön kölget.

⁷ Filipnön nup meiga Anutugö ösumnan öme gwötpuk mi ambazip urunineyök ennguatangöyök. Ennguatangöiga qet bölöbölö qeta kota anget. Nup meiga ambazip sehisehiji likepñini kömukömuñi aka lokon malgeri, mi ölöwaket.

⁸ Mewö aiga Samaria sitinön sösöngai öngöngöñi asuhuba ahöyök. Mewö.

Sile galöm azi Saimonön timbiqimibilim ahök.

⁹ Sösöngai ahöyökmö, Samaria siti miangören suna jinan azi kun qetñi Saimon malök. Yanön (yara) yambu tosatñi qarösongo amötqege nup memba Samaria ambazip welipköm enngiiga malget. Mewö malgetka “Azi öngöngöñi akzal,” jiba nanngöra möri öngöyök.

¹⁰ Ambazip öngöngöñi eretñi yenön körek pak-pak Saimongö keugöra kezap ala möta kewö jimalget, “Anutugö ösumñi qetñi ‘Kukösum ketanji,’ qetzei, mianön mönö azi miangö urunje geiga ahöza.”

11 Saimonöŋ qarösongo amötqeŋe nup mi nalö köröpŋi memba ambazip welipköm enŋiiga malget. Mewö ak enŋiyöhaŋgöra aka yaŋgöreŋ qekötahöba malget.

12 Mewö malgetmö, Filipnöŋ kaba Anutugö be-mtohoŋe aŋgotpingö Ölöwak Buŋaŋi aka Jisös Kraist qetŋaŋgö könaŋi mi jim asarim enŋiyök. Mi jim asarim enŋiiga ambazip gwötpukŋan Buŋa keu möt nariba uruŋini melengetka o melun mem enŋiyök.

13 Mewö aketka Saimonöŋ mewöyök keu mi möt nariiga o melun mem waŋgigetka Filipkö kösutŋe kaba mala wuatangöyök. Mewö aiga Filipnöŋ aŋgöletot aiwesök ketanŋi ketanŋi mei asuhugetka mi eka welipköba malök. Mewö.

Uŋa Töröŋan Samaria yeŋgö uruŋine geyök.

14 Samaria ambazipnöŋ Anutugöreŋ Buŋa keu mewö möt aŋgön kölgeri, miangö buzupŋan sehiba Jerusalem sitinöŋ ani aposol yeŋön mötket. Yeŋön mi möta Pitö aka Jon meköba melaim etkigetka yeŋgöreŋ anohot.

15 Anda aŋgota yeŋgöra aka köuluköba Uŋa Töröŋan uruŋine gemapköra Kembu qesiyohot.

16 Könaŋi kewögöra qesiba köuluköyohot: Yeŋön Kembu Jisösgö qetŋe o melun mem enŋigetmö, Uŋa Töröŋan yeŋgöreŋök kungö uruŋe qahö gei öne malget.

17 Miangöra köuluköba böröŋiri nöropŋine alo-hotka Uŋa Töröŋan uruŋine geiga meget. Mewö.

Saimonöŋ Uŋa Töröŋi söŋgöröŋi memamgö jiyök.

18 Aposol yetkön böröŋiri ambazip nöropŋine alohotka Anutunöŋ miangö dop Uŋa Töröŋi yeŋgö

uruḡine aliga Saimonöḡ mi eka monenḡ memba kaba kewö jiyök,

19 “Inḡiri mönö kukösum mewöḡi mi nia kun niḡḡiyohotka memba böröni denike yeḡḡö nöröḡḡine almami, Uḡa Töröḡan mönö yeḡḡö uruḡine gema.”

20 Mewö jiyökmö, Pitönöḡ kewö jim waḡḡiyök, “Aek! Yapmakek! Göḡön Anutugö kaleḡḡi mi monenḡḡöḡ söḡḡöröḡi memaḡḡöra jizan. Mianḡḡöra gi mönö monenḡgabuk könöḡ sianöḡ geman.

21 Göḡö urugan mönö Anutugö jeḡe qahö diḡḡiza. Mianḡḡöra gi Buḡa keu kianḡö öḡḡi kun qahöḡmaḡöḡ meman.

22 Bölöḡamgeyök mönö urugi melenḡda Kembu köulukönöḡga yaḡön uru mötmötkahö siḡḡisöndokḡi mi mosötpawak.

23 Göḡö urugan mönö kömbuhiiga wösökömbuk ewö jula kokolak qem gihiza. Siḡḡisöndokan mönö kösö ewö köpeim ghiiga qaközan.”

24 Pitönöḡ mewö jiiga suḡa jinaḡ azi Saimonöḡ kewö melenḡ etkiyök, “Mönö nöḡḡöra aka Kembugö köuluköyohotka keu jizahori, mianḡö öḡḡi kun qahö asuhum niḡḡibawak.”

25 Aposol yetköḡ Kembugö Buḡa keu mi siti mianḡöreḡ naḡḡöba jiba jim asariba enḡömosöta anohot. Könanöḡ anda Samaria prowinsḡö miriḡi miriḡi liliköba ambazip uruḡini Ölöwak Buḡa keunöḡ kuḡḡum enḡiba mala Jerusalem sitinöḡ liliḡöba anohot. Mewö.

Filipnöḡ Afrika azi kungöra Buḡa keu jii mörök.

26 Kembugöreḡ garata kunḡan Filipköra keu kewö jii mörök, “Gi mönö Jerusalem siti mosöta

Saut göröken anman. Gölme qararankölkölne köna isikni (walni) Gaza taonöŋ gemakzei, mönö mianğoreŋ anman.”

²⁷ Mewö jii möta Filipnöŋ amqeba mosöta anök. Anda Afrika azi kunŋan miriŋe lilingöba ani könanöŋ miwikŋaiyök. Yaŋön Etiopia kantrigö kandasi qingö jembonŋi öngöngöŋi aka ambi kembugö jakömbuak miriŋe moneŋ aka inap yuaini galöm köla malök. Sileŋaŋgö yuaigöra aka Juda azi akŋamgö osiyökmö, töndup Anutugö waikŋi memba möpöseimamgöra Jerusalem sitinöŋ kayök.

²⁸ Kaba miriŋe lilingömamgöra hos karenöŋ öngöiga hosnöŋ örögetka könanöŋ anök. Mianğoreŋ anda kezapqetok azi Aisaiagö buk kötula oyoŋda tarök.

²⁹ Mewö aiga Uŋa Töröŋan Filipköra saŋep ala keu kewö jiyök, “Gi mönö hos kare mianğö qöhöröŋe anda mötöteiba anman.”

³⁰ Uŋa Töröŋan mewö jüiga mianğoreŋök ösumŋan kösutŋe anök. Anda azinöŋ kezapqetok azi Aisaiagö buk mianğö Buŋa keuŋi oyoŋni mörök. Möta kewö qesim waŋgiyök, “Keu oyoŋjani, mi ölop möt asarizan me qahö?”

³¹ Qesim waŋgiiga jiyök, “Kunŋan qahö jim asariiga nanak mi denöwö möt asaribilenak?” Mewö jüiga hos karenöŋ öngöiga mohotŋe tarohot.

³² *Buŋa Kimbi oyoŋnöhi, mi kewö,
 “Azinöŋ lama qem yandibingöra memba waŋgitzei, yaŋön mönö mianğö dop ösöŋ sororöŋgöba ahöyök.

* **8:32:** Ais 53.7-8

Galömñan lama moröñangö jupñi fitanöñ mitiiga qöhöröñe göröñ qeba tim gwiriñi qahö kinjawi, yangö numbuñangö dop mönö qahö waumgöba añañiyök.

³³ Memba et al wañgigetka kunñan keu jakene keuñangö likepñi qahö nañgöba jiiga öne jim teköget. Gölmönöñ malmalñi mewö wañgitket.

Gwölönarökurupñi qahö mewö kömuyök. Mianğöra kunñan qet areñi könañgep qahö oyoñda jima.”

³⁴ Jembonöñ mi oyoñda Filip kewö qesim wañgiyök, “Kezapqetok azinöñ keu mi dagöra jiza? Mi nanñangöra me azi kungöra jiza? Gi ölop mianğö könañi jinöñ mötpi.”

³⁵ Qesim wañgiiga kezapqetok yeñgöreñ Buzup Kimbinöhök könahiba Jisösgö Ölöwak Buña mi könañambuk jim asarii mörök.

³⁶ Mewö eraum möta könanöñ anda o kösutñe añgorohotka qin jembonñan jiyök, “Eknöñ, o töwatñi ki ahöza. Mianğöra gi ölop o melun mem niñgiman. Keu kunöñ añañön köl gihiza me qahö?”

³⁷ (Mewö jiiga Filipnöñ jiyök, “Gi keu jibi mötzani, mi urugi jömuk Anutugöreñ ala möt narizan ewö, mi ölop akñam.” Jiiga keu kewö melenök, “Jisös Kraistnöñ Anutugö Nahönñi akza, nöñön mi möt narizal.”

³⁸ Mewö melenđa jim kutuiga hos kare jöhögetka mohotñañjire oe geba Filipnöñ o melun mem wañgiyök.

³⁹ Mi mem wañgiiga onöhök korohotka Kembugö Uña Töröñan Filip wañgiri öngöba sök aliga qin

jembonnan i kunbuk qahö ehök. Qahö ehökmö, toroqeba sösöngai qakne miri gölmenje Etiopia anök.

⁴⁰ Filipnönj sök ala anda taon qetnji Asdod miangörenj asuhui miwikñaiget. Miangörenjök toroqeba taonni taonni liliköba miangörenj Ölöwak Buña keunönj ambazip urunini kuñguba anda mala Sisaria taonönj kañgorök. Mewö.

9

*Kembunönj Sol asuhum wañgiiga urunji melenjök.
Apo 22.6-16; 26.12-18*

¹ Nalö sutnje miangörenj Solnönj urukönöp qakne kinda uru silenji bölam tepköiga Kembugö gwarekurupnji engum ureim engiba malök. Mewö mala jike nup galöm bohonni yanğörenj anök.

² Yanğörenj anda kewö kuñguba qesiyök, “Köna dölökni wuatangöba maljei, yeñgörenjök tosatñan Damaskus sitinönj köröwen malje. Miangöra nöñön ölöp endu anda jarum engiba kun miwikñaimami, i mönö jöhöba wañgita Jerusalem sitinönj kamam. Damaskus sitinönj Juda neñgö köuluk miri galöm kölakzei, yeñön i anğön köl engibepuköra mönö jimtekötekö kimbi ohoba niñginönga memba anda kondel engimam.” Mewö jii ohoi memba anök.

³ Könanönj anda mala Damaskus siti dopdowimangö aiga yuai kun wölañ kewö asuhuyök: Asakmararañ kun Suepnöhök wölbilik ewö asuhuba eta liliköm wañgiyök.

⁴ Liliköm wañgii tala gölmenönj geba ahöba kou-ruk kun möriga keu kewö jii mörök, “Sol Sol,

gi mönö wuanöngöra sesewerowo qakne al niŋgizan?”

⁵ Mewö jiiga Solnön qesiba jiyök, “Kembu, gi dañön?” Mewö jiiga melenök, “Ni Jisös sesewerowo qakne al niŋgimakzani, ni mönö mi.

⁶ Mi akzalmö, ölop wahöta sitinön anman. Miangöreñ anda wani yuai akñani, kunñan miangö buzupni jii mötman.”

⁷ Azi yambuk köna anda malgeri, yeñön keuñini qahöwahiga tömtömba kinget. Yeñön keu kouruk ölña mötketmö, azi kun qahö eket.

⁸ Keu melenniga Solnön gölmenöhök wahörökmö, jeñi uba yuai kun qahö eka jipjap kinök. Mewö kiniga böröñe memba Damaskus sitinön wañgita anget.

⁹ Angetka wehön karöbut miangö dop jipjap mala o me nene kun qahö nempa öne malök. Mewö.

Ananiasnön Sol o melun mem wañgiyök.

¹⁰ Damaskus sitinön Jisösgö gwarekñi kun qetñi Ananias malök. Kembunön kutum wasoriga imut ehiga “Ananias!” qerök. Qetñi qeriga jiyök, “O Kembu, ni ki maljal.”

¹¹ Mewö jiiga jii mörök, “Gi mönö wahöta köna qetñi Köna Diñdini jimakzei, miangöreñ anman. Miangöreñ anda Judasgö mire öngöba Tarsus azi qetñi Solgöra qesiman. Mötnön, yañön ni köuluköm niñgiba tatza.

¹² Köuluköba tata uruñan imut kun kewö ehök: Azi qetñi Ananiasnön miriñi uruñe kañgota jeñi kunbuk tohomapköra böröñi nöropñe alma.”

13 Kembunöŋ keu mewö jii möta melenök, “O Kambu, ambazip gwötpukŋan azi miangö kösohotŋi lök jiget möral. Yaŋön Jerusalem sitinöŋ göhöreŋ könagesöurup sarakŋi mi gwötpuk engum ureim ak engiba malök.

14 Jike nup galöm bohonŋi yeŋön nam köla kukösum waŋgigetka Damaskus siti kiangöreŋ mewöyök nup miyök memamgöra kayök. Ambazip göhö qetki qeta köulukömakzini, yaŋön mönö nini körek pakpak neŋgömembra jöhöm neŋgimamgö mötza.”

15 Mewö melenökmö, Kembunöŋ jii mörök, “Nöŋön azi mi meköm waŋgibiga qetni bisiba nöngöra bim qeba malma. Mewö mala gölmeŋi gölmeŋi liliköba Buŋani jim sehiiga Israel aka kian kantri ambazipnöŋ mötme. Keu jakeni jakeni miangöreŋ örögetka azi kambu gwötpuk yeŋö jeŋine angota Buŋani jii mötme. Miangöra mönö töndup anöŋ.

16 Yaŋön qetni bisiba miangöra sihimbölo gwötpuk mötma. Nöŋön miangö areŋi kondel waŋgimamgö mötza.”

17 Mewö jii möta Ananiasnöŋ anda miri miangö uruŋe öngöba böröyahötŋi Solgö nöropŋe ala jiyök, “Sol alani, köna namŋe kanöŋga Jisösnöŋ asuhum gihiyöhi, Kambu mianön mönö melaim niŋgiiga kazal. Göhö jegan kunbuk tohoiga Uŋa Töröŋan urugi kokolak qemawaŋgöra jiiga kazal.”

18 Mewö jiiga miangöreŋök yuai sönuetŋambuk tandök mianön jeŋeyök tala et teköi jeŋi tohoyök. Jeŋi tohoiga ui asariiga wahörök. Wahöta jiiga o melun mem waŋgiyök.

¹⁹ O melun mem wan̄giiga nene nemba köhöiyök. Solnön köhöiba gwarek yeŋgö sutñine Damaskus sitinön wehön tosatñi malök. Mewö.

Solnön Damaskus sitinön Buña nup meyök.

²⁰ Mala miangörenök wahöta Juda yeŋgö köuluk miriñi miriñi miangören öngöba Jisösgö könani jim asariba ambazip uruñini kuŋguba kewö jiyök, “Jisösnön mönö Anutugö nahönñi akza.”

²¹ Mewö jii möta körek yeñön auruba welipköba jiget, “Jerusalem sitinön qet mia qet köulukögeri, azi kianön mi eŋgum ureiba malök me qahö? Mewöñanök kiangören kayöhi, mi mönö nini jöhöba neŋguaŋgita jike nup galöm bohonñi yeŋgö böröñine al neŋgimamgöra kayök. Miangöra mönö denöwö letota nanñak Anutugö keu miyök nanöba jiza?”

²² Mewö jigetmö, Anutunön Sol ösum-mumu wan̄gii kunbuk köhöiba malök. Köhöiba mala Juda ambazip Damaskus sitinön malgeri, yeŋgö uruñini kuŋguba kewö jiba malök, “Jisösnön ölna Anutugören Amötqege Tonji Kraist akza.” Keu mi jim köhöiba könani kondela maliga yeñön köñkuñ aka keu mi qeapköbingö osiba malget.

²³ *Silim gwötpuk teköiga miangören Juda yeñön tokoba keu nup memba Sol qeget kömumapkö anöñani alget.

²⁴ Anöñani algetmö, miangö buzupñi mi Solgö kezapñe gei mörök. Solnön Damaskus siti mosötmamgö aiga miangören qeget kömumapköra siti kiripo nanñuñe yanöra sungem asak je galöm memba malget.

* **9:23:** 2 Kor 11.32-33

²⁵ Mewö memba malgetmö, gwarekurupnan sunjem kunöŋ sakap (misak) ketani memba kösönöŋ jöhöba Sol sakapnöŋ ala siti selgö kinimneyök alget geba anök. Mewö.

Solnöŋ Jerusalem kusukŋanök anda malök.

²⁶ Solnöŋ anda Jerusalem sitinöŋ angota Jisösgö gwarekurup yembuk esapköba toroqeyökmö, körek yeŋön Sol gwarek aka malöhi, mi qahö möt narigeranğöra aka yanğöra kenğötŋini mötket.

²⁷ Kenğötŋini mötketmö, azi qetŋi Barnabas yanğön ala ak wanğiba köyan köla wanğita aposol yeŋğöreŋ anda kondela kösohotŋi kewö jim asarim enğiyök, “Sol azi kianğön könanöŋ kaiga Kembunöŋ asuhum wanğii ehiga keuŋi jii mörök aka könanğep Jisösgö qetŋi mi Damaskus sitinöŋ jim asariba köhöikŋanök uru kuŋgum enğiba malök.”

²⁸ Kösohotŋi mewö jim asarim enğiiga yembuk toroqeba Jerusalem siti uruŋe liliköba awösamkakak kinda Kembangö qetŋi aukŋe qeta ambazip urukuŋgukuŋgu köhöikŋi al enğiba malök.

²⁹ Mi al enğiba mala Juda ambazip Grik keu möta malgeri, yembuk eraum möta möndömkösök keu melenqeleŋ ahökmö, yeŋön Sol kapan köla qeget kömumapkö mötket.

³⁰ Mi esapkögetka alaurupnan Sol miwikŋaiba wanğita Sisaria taonöŋ anda kinda melaigetka nanjök toroqeba ahuahu taonŋi qetŋi Tarsus mianğöreŋ anök. Mewö.

Urumelen kambu yeŋön luainöŋ malget.

³¹ Solnöŋ uruŋi melenniga mianğö andöŋe urumelen könagesö pakpak Judia, Galili aka Samaria prowins dop köla malgeri, yeŋön luai

miwikñaigetka Un̄a Töröjan i mem köhöiba nan̄göm en̄giiga malget. Mewö mutulan̄göba Kembugö keun̄ji on̄gitpinbuköra ken̄göt̄n̄ini möta nup megetka urumelen̄ könagesȫn̄inan qarim sehiiga malget. Mewö.

Pitönȫj Lida azi kun mem ölöwahök.

³² Pitönȫj mirin̄ji mirin̄ji liliköba Jisösgö könagesö sarak̄n̄ji en̄geka anda mala nalö kunȫj taon qet̄n̄ji Lida miangȫren̄ an̄gorök.

³³ An̄gota miangȫren̄ azi kun qet̄n̄ji Ainias miwik̄naiyök. Likep̄n̄ji kömukömuñi aiga dumnöhök ahöba mali (yara) yambu 8 teköyök.

³⁴ Pitönȫj i miwik̄ñaiba kewö jiyök, “Ainias, Jisös Kraistnȫj gi mem ölöwak gihiza. Miangöra mönö wahöta tumbulahöpki qezaköman.” Mewö jiiga miangȫren̄ök wahörök.

³⁵ Mewö asuhuiga Lida aka Saron ambazip pakpak yeñön i eka urun̄ini melen̄da Kembugȫren̄ qekötahöget. Mewö.

Pitönȫj Jopa anda Tabita mem guliyök.

³⁶ Jopa taonȫj gwarek ambi kun qet̄n̄ji Tabita malök. (Qet mi Grik keunȫj Dorkas, nanine keunȫj teu, In̄klis keunȫj deer.) Yan̄ön nalö dop nup ölop̄n̄ji ölop̄n̄ji memba kalem sehisehin̄ji menden̄da ambazip etqeqen̄ji bauköm en̄giba malök.

³⁷ Pitönȫj gölme miangȫren̄ mali Tabitanȫj nalö miangȫren̄ kawöl asuhum wan̄gii kömuyök. Kömui qamöt̄n̄ji san̄gon̄da memba miri urun̄ji kunȫj öngöba alget.

³⁸ Lida mi Jopa taon kösut̄ne tarök. Miangöra Pitönȫj Lida malöhi, gwarek yeñön mi möta azi yahöt melaim etikigetka anda Pitö kewö qesim

wanġiyohot, “Gi mönö zilaŋ kanöŋga netpuk Jopa taonöŋ anbin.”

³⁹ Qesim wanġiyohotka mianġörenöŋ amqeba yetpuk anget. Anda anġotketka qamöt miri uruŋe ahöyöhanġören wanġita öŋgöget. Öŋgögetka ambi malö pakpak Pitö liliköba sahöta Dorkasnöŋ yembuk mala opo maluku uhum memba enġiyöhi, mi kondel wanġiget.

⁴⁰ Kondel wanġigetmö, Pitönöŋ jii körek yeŋön gem tekögetka simin köla köuluköyök. Köuluköm teköba qamöt mesohol köla kewö jiyök, “Tabita, mönö wahötnöŋ.” Mewö jiiga jeŋi uba Pitö eka wahöta tarök.

⁴¹ Tariga Pitönöŋ böröŋe memba kököbihiiga wahöta kinök. Kiniga urumelen alaurupŋi aka ambi malö enġoholi öŋgöget. Öŋgögetka kömupnöhök guliba wahöröhi, ambi mi jemesoholŋine ali eket.

⁴² Mianġö keu buzupŋi mi Jopa uruŋe miri dop ani möta ambazip gwötpukŋan könahiba Kembu möt narim wanġiget.

⁴³ Pitönöŋ Jopa mianġören sömaŋi tosatŋi toroqeba mala Saimongö mire tata ahöyök. Azi mi köna esu memegöra bulmakau silenji urasiba saŋoŋda möhangöba malök. Mewö.

10

Korniliusnöŋ Pitö ohola uruŋi melesenök.

¹ Taon qetŋi Sisaria mianġören suahö galöm kiannji kun qetŋi Kornilius malök. Yaŋön yarö kambu bahöŋi kun qetŋi “Italigö yarö kambu”

qetkeri, miangören yarö azi 100 yengö galömnina malök.

² Yanön saiwaurupni pakpak yembuk Anutu göda qeba waikni memba möpöseiba malget. Mewö malgetka Juda ambazip wanapni yengöra kalem sehisehni engiba Anutu qösösök (qörörök) köuluköba malök.

³ Mare kunöŋ 3 kilok miangö dop aiga Kembunöŋ Kornilius kutum wasöriga imut kun ehök. Imut törörök eka miangören Anutugören garata kunjan miriŋe öngöi ehök. Garata miangön öngöba “Kornilius!” jiba qetni qerök.

⁴ Mewö qeriga garata ehiba sömbuŋi möta jiyök, “Ketanamni, wanigöra ki kazan?” Mewö juiga melenök, “Gi köuluköba malnönga keugi Anutugören öngöiga möri ölöwakza. Gi ambazip wanapni kalemni kalemni menden engimakzani, mi Anutunöŋ möta anğön köla göhöra mötmöriba melaim niŋgiiga kazal.

⁵ Miangöra mönö dölki kolek alnönga Jopa taonöŋ aniga azi qetni Saimon, qetni kun Pitö qetzei, ia wangita kame.

⁶ Yanön sömbup silenangö nup meme azi qetni Saimon yangö mire köwet jitŋe miangören malja.”

⁷ Suep garatanöŋ Korniliusgöra keu mewö jibagun mosöta anök. Mosöta aniga welenqeqeni yahöt etkoholi kayohot. Kayohotka yarö azi kun kösutŋeyök kapan köla Anutu göda qeba malohori, i mewöyök oholi kayök.

⁸ Kagetka garatagören keu mi körek jii mötketka melaim enġii Jopa taonöŋ anget. Mewö.

Kembunöŋ Pitö kutum wasöriga imut ehök.

⁹ Azi yeñon könanon angetka miri gianii taon dopdowigetka silim bibine miangören Pitönön miri urunji kun eu miangören öngöba kinda köuluköyök.

¹⁰ Kinda köuluköba nenegö kömumba yuai nemangö möta jii ohoget. Ohogetka nalö miangören Kembugö alburupnan qeiga tata imut kun kewö ehök:

¹¹ Suepnön ananjiiga könde ketanji kun erök. Könde mi opo tuatnji ketanangö tandök ewö ahök. Garata yeñon yuai miangö wangömni 4 miangören memba nangöbeak, miangö tandök ewö gölmenon erök.

¹² Yuai miangö urune sömbup könanji könanji tatket. Sömbup tosatnan köna 4:nan tiba anakze. Tosatnan wösönon ölölongöba anakze. Mewöyök neiñi neiñi könakemba bölbölgöba anakzei, yuai mewöñi mewöñi mi könde miangö urune mohotne etket.

¹³ Etketka miangören qet kun asuhuba keu kewö jii mörök, “Pitö, gi mönö wahöta yuai ki qeba ohoba nenon.”

¹⁴ Mewö jii mörökmö, Pitönön jiyök, “O Kembu, mewö qahö kötökni! Mi dönqizinambuk. Ni nalö kunon yuai angjööraknambuk mi kude neal. Ni miangöra imbilonlon mötzal.”

¹⁵ Mewö jiiga qet mianon kunbuk asuhuba yangöra jiyök, “Anutunon yuai jim könjörari ahözawi, göñon miangö qetnji angjööraknambuk mewö qetnonga qahö dop kölja.”

¹⁶ Yuai mewöñi mi kunbuk asuhui indimni karöbut ahök. Indimni karöbut aiga miangörenök könde mi kunbuk örögetka Suepnön öngöyök.

17 Pitönön imut mi eka miangö könañgöra köñkuñ aka mötmangö möt bibihiba tarök. Mewö tariga nalö miangörenök Korniliusnön azi melaim engii kaba Saimongö miri jaruba miangöra qequesi aka miwikñaiba kañgota miri nañguñe kinget.

18 Miri nañguñe kinda kewö qeta qesiget, “Saimon qetñi alañi Pitö qetzei, yañön miri kiangören malja me qahö?”

19 Pitönön toroqeba imut miangö könañgöra möt bibihiba tariga Uña Töröñan kewö jii mörök, “Mötnön, azi karöbutñan kaba gi jarum gihize.

20 Nönön azi mi melaim engibiga ki kaze. Miangöra mönö dölki wahöta geba uruyahöt mosöta yembuk anman.”

21 Mewö jiiga Pitönön azi miengören geba jiyök, “Mötket, inini azi jaruzei, nönön mia akzal. Mönö denöwögöra kaze?”

22 Jiiga melenget, “Suahö galöm Kornilius mi azi diñdiñi akza. Yañön Anutu waikñi memba möpöseiba mali Juda ambazip kambu körek yeñön göda öngöngöñi qem wañgimakze. Anutugö garata töröñi kunñan asuhum wañgiba kewö jim kutui mörök, ‘Gi mönö kolek ala Pitö köl öröm wañginönga mirige öngöba keu uruñeyök jimawi, mi kezap ala mötman.’”

23 Mewö melengetka öröm engii miri uruñe öngögetka köyan köl engii köisirik tata ahöget. Ahögetka miri gianjiiga Pitönön wahöta yembuk anök. Jopa taon miangörenök ala tosatñi engömeiga yambuk mohotñe anget. Mewö.

Pitönön kian ambazip yembuk tokoget.

24 Mohotņe anda sömaņi mohot ahöba anda mala Sisaria taonöņ angotket. Angotketka Korniliusnöņ yengö mamböt aka malök. Mewö mala tini-tosolom aka alaurupņi ölöņņi mi köl öröm enģii miriņe tokoba tatket.

25 Anģota Pitönöņ mire öngömamģö aiga Korniliusnöņ wahöta eta jölöņi jiba kōnaņe geba sipkōm waņģiyök.

26 Sipkōm waņģiyökmö, Pitönöņ böröņe memba kökōbihiiga wahöri kewö jiyök, “Mönö wahötnöņ, nia kun gölme aziyök akzal.”

27 Mewö jii yambuk eraum möta miri uruņe öngöyohotka ambazip gwötpukņan tokoba tatkeri, mi enģehök.

28 Enģeka kewö jii mötket, “Inini Juda ambazip nenģö kōnaņamnini mötze. Juda nini ambazip kiannı enģö mire öngöba embuk köisirik tatatkö songo ahöi osizin. Mi osizinmö, Anutunöņ keuņi kun kondel niņģiba kewö jiyök, ‘Göņön ambazip inı waiņi yengö qetņini mi anģöjörak imbilonļonambuk mewö kude qetman.’

29 Mianģöra inini kolek ala köl öröm niņģigetka nönön qahö qetala kaba kaņgotzal. Kaņgota kewö qesizal: Inini mönö wuanöņģöra kolek ala köl öröm niņģiget? Mi ölöp jiget mötpi.”

30 Mewö jiiga Korniliusnöņ melenök, “Ni mare kunöņ nalö kewöņe 3 kilok mianģöreņ mirine tata köuluk nup memba mala kotpi merak sömaņi 4 akza. Köuluk nup memba malbiga mianģöreņök azi kun sileötaņi asakmararaņambuk mianön asuħba wösöne kinök.

31 “Wösöne kinda kewö jiyök, ‘Kornilius, gi köuluköba malnönģa keugi Anutugöreņ öngöiga

möri ölöwakza. Gi kalemñi kalemñi ambazip wanapñi menden enjimakzani, mi Anutunöñ möta anğön köla göhöra mötmöriba melaim niñgiiga kazal.

³² Mianğöra mönö dölki kolek alnöñga Jopa taonöñ aniga azi qetñi Saimon, qetñi kun Pitö qet-zei, ia wañgita kame. Yañön sömbup silenangö nup meme azi Saimon yañgö mire köwet jitñe malja.’

³³ “Mewö jiyöhanğöra aka nöñön mianğöreñök kolek albiga göhöreñ kaget. Göñön keuni möta kazañgöra uruni ölöwakza. Kembunöñ keu pakkapak jimangö jim kutum gihiyöhi, göñön mi ölop jinöñ mötpin. Nini pakkapak dölki mianğöra tokoba Anutugö jemesoholñe ki tatzin.” Mewö.

Pitönöñ Korniliusgö mire Buña keu jiyök.

³⁴ *Korniliusnöñ mewö jiiga Pitönöñ könahiba kewö jiyök, “Aha! Anutunöñ ambazip tosatñi qahö engek soriba tosatñi qahö qepureim enjimakzapmö, dop mohotnöñ kewöt neñjimakza. Yañgö jeñe kunñan anğöjörakñambuk qahö akza. Nöñön mi dölki ölña möt kutuzal.

³⁵ “Mewö qahöpmö, ambazip kambuñi kambuñi körek yeñgö sutñine denike yeñgöreñök kunñan Anutu waikñi memba möpöseiba aiakanan köna diñdiñi wuatangözawi, yañön mönö Anutugö jeñe dop kölja.

³⁶ Jisös Kraistnöñ ambazip körek neñgö Kembuya aka luai qem neñjimakzawi, Anutunöñ Buña keuñi mi Israel könagesö neñgöreñ ali kayök. Buña mianñön kaiga nini mianğö Ölöwak Buñañi jim asariba maljin.

* **10:34:** Dut 10.17

³⁷ Jonöŋ ambazip uruŋini kuŋguba kewö jiyök, ‘Inini mönö uruŋini melengetka nöŋön o melun mem enġimam.’ Mewö juiga mianġö andöŋe keu mi Galili prowinsnöŋ könaħiba jiget seħiba anda Judia prowinsnöŋ aŋgota körek dop kölöċ. Inini mi löċ mötze.

³⁸ “Anutunöŋ Uŋa Töröŋi Nazaret azi Jisösgö uruŋe mokoiga kukösum buŋa qem aŋguba gölme dop liliköba malöhi, mi yambuk kiniga anda ambazip ak kömum enġiyök. Bölöŋaŋgö Toŋan ambazip ösumŋan jöhöba öröm enġii gegeri, yaŋön mi pakpak mem ölöwak enġim teköyök.

³⁹ Yuai mi Juda neŋgö gölmenöŋ aka Jerusalem sitinöŋ aka memba maliga ip kemaŋe ala qeget kömuyök. Nini mi pakpak eka naŋgöba jiba danġunuŋi aka kinjin.

⁴⁰ Kömumba aħöi sömaŋi karöbut aiga Anutunöŋ mem gulii wahörök. Wahöta indimŋi gwötpuk ambazip asuhum enġiyök.

⁴¹ “Yaŋön ambazip kambu pakpak yeŋgöra qahö asuhuyökmö, Anutunöŋ mutuhök nini möwölöhöm neŋgiiga Jisösnöŋ kömupnöħök wahöta malöhi, nalö mianġöreŋ yambuk keu eraum möta nene aŋgum nem malini, mönö neŋgöra asuhuiga nini mianġö keuŋi naŋgöba jiba kinjin.

⁴² Mewö kininga Jisösnöŋ kewö jim kutum neŋgiyök, ‘Anutunöŋ kuŋgum niŋgiiga nöŋön ambazip maljei aka kömugeri, yeŋgöreŋ jimtekötekö Toŋina akzal. Mianġöra eŋön mönö nöŋgö könaŋamni mi ambazip kambu dop yeŋgöra naŋgöba jim asariba malme.’

⁴³ Ambazip denike yeŋön Jisös möt narim waŋgiba qetŋi qerakzei, Anutunöŋ mönö qet mi

möta yengö singisöndokñini mosöta sanjonmakza. Yangö könajamñi mewö ahözawi, mi kezapqetok ambazip körek yenön nanjöba jim asariba ohoget ahöza.” Mewö

Uña Töröñan kian ambazip yengören erök.

⁴⁴ Pitönöñ keu mewö jibayök kiniga Uña Töröñan ambazip kezap ala mötkeri, yengö uruñine geyök.

⁴⁵ Anutunöñ Uña Töröñ kalemñi mi kian ambazip yengö uruñine mewöyök mokoï geyöhi, mi Pitögö alaurupñan eka auruget. Juda ambazip silenine Anutugö aiwesökñi yandigetka uruñini melenja Jisös möt nariba Pitö wuatangöba kaba tatkeri, mienön mönö auruba kewögöra welipköget:

⁴⁶ Yenön kantri tosatñi yengö keuñini murutñi murutñi könahiba jiba Anutu möpöseiget. Miangöra welipkögetka Pitönöñ kewö qesiba jiyök,

⁴⁷ “Yenön Uña Töröñi mi neñön ahin ewö anğön köla buña qem anğuzei, mi mötzin. Miangöra i ölop o melun mem enğiinga dop kölma. Mi ahinga danön qetal nenjibawak?”

⁴⁸ Mewö jiba jim kutum enğiiga Pitögö alaurupñan kindä Jisös Kraistkö qetne Kornilius saiwaurupñi o melun mem enğiget. O melun mem enğigetka Pitö anğön köl wangigetka toroqeba silim tosatñi yembuk malök. Mewö.

11

Pitönöñ Jerusalem anda nupñangö kösohotñi jiyök.

¹ Kian kantri yenön mewöyök Anutugören keu memba anğön kölgeri, miangö buzupñi mi aposol

aka urumelenj alaurup Judia prowins dop köla mala mötket.

² Mianğöra Pitönöj Jerusalem sitinöj lilingöba öngöiga Juda silenjine Anutugö aiwesök yandigetka urunjini melenjeri, yenön jijiwilit (jelikit) aka jim wangiget.

³ Jim wangiba kewö jiget, “Kian kantri azi Anutugö aiwesökpuk qahö maljei, gi mönö wuanöngöra anda yembuk köisirik tata nene nenöj? Mi qahö dop kölja.”

⁴ Mewö jigetka könakönahineyök könahiba yuai asuhuyöhi, mi körek pakpak arenambuk jim asarim engiba kewö jiyök,

⁵ “Nönön Jopa sitinöj mala köuluköbiga Kembugö alburupnan nunguiga tata imut kun kewö ehal: Suepnöj ananjiga könde ketanji kun erök. Könde mi opo tuatnji ketanangö tandök ewö ahök. Garata yenön yuai mianğö wangömni 4 mianğorenj memba nanğöbeak, mianğö tandök ewö nönğö kösutneyök eta ahöyök.

⁶ Eta ahöiga yuai mianğö uruje törörök ekiga sömbup könanji könanji mianğorenj tatket. Sömbup tosatnji mi gölmenöj köna 4:nan tiba anakze. Tosatnji kalnji könöpñinambuk akze. Tosatnan wösöjninan ölölongöba anakze. Mewöyök nei könanji könanji könakemba bölbölgöba anakzei, yuai mewö mi könde mianğö uruje mohotnje etketka engehal.

⁷ Engekiga qet kun mewöyök asuhuba kewö jii möral, ‘Pitö, mönö wahöta yuai ki qeba ohoba nenöj.’

⁸ “Mewö möralmö, nönön kewö jial, ‘O Kembu, ni mianğöra imbilonlonj mötzal. Yuai dönqizin anğöjörakñambuk mewöni mi nalö kungen nönğö

numbunan qahö oseiyök. Mianğöra mi mönö qahö kötökñi nemam.’

⁹ Mewö jibiga qet mianjön kunbuk Suepnöhök asuhuba kewö jiyök, ‘Anutunön yuai jim könjörari ahözawi, gönön mianğö qetñi anğöjörakñambuk mewö kude qetman.’

¹⁰ Yuai mewöñi mi indimñi karöbut asuhuyök. Mewö asuhuiga yuai pakpak mi kunbuk örögetka Suepnön lilingöba öngöyök.

¹¹ Öngöba atatop (jیاتاتون) köliga nalö mianğörenök Korniliusnön Sisaria taonöhök azi karöbut melaim enğii nönğören kageri, yeñön miri tarini, mianğö nanğune kinget.

¹² “Nanğune kingetka Uñanön kewö jim kutum niñgii möral, ‘Gi mönö uruyahöt yaköriba yembuk anman.’ Keu mi mötpiga urumelen alaurupni 6 yeñön mewöyök Jopa mosöta nömbuk Sisaria taonön anin. Sisaria anğota suahö galöm mianğö mire öngöin.

¹³ Öngöinga keu kösohot kewö ak nenğiyök, ‘Garata kunğan nönğö mire asuhuiga ekiga kinda kewö jii möral: Gi mönö Jopa mire kolek ala azi qetñi Saimon, qetñi kun Pitö i wañgita kaget.

¹⁴ Yanön kaiga Buña keu jiiga gi aka saiwaurupkan mi möt nariba uruñini melengetka körek amöt qem enğiiga letotme.’

¹⁵ “Kösohot mi ak nenğiiga nönön könahiba Buña keu jial. Mi jibi mötketka Uña Töröñan könakönahine nenğö urunine geyöhi, mönö mianğö dop kezap ala mötketka yeñğö uruñine mohot geyök.

¹⁶ *Yanön geiga ekiga mianğörenök Kembugö

* **11:16:** Apo 1.5

keu kun nöngö mötmötnöŋ kaŋgori mötmörial. Keu mi kewö, 'Jonöŋ o töhönöŋ melun mem enŋiyökmö, nöŋön Uŋa Töröŋi uruŋine ala mianŋön melun mem enŋimam.'

¹⁷ Neŋön Kambu Jisös Kraist möt narim waŋgiinga Anutunöŋ kalemŋi neŋiyöhi aka yeŋön möt narigetka Anutunöŋ kalemŋi miyök enŋö uruŋine mewöyök alök. Mianŋöra aka ni ewöŋan mönö denöwö Anutu kukösum Tonŋi esapköba qetal waŋgibileŋak? Yaŋön mewö ak enŋiiga nöŋön aŋgön köl waŋgimamgö osial."

¹⁸ Pitönöŋ kösohotŋi mewö jii möta uruŋini amörii böŋjöŋ aiga Anutu möpöseiba kewö jiget, "Ölŋa, nini urunini melenŋa malmal köhöikŋaŋgö buŋaya akzin mötzinmö, Anutunöŋ köna mohot mi kian kantri ambazip yeŋgöra mewöyök al enŋii ahöza. Mi mönö dölki asariba möt kutuzin." Mewö.

Kian kantrinöŋ urumelenŋ kambu mutukŋi asuhuyök.

¹⁹ *Stiwen qeget kömuyöhaŋgöra aka kahasililinŋ asuhuiga urumelenŋ ambazipnöŋ denŋa liliköba anda kaget. Anda kagetka tosatŋan köwet jitŋe Fonisia gölmenöŋ anget. Tosatŋan köwet kutuba gölme jölanŋi qetŋi Saiprus mianŋöreŋ anget. Tosatŋan Siria prowinsgö sitiŋi qetŋi Antiokia anget. Mewö denŋa angetmö, ambazip sutŋine Jisösgö Buŋa keu mi Juda ambazip yeŋgörök jigetka mötket. Kian kantri yeŋgöra mi qahö jiget.

²⁰ Qahö jigetmö, Saiprus aka Sairini azi tosatŋan yeŋgö sutŋine malget. Yeŋön kian gölmenöŋ qariba

* **11:19:** Apo 8.1-4

Antiokia sitinöŋ kaŋgota gölme tonji yembuk Grik keunöŋ eraum möta Kembu Jisösgö Ölöwak Buŋa mi mewö Juda qahö yeŋgöra mewöyök jim asarim enŋiget.

²¹ Mi jim asarim enŋigetka Kembunöŋ yembuk mali ösumŋan ambazip uruŋini kuŋgum enŋii gwötpuk yeŋön Kembu Jisös möt nariba uruŋini melenŋa yaŋgöreŋ qekötahögetka kambuŋini qariga ketanji ahök.

²² Mewö aiga mianŋö buzupŋan anda Jerusalem könagesö yeŋgö kezapŋine gei mötket. Mi möta Barnabas melaigetka Antiokia sitinöŋ anök.

²³ Anda aŋgota Anutunöŋ kalem möriamŋi ambazip enŋii ölöwakeri, mi jeŋan eka möri öngöi söŋgaiba qambaŋi kewö jiyök, “Injini mönö körek pakpak uruŋini qezaköba köhöiba Kembubuk qekötahöba kinme.”

²⁴ Barnabasnöŋ azi ölöpŋi aiga Uŋa Töröŋan uruŋi kokolak qeiga uruyahöt andö qeba uruŋi jömuk mianön Jisös möt narim waŋgiba malök. Mianŋöra ambazip gwötpukŋan uruŋini melenŋa Kembangö kambunöŋ toroqegetka qariyök.

²⁵ Barnabasnöŋ Antiokia mosöta Sol jarumangöra Tarsus taonöŋ anök.

²⁶ Anda miwikŋaiba waŋgiri Antiokia sitinöŋ kayohot. Kaba mianŋöreŋ mohotŋamŋire (yara) yambu mohot jömukŋanök mala zioz nup memba uruŋini melenŋeri, mi kambuŋi kambuŋi köla kusum enŋiyohotka ambazip gwötpukŋan mötmöt memba urukönömŋine alget. Antiokia ambazipnöŋ mutukŋi könahiba gwarek qetŋini Kraistkö alaurup (kristen, Kraistkö buŋa) qeta

malget. Mewö.

Kian kantrigö urumelen yeñon Juda nanğöm enğiget.

²⁷ Nalö miangören kezapqetok ambazip tosatñan Jerusalem mosöta Antiokia sitinöñ eta kañgotket.

²⁸ *Yeñgörenök kun qetñi Agabus mi wahöta Uña Töröñan sölölöhöi buzup keu kewö jii mötket, “Bödi ketañan asuhuba gölmenji gölmenji dop köla ahöma.” Mewö jiiga miangö dop sisa kiñ qetñi Klodius yangö galömkölköl nalöñe asuhuyök.

²⁹ Mi asuhuiga gwarek yeñon mindiriba urumelen alaurupñini Judia prowinsnöñ malgeri, mi nanğöm enğiba mindimindiri naluk ketañi alget anmapkö keu jöhöget.

³⁰ Keu mi jöhöget aka miangö dop ölña aket. Yeñon moneñ aka yuai tokoba Barnabas Sol yetkö böröñire ala melaim etkigetka Jerusalem anda urumelen könagesö yeñgö jitñememeurupñini enğeka enğiyohot. Mewö.

12

Herodnöñ Jeims qeba Pitö kösö mire alök.

¹ Nalö miangören kiñ Herodnöñ* urumelen könagesö sesewerowero mem enğibingö möta jiiga urumelen ambazip tosatñi enğimemba jöhöm enğiget.

² Kiñnöñ jiiga Jongö datñi Jeims mi bingö sou ketañan qegetka kömuyök.

* **11:28:** Apo 21.10 * **12:1:** Kiñ Herod Agripa I (mutukñi) yanñon (yara) yambu 37-44 miangören Palestain pakpak galöm köl enğiba malök.

³ Mewö jii kömuiga Juda ambazip tosatñan mi mötket ölöwahiga ehök. Mi eka mianğöra toroqeba jiiga Pitö mewöyök memba jöhöget. Yuai mi beret yistñi qahöpkö kendon nalöñe jiiga asuhuyök.

⁴ *Mianğöra kiñnön kewö jiyök, “Nöhön ak-kömukömu kendon† teköiga Juda yeñgö keu jakeñe alman.” Mewö jiba jii kösö mire alget. Algetka yarö azi 16 yeñön sutñine kambu 4 köla nalö utekutek aketka azi 4:ñan sundan suñgem asak kinda galöm mem wañgiba malget.

⁵ Pitö mewö galöm mem wañgiba malgetka kösö mire ahöyökmö, urumelen könagesö yeñön sundan dop wañğöra aka Anutu kapañ köla köuluköba malget. Mewö.

Suep garatanöñ Pitö pösata wañgita erök.

⁶ Köuluköba malgetka ak-kömukömu (Pasowa) kendon teköiga suñgem mianğöreñ yarö azi yahötnan Pitö tapep (muñgamuñga) yahötnön jöhöm köhöiyohotka sutñire gaun ahöyök aka wahibuk tosatñan nanju andöñe kinda kösö miri galöm meget. Kiñ Herodnön miri gianjiiga Pitö wañgita keu jakeñe almamgö mötmöriba aren ali gaun ahöget.

⁷ Gaun ahögetmö, Kembugö garata kunñan wölañ asuhaba Pitö qöhöröñe kini kösö mirigö uruñi asarim teköi Pitögö nambulñe qeba jiyök, “Mönö zilañ wahötnön.” Mewö jii tapep

* **12:4:** Eks 12.1-27 † **12:4:** Pasowa nanine keunöñ qetñi alañi mi walöñsörak aka goukölköl. Israel ambazip yeñön Ijipt mala nanjuñi sepnön mirigetka Anutugö garatanöñ neñgehoriña neñgoñgita morö mutukñi qahö enğui kömuget.

(munğamunğa) yahötñan mianğörençök Pitögö böröñeyök öne sulohot.

⁸ Sulohotka garatanöñ jii mörök, “Mönö opogi jöhöba köna esugi utnöñ.” Mi möta mewö ahök. Mi aiga toroqeba jii mörök, “Mönö malukugi kölnöñ geiga ni nuatanğöba kaman.”

⁹ Mewö jii möta miri uruñi mosöta wuatangöyök. I wuatangöba anökmö, garatanöñ yuai ahöhi, mi ölna asuhuyök me qahö, yañön mianğöra möri janjuñ ahök. Yañön gaun ahöba imut ehöhi, mianğö tandöktandök möri ahök.

¹⁰ Miri uruñi mosöta nanğu mutukñe galöm memba kinohori, mi etkonğita nanğu kunöñ anğota etkonğita öne kutuba anda kösö miri silenangö ain kiripone anğorohot. Anğorohotka nanğu köhöikñi ketañi mianñön mönö nanñök öne taliga yaigepñe siti köna numbunje geyohot. Geba köna namñi strit kun toroqeba anohotka garatanöñ wölañ Pitö mosöta sök alök.

¹¹ Sök aliga Pitögö uruñi tohoiga kewö jiyök, “O Kembunöñ mönö garatañi melaii kaba Herodgö böröñeyök meköm niñgiza, mi mötzal. Juda ambazipnöñ nönğö silene yuai asuhumapköra mambötzei, yañön mönö yuai pakpak mianğörençök bohoni jöhöza. Nönñön dölki mi ölna möt kutuzal.”

¹² Mewö möt kutui asariiga Jongö namñi Mariagö mirinöñ göröken anök. Jon mianğö qetñi kun Mak qetket. Miri mianğöreñ ambazip gwötpukñan tokoba Anutu köuluköba malget.

¹³ Mewö malgetka Pitönöñ kaba söndaknöñ kinda nanğunöñ qeyök. Nanğunöñ qeiga

welengeqe ambi qetnji Roda yañön kaba “Gi dañön?” jiba qesiyök.

¹⁴ Qesiba kinda Pitögö jölñi möt kutuba “I-ia kazan!” jiba söngaiba luhuba nañgu qahö öröba ösumñan miri uruñe öngöba jiyök, “Pitönöñ kaba nañgunöñ kinja.”

¹⁵ Jii möta yañgöra “Urugi sohoi jizan,” jiget. Jigetmö, yañön bohon köla “Keu ölña jizal!” jiyök. Mewö jiiga jiget, “Mi mönö Pitögö garatañan kinja.”

¹⁶ Mewö eraum mötketmö, Pitönöñ nañgu qe-bayök kiniga öröba eka auruget.

¹⁷ Aurugetka böröñan söpsöp ala ölöñ almegö jiyök. Jiba Kembunöñ kösö mireyök wañgiri yaigepñe eröhi, kösohot mi jiyök, “Inini buzup ki mönö bisop Jeims aka urumelenñ alaurup tosatñi yengöra jigetka mötme.” Mewö jiba engömosöta miri kungen anök. Mewö.

Pitönöñ kösö miri mosöriğa Herodgö irimñi seholyök.

¹⁸ Miri gianjiiga yarö azi yeqön Pitö jaruba “Denike sömuniba sök ala anja?” jiba miangöra kahasililinñ aka waimañjat ketañi mötket.‡

¹⁹ Herodnöñ mewöyök Pitö miwikñaimegö jii jarum bibihiba qahö miwikñaigetka azi wahibuk Pitögö galöm megeri, mi keu jakene ala gwötpuk qesim engiba jim teköba enguanğita enguget kömumegö jim kutum engiyök. Miangö

‡ **12:18:** Kösö azinöñ ölöñ kölbawak, azi wahibuk mi mönö engugetka kömuzema. Rom gawman nupkö areñi mewö. Miangöra kahasililinñ aka waimañjat ketañi mötket.

andöŋe Judia prowins mosöta Sisaria taonöŋ geba mianğöreŋ malök. Mewö.

Anutunöŋ kiŋ Herod kitipŋi waŋgii kömuyök.

²⁰ Fonisia prowinsgö taon qetŋiri Taiö aka Saidon yeŋön nenegö nupŋini memingö osiba kiŋ Herodkö kantri yeŋğöreŋök nene yuainŋini bohonŋi memba malget. Mewö malgetka Herodkö irimŋi seholiiga Taiö Saidon kerök ak eŋgiba nene eŋgimegö soŋgo alök. Mianğöra yeŋön mindiriba jitmemeurupŋini melaim eŋgigetka kambu köla kiŋ Herod ekingöra anget. Angetka jembonŋi qetŋi Blastus jakömbuak miriŋaŋgö galömnan i mutuk eŋgehök. Eŋgehiga jiget, “Nini keu jim solaninga luai ahumapkö qesibingöra kazin.” Mewö jiba jim mölöwörim ak waŋgigetka jiyök, “Ölöp keuŋini kötöngöba andöŋine kinmam.”

²¹ Mewö jiiga kiŋnöŋ keu melen eŋgimangö nalö mem eŋgiiga mianğöreŋ tokogetka nanŋi silenŋi meŋölöba kiŋ azi kembugö malukuŋi köla eta jakömbuak dum tatatŋe tata yeŋğöra sösöŋgai keu jiyök.

²² Jiiga ambazip kambu yeŋön möta kewö jiba qetket, “Keu mi Anutugöreŋ keuya. Mi gölme azigö keuya qahö.”

²³ Mewö qetketmö, kiŋnöŋ mewö aka Anutugö qetbuŋaŋi qaŋ köla qahö möpöseiba nanŋi möri öŋgöyök. Mianğöra Kembugöreŋ Suep garata kunnan mianğöreŋök qei döhnöŋ yöhösii kömuyök.

²⁴ Mewö asuhuyökmö, Anutugöreŋ Buŋa keu mi jiba malgetka töhötmöriamŋambuk aka sehiyök.

25 Antiokia siti yeñon Barnabas aka Sol nangönanğö misin nup kun§ etkigeri, yetkön mi Jerusalem mala meköyohot teköyök. Mi teköiga Jon qetñi kun Mak qetkeri, i wañgita mohotñe Jerusalem mosöta Antiokia sitinöñ lilingöba kaget. Mewö.

13

Barnabas Sol yetkön misin nupkö könahiba anohot.

¹ Antiokia sitinöñ tosatñan uruñini melenđa urumelen könagesö aketka jitñememenini kewöñan kezapqetok keu jiba kusum engiba malget: Qetñini Barnabas aka Simeon qetñi kun Injañi (Grik ke-unöñ Naijö) aka Lusius (Sairini gölmegöra), Man-ain (mi kembu gawönö Herod* yambuk öröröñ mala qariyohot) aka Sol.

² Urumelen könagesö yeñon Kembugö waikñi memba möpöseiba nene siñgi malgetka miangöreñ Uña Töröñan kewö jiyök, “Nöñon Barnabas aka Sol nup qainñi kun memahotköra etkoholal. Miangöra enñon mönö i jim teköba melaim etkigetka anmahot.”

³ Mewö jiiga köulukömegöra nene siñgi mala böröñini nöroññire algetka Kembugö ösumñan etkualöñniga melaim etkigetka anohot. Mewö.

Saiprus gölme jölanñe anda nup meget.

§ 12:25: Antiokia yeñgöreñ nangönanğö monen mi memba anda Jerusalem urumelen könagesögö jitñememeurup yeñgö böröñine alohot. Miangöra qetñi nangönanğö misin nup kun jizin. Apo 11.30 * 13:1: Herod Antipas yañon (yara) yambu 4 B.K.-39 A.D. miangöreñ Galili aka Perea prowins yahöt mi galöm köl engiba malök.

4 Uña Töröñan mewö melaim etkiiga miri qetnji Selusia miangören geyohot. Miangören geba wañgenöñ öngöyohotka opo seri öröba möröreñgögetka luhutnön nañgöi anda gölme jölanñi Saiprus miangö wehön kotkotñe añgotket.

5 Añgotketka siti qetnji Salamis miangören anda Juda ambazip yeñgö köuluk mirinji mirinji miangören öngöba Anutugö Buña keu jiba uru kuñgum eñgiyohot. Azi qetnji Jon i mewöyök wañgirohokka yetpuk anda kaba alabaukñira malök.

6 Mewö mala gölme jölanñi jömukñi liliköba kutuba likepñe wehön gegene Pafos sitinön añgotket. Miangören añgota Juda azi qetnji Barjisös miwikñaiget. Yañön suña jinañ azia aka kezapqetok azi takapulakanji malök.

7 Suña azi mi gölme jölanñi miangö kiapñi qetnji Sergius Pol yañgö mire tata malök. Kiap mianön mötkutukutu azia malök. Mewö mala Anutugören Buña keu mötmangö sihimñi ahöiga Barnabas Sol köl öröm etkii yañgören kayohot.

8 Kayohotmö, Elimas, (suña memegöra qetnji Grik keunön mewö jimalgeri,) yañön kiapnön Anutu möt narim wañgibapuköra tuarenjon ak etkiba kiap uruñi keunön eñololon memangö esapköyök.

9 Esapköiga Sol, qetnji alañi Pol qetkeri, Uña Töröñan yañgö uruñi kokolak qei Elimas törörök ek kutuyök.

10 Ek kutuba kewö jiyök, “Yei! Timbiqimbilim azi gi mönö Bölöñi Toñangö moröya akzan! Satanön urugi isimkakaleknön kokolak qeiga silenön alal könañi könañi aka malakzan. Keu

diŋdiŋi pakpakö kerökŋi aka Kembugören köna diŋdiŋi möwöramgönöŋga goŋgimakzawi, mi mönö mosötman me?

¹¹ Mianğöra mötnöŋ! Kembunöŋ mönö böröŋi qake aliga ösumŋan turum gihiiga jegi gömölii wehön asakŋi ekŋamgö osiman. Yaŋön nalö meyöhaŋgö dop mönö janjuŋ aka malman.” Jii mianğörenök söŋaupnöŋ qakŋe eta turui ömuŋ köla jipjap aka ilinğösöŋ anda kaba böröŋe memegö qesiba böröŋan mezaŋqezaŋ ahök.

¹² Yuai mi asuhuiga kiapnöŋ mi eka Kembugö Buŋa keu mötmötŋaŋğöra welipköba möt narim waŋgiyök. Mewö.

Pisidiagö Antiokia taonöŋ misin nup meget.

¹³ Polnöŋ neŋakurupŋi yembuk Pafos miri mosöta waŋgenöŋ öngögetka opo seri öröba mörörenğögetka luhutnöŋ naŋğöiga anda mala Pamfilia prowinsgö siti qetŋi Perga mianğören aŋgotket. Mianğören aŋgota kinda Jonöŋ etkömosöta eleŋda Jerusalem sitinöŋ lilingöyök.

¹⁴ Lilingöyökmö, yetkön Perga siti mosöta toroqeba anda Pisidia prowinsgö taon qetŋi Antiokia mianğören aŋgorohot. Mianğören aŋgota Sabat kendonöŋ köuluk miriŋine öngöba tarohot.

¹⁵ Tarohotka köuluk mirigö galöm yeŋön Mosesgö Köna keu aka kezapqetok yengören Buzup Kimbi oyonđa welen algetka eta kewö qesim etkiget, “Azi alayahöt, etkören keu kun könagesö urunini kuŋgubingöra ahöza ewö, mi mönö ölöp jiyohot mötpin.”

¹⁶ Mewö jigetka Polnöŋ wahöta börö misiba kewö jiyök, “Israel kianurup aka gölme toŋi nem-

buk Anutu waikņi memba möpöseimakzei, inĭini mönö kezap ala mötket.

17 *Israel ambazip kambu nanine bemnini mi Anutu. Yaņön bömönurupnini möwölöhöm enġiiga ambösakonurupninan Ijipt gölmenöņ anda kian aka malget. Anutunöņ nalö miangöreņ Israel ambazip kambu mi töhötmöriam enġiiga sehiba qetbuņaņinambuk aket. Mewö aketka Anutunöņ aņġöletot aka kukösumņi kondela miangön enġuaņgiri Ijipt kantri mosöta yaigep kaget.

18 *“Kaba mala gölme qararaņkölkölņe kutuba kaba ahakmeme bölöņi aka malgetka Anutugö irimņan seholiiga (yara) yambu 40:gö dop urubölö möta malök.

19 *Möta malökmö, töndup kaba mala Kenan gölmenöņ kaņgotket. Kaņgotketka miangöreņ ambazip kambu 7 közöla ködenġ enġiba gölmeņini memba mendenġa isikurupnini toņe toņe akņegö buņa qem enġiyök.

20 *“Mewö asuhuiga (yara) yambu 450 miangö dop anök. Miangö andöņe Anutunöņ jimtekötekögö azi kembuņi kembuņi kuņgum enġiyök. Mi kuņgum enġii mala kotketka Samuelnöņ asuhuyök. Yaņön jimtekötekögö azi kembu qöndökņi aka kezapqetok azia malök.

21 *“Samuelnöņ asuhiba mali nalö miangöreņ kiņ kembugöra uletketka Anutunöņ azi qetņi Sol enġiyök. Sol yaņön Benjamin isikurup yeņgöreņök

* 13:17: Eks 1.7; 12.51 * 13:18: Jaņ 14.34; Dut 1.31 * 13:19:

Dut 7.1; Jos 14.1 * 13:20: Kemb 2.16; 1 Sml 3.20 * 13:21: 1 Sml 8.5; 10.21

azi qetņi Kis yaņgö nahönņa ahök aka (yara) yambu 40:gö dop kiņ kembuņina malök.

22 *Mi malökmö, Anutunöņ Sol uteköba salupņe azi qetņi Deiwid kiņ azi kembuņini akņapköra möwölöhöba kuņguyök. Kuņguba könaņamņi jim asariba kewö jiyök, ‘Nöņön Jesigö nahönņi Deiwid miwikņaizal. Yaņgö uruņi kewöta mötņi ölop dop köl niņgiza. Yaņön mönö ahakmemeņi pakpak miangöreņ nöņgö jitni tem köla malma.’

23 Anutunöņ mönöwök Amötqeqe Tonji melaim neņgimapkö jiyöhi, jöhöjöhö keu miangö ölnan mönö kewö asuhuyök: Deiwidkö gwölönarökurupņi yeņgöreņök azi qetņi Jisös asuhuiga Anutunöņ i Israel kambu neņgö Amötqeqe Tonini aka malmapköra kuņguyök.

24 *‘Jisösnöņ qahö asuhuiga qeljiņe miangöreņ Jonöņ mutuk kaba kewö jiba malök, ‘Iņini mönö uruņini melenget. Uruņini melengetka nöņön o melun mem eņgimam.’ Mewö jiba Israel ambazip kambu pakpak uru kuņgum eņgiba malök.

25 *Mewö malökmö, yaņön mirililik nupņi mem tekömamgö aka miangöreņ kewö jii mötket, ‘Iņini nöņgöra denöwö mötmörize? Yuai mötmörizei, nöņön mia qahöpmö, mötket, nöņgö andöne azi kun kama. Yaņön kaiga nöņön yaņgö qöhöröņe eretņi maljalangöra wayangösöņi teņgöba köna esu kösöņi pösatmamgö qötötaņgömam.’

26 “O alaurupņi, Abrahamgö gwölönarökurupņi aka gölme tonji eņön nembuk Anutu waikņi

* 13:22: 1 Sml 13.14; 16.12; Sum 89.20 * 13:24: Mak 1.4; Luk 3.3

* 13:25: Mat 3.11; Mak 1.7; Luk 3.16; Jon 1.20, 27

memba möpöseimakzei, Anutunöŋ amöt qem nengimapkö Buŋaŋi mi ali nengöreŋ kaza.

27 Mianğö könaŋi kewö: Jerusalem toni aka galömurupnini yeŋön Jisösgö könaŋi qahö möt kutuget. Kezapqetok yeŋgöreŋ Buzup Kimbi Sabat kendon dop oyoŋmakzemö, mianğö könaŋi qahö möt asarimakze. Mewö tönpin maljemö, töndup galömkölköl aziurupninan Jisös kömumapkö keuŋi jim tekögetka kezapqetok ambazip yeŋgöreŋ keu mi mewö mianğön öljambuk ahök.

28 *Yeŋön Jisös kömupkö buŋa akŋawaŋgö dop keu könaŋi jaruba kun qahö miwikŋaiba töndup “Yapmakek!” qetket. Qeta Pailötnöŋ jim teköi kömumapkö qeta uletket.

29 *“Yaŋgöra keu pakpak ohoget ahözawi, yeŋön mönö mianğö dop aketka ölni ahum teköiga Jisös ipnöhök meköba eta qaksirinöŋ anda köt köteŋ uruŋe alget.

30 Algetmö, Anutunöŋ i kömupnöhök mem gulii wahörök.

31 *Wahöri yambuk Galili prowinsnöhök Jerusalem sitinöŋ kageri, yeŋgöra mönö silim gwötpuk mianğöreŋ asuhum enğiyök. Alaurupŋi asuhum enğiyöhi, yeŋön nalö kewöŋe ambazip sutŋine dangunu ewö kinda könaŋi naŋgöba jim asariba malje.

32 Anutunöŋ Juda ambösakonurupnini yembuk yuai akŋamgö keu jim jöhöiga nini yeŋgö gwölönarökurupŋini ahinga keu walŋi mianğö öljän mönö nalö kewöŋe nengöra kewö asuhuyök:

* **13:28:** Mat 27.22-23; Mak 15.13-14; Luk 23.21-23; Jon 19.15

* **13:29:** Mat 27.57-61; Mak 15.42-47; Luk 23.50-56; Jon 19.38-42

* **13:31:** Apo 1.3

Yañön Jisös mem gulii wahöta malja. Mianğöra neñön mianğö Buña ölopñi mi jim asarim engizin.

33 * “Anutunöñ Jisösgöra keu jii Deiwidnöñ möri Sumbara (Buña liñet Sam) jañgö yahöt mianğöreñ kewö ohoi ahöza,
‘Göñön nani nahöna akzani, nöñön mi merak ambazip engöra kondelbiga eka mötze.’

Yañön keu mianğö dop Jisös mem gulii wahörök.

34 * Jisös mem gulii kömupnöhök wahöta köhöiba mala könañgep kunbuk qahö kömuma. Mianğö keuñi Anutunöñ kewö jii ahöza,
‘Ni kalem möriamni kiñ Deiwid wañgiba malbiga sarakñi aka pöwöwöm köhöiba kinöhi, mianğö dop mi mönö engöra tököm engimam.’

35 * Deiwidnöñ mianğö keuñi mi Sumbara (Buña liñet Sam) kun mianğöreñ mewöyök kewö ali ahöza,
‘Nangahö wölböt azigi sarakñi i mönö qahö mosötnöñga kömupkö lömnöñ qahö gisahöma.’

36 Nini kiñ Deiwidkö könañi mötzin: Yañön malmalñi mala Anutugö jitñi wuatangöba nup wañgiyöhi, mi mem teköba nöñ qeba kömuyök. Kömui ambösakonurupñi yeñgö kösutñine löm kölgetka qamötñan ahöba gisahöba qahöwahök.

37 Deiwidnöñ gisahöba qahöwahökmö, Anutunöñ azi mem gulii wahöröhi, yañön mönö qahö gisahöyök.

38 “Azi alaurupni, mianğöra keu ki mönö mötket: Anutunöñ Jisösgöra aka siñgisöndokñini mosöta

* 13:33: Sum 2.7 * 13:34: Ais 55.3 * 13:35: Sum 16.10

sanğonma. Neñon miangö Buñani jim asarim enğizin.

³⁹ Mutuk ‘Mosesgören Köna keu wuatangöba mewö mianjon solanji akin,’ jiiinmö, mi inöñ wainöñ qaköba osiba malin. Mewö malinmö, nalö kewöñe denike yeñon Jisös möt nariba yambuk qekötahömei, Anutunöñ mönö körek yeñgö keunini jim teköiga solanime.

⁴⁰ Kezapqetok ambazipnöñ keu jiba ohoget ahözawi, Anutunöñ miangö dop likepñi meleni qakñine öngöbapuköra mönö galömnini mem anğume. Keu mewöñi kun kewö,

⁴¹ *‘Nöñon enğö malmal nalöñe anğöletot qainji kun memam.

Kunñan miangö keu buzupñi jii mötpeak, mi ölni akñapkö qahö möt naribeak.

Miangöra keu mi memba et ala jijiwilit ahakzei, inini mönö öne uba eka welipköba ayuhume.’ ”

⁴² Polnöñ mewö jiiga Barnabasbuk köuluk miri mosöta erohotka tosatñan kewö qesim etkiget, “Nini keu ki kunbuk mötpingö mötzin. Miangöra mi Sabat kendon euneañon ölop toroqeba jiyohot mötpinak.”

⁴³ Köuluk mireyök eta dengetka ambazip gwötpukñan Pol aka Barnabas könajire etkuatangöget. Tosatñan Juda ahuba malget aka tosatñan kian kantrinöñ ahuba könajep Juda ambazip aka malget. Yeñon etkuatangögetka eraum möta qambañ keu kewö enğiyohot, “Anutunöñ kalem möriam enğiyöhi, miangören mönö böñ qeba kinme.”

* **13:41:** Hab 1.5

44 Sabat kendon kun kam kuṅguyöhi, miangören taon gölme miangö ambazipni mi kölolohoba “Anutugö Buṅa keu mötpin!” jiba kaṅgota tokoget.

45 Kaṅgota tokogetka Juda yeṅön ambazip kambuṅi kambuṅi eṅgeka irimṅini seholim teköyök. Seholim teköiga Polgö keuṅi qemegö jitrakölik aka goranora (noragora) jiba mepaqepaik ak etkiget.

46 Mewö ak etkigetka Pol Barnabas yetkön awösamakak kinda köhöiba keu kewö jiyohot, “Anutunöṅ nup netkiiga Buṅaṅi mutuk Juda ambazip eṅgöra jiinga dop kölbawakmö, iṅini mi andö qeba laṅ kewö jize, ‘Nini malmal köhöikṅe aṅgotpingö dop qahö.’ Miangöra mötket, netkön mönö eṅgömosöta kian kantriṅi kantriṅi yeṅgören eṅda anbit.

47 *Kembunöṅ miangö keuṅi kewö jiba jim kutum neṅgiyök,

‘Nöṅön kuṅgum gihibiga kian kantri yeṅgö asakṅina aka amötqeqegö könaṅi jim asariba malnöṅga gölme göraṅi göraṅi dop köl teköi likeplikep eu emu yeṅön letota Suepkö buṅaya akṅe.’ ”

48 Mewö jiyohotka gölme toṅi Juda qahö malgeri, yeṅön möta uruṅini ölöwahi Kembugören Buṅaṅi möpöseiget. Möpöseiba malmal köhöikṅaṅgö buṅa akṅegöra Anutunöṅ möt kewöt eṅgiyöhi, yeṅön miangö dop uruṅini melenṅa Jisösgö Buṅaṅi möt nariget.

49 Möt narigetka Kembugö Buṅa keu jim sehigetka prowins pakpak mi dop köla anök.

* 13:47: Ais 42.6; 49.6

50 Ölöp anökmö, Juda yeñon taongö azi ipñi aka ambi öngöñgöñi Anutu göda qeba malgeri, miengö uruñini esiba kuñguba Pol Barnabas mo-hotñe sesewerowero ak etkiba miri gölmenineyök etkuatangöget.

51 *Anbitkö aka nesampurekñini kondela kewö jiyohot, “Netkön engö gölmenöñ kaziga sölbuham köna tambönire ahözawi, mi mönö tim tönjöratziga nanñine lilingöba gema.” Mewö jiyohotka könañamniri solanñi möt kutugetka anda Galesia prowins uruñe siti qetñi Aikoniam miangören añgorohot.

52 Añgorohotmö, gwarekurup Antiokia taonöñ malgeri, Uña Töröñan yeñgö uruñini kokolak qei önöñi qahö söñgaiba malget. Mewö.

14

Aikoniam sitinöñ uru kuñgum engiyohot.

1 Pol Barnabas yetkön Aikoniam sitinöñ añgota mewöñanök Juda yeñgö köuluk mire öngöba Buña keu jiyohot. Jiyohotka Juda aka kian kantri ambazip yeñgörenök kambu sehisehiñi yeñon uruñini melenja Jisös möt nariget.

2 Möt narigetmö, Juda ambazip qahö möt narigeri, yeñon gölme toni Juda qahö malgeri, miengö uruñini esiba aposol urunöñ gege ak etkimegöra uruñini kuñguget.

3 Kuñgugetka töndup nalö köröpñi miangören mala Kembu möt nariba awösamkakak kinda Buñañi jiba malohot. Kembu kalem möriamñangö keuñi jim asariyohotka keuñiri nanñgöba ösumñi

* 13:51: Mat 10.14; Mak 6.11; Luk 9.5; 10.11

börönjire ali aiwesök anğöletot meyohotka asuhuget.

⁴ Mewö asuhugetka taongö ambazipñan jula denget. Tosatñan Juda jítñememe yembuk örörönj jöhögetka tosatñan aposol yetpuk toroqeba kinget.

⁵ Mewö arönjda kingetka gölme toni aka Juda ambazip kianñi yeñön wahöta jítñememeurupñini yembuk urumohot aka melaimelai azi aposol mi “Kötnönj gila etkubin!” jiba mötmöriget.

⁶ Mewö mötmörigetka möta ölöñ köla tököba Likaonia prowinsnönj anohot. Miangörenj anda taon qetñiri Listra aka Derbe aka miri liliköm etk-iba tat angeri, miangörenj angorohot.

⁷ Miangörenj anğota Ölöwak Buña jim asariba uru kuñgum enğiba malohot. Mewö.

Listra taonönj Pol Barnabasgöra bem qetket.

⁸ Listra taonönj azi kun köna yahötñi kömukömuñi malök. Mi nam körö uruñeyök lokon asuhaba nalö kungen köna qahö tiba öne tatmalök.

⁹ Polnönj Buña keu jii möta tari uba könañamñi kewö eka mötmöriyök, “Yanğö uruñe mötnaripñi ahöm wañgiyöhanğöra aka ölöp ölöwakña,” mewö jiyök.

¹⁰ Mewö mötmöriba qet ketanji qeta jii mörök, “Mönö wahöta kinönj.” Mewö jii pöranj ala wahöta anda kaba kinök.

¹¹ Polnönj mewö aiga ambazip kambu yeñön mi eka Likaonia keuñine kewö silata jiget, “Bem yetkön letota azi silebuk aka sutnine asuhaba nenğörenj eta maljahot.”

12 Mewö jiba Barnabas qetnji bem bohonjini qetnji Zus qetket aka Polnön jitnje memba keu jiyöhangöra aka bem qetnji Hermes qetket.

13 Mewö qetketka bem Zus yangö jöwöwöl jikenji taon wösöñe ahöyöhi, mianjö jike nup galömñan bulmakau azinji enġuanġita kayök. Mewö kaba ila kösasorom memba kaba taon kiripo nanġuñe kinda ambazip kambu yembuk jakenön ala jöwöwöl ohom etkibingö aket.

14 Mewö aketka aposolyahöt yetkön mi möta “Qahö dop kölja,” jiba qetala silepökenjiri munjurata ösumñiran ambazip kambu uruñe anda qerohot.

15 *Qeta kewö jiyohot, “Aziurup, injini mönö denöwögöra aka yuai mewönji akze? Niri mewöyök injini ewö gölme azi töhöna akzit. Niri Anutugö Ölöwak Buña jim asarim enġizit. Mianjöra injini mönö bem omani andö enġume aka uruñini melenġa Anutu malmal Tonanġoreñ qekötahöme. Anutu malmal Tonan Suep, gölme, köwet aka mienjö uruñine yuai pakpak ahözawi, mi miwikñaim enġii malje.

16 Gölmenji gölmenji pakpak yenjön mönöwök mala kotkeri, Anutunön i qahö anġön köl enġii nanñini imbinanġö dop malmalñini ilinġösön malget.

17 “Qahö anġön köl enġiyökmö, töndup tönpin jipjap qahö malget. Qahöpmö, Anutunön yuai ölöpnji ölöpnji ak enġiba malök. Yanön jiiga kie yöhöi wehön qei töhötmöriamñan nalönji nalönji asuhui nem söñgaip aka mewö mianön uruñini kuñgum enġii malget. Mewö malgetka nanñi

* 14:15: Eks 20.11; Sum 146.6

kōnaŋi mōtmegōra kalemŋi mi kondel enġiba mewō mianŋōn dangunuŋi ali malget.”

¹⁸ Yetkōn mewō jiba ambazip kambu jōwōwōl ohom etkibepukōra jaraŋbaraŋ tiba jim susuhum enġiyohotka lōwōriba mosōtket. Mewō.

¹⁹ Listra yeŋōn Pol Barnabas etkōmosōtketmō, Juda ambazip tosatŋan Antiokia taon aka Aikoniam siti mietkōreŋōk kaŋgota ambazip kambu urunōŋ gege ak enġiget. Ak enġiba yembuk örōrōŋ luhuba Pol kötnōŋ qeba “Mōnō kōmuza!” jiget. Mewō jiba örōrahōba taon andōŋe eta mosōtket ahōyōk.

²⁰ Ahōyōkmō, gwarek yeŋōn kaŋgota lilikōm waŋgigetka wahōta anda taonōŋ öŋgōyōk. Mianġōreŋ öŋgōiga ahōyohot miri ġiaŋġiga Barnabasbuk Derbe sitinōŋ anohot.

Siriagō Antiokia sitinōŋ liliŋgōba kayohot.

²¹ Derbe sitinōŋ Ölōwak Buŋa jim asariba uruŋini kuŋgum enġiyohotka gwōtpukŋan uruŋini melenġa Jisōsgō gwarekurupŋi aket. Mewō aketka Derbe taon mosōta Listra Aikoniam aka Antiokia taon mienġōreŋ liliŋgōba anda enġehot.

²² Enġeka tata miri dop lilikōba Jisōsgō gwarekurup yeŋō uruŋini naŋgōba mem köhöiyohot. Kembu mōt narigeri, yambuk qekōtahōba kinmegō qambaŋ keuŋi enġiba kewō jiyohot, “Nini mōnō iririkwarörök qakŋe (lömböt kōnaŋi kōnaŋi miwikŋaiba) mala paŋpaŋgōba Anutugō bemtohoŋnōŋ eu aŋgotpin.”

²³ Urumelen kōnagesō dop jitŋememeurupŋini mōwōlöhōba galōm malmegō kōnaŋi kusum enġiba kuŋgum enġiyohot. Kuŋgum enġiba Anutugōra

nene sinji mala gwarek kambu yengöra köuluköba Kambu möt narigeri, yangö böröñe al engiyohot.

²⁴ Al engiba engömosöta Pisidia prowins kutuba anda Pamfilia prowinsnöñ angorohot.

²⁵ Mianğöreñ anğota Perga sitinöñ tata Buña keu jiba uruñini kuñgum engiba Atalia taonöñ geyohot.

²⁶ Mianğöreñ geba wañgenöñ öngöyohotka opo seri öröba möröreñğögetka luhutnöñ nanğoi anda mala Antiokia sitinöñ angorohot. Antiokia urumelen könagesö yeñön i Anutugö kalem möriam uruñe misin nup memahotköra mutuk Anutugö böröñe al etkigetka engömosöta anohot. Anda liliköba nupñiri mi mem teköba kunbuk nanñire sitinöñ lilingöba kayohot.

²⁷ Mianğöreñ kaba urumelen könagesö köl öröm engiyohot. Köl öröm engiyohot tokogetka keu kösohotñiri kewö jiyohot, “Anutunöñ netpuk mala anğöletot ketanji ketanji aka memba malök. Yanñon nam köl netkii nup meziga kian kantriñi kantriñi yeñön Jisös möt narimegöra nanju öröm engii uruñini melenget.”

²⁸ Kösohotñiri mewö jiba gwarek kambu yembuk nalö köröpñi qem köriba tata malohot. Mewö.

15

Kian kantri yengöra aka zioznöñ julmamgö ahök.

¹ *Antiokia malohotmö, Judia prowinsnöñök ambazip tosatñan eta kaba könahiba urumelen ambazip kewö kusum engiget, “Inñini Mosesgöreñ Köna keugö dop Anutugö aiwesökñi silenine qahö

* 15:1: Lew 12.3

yandime ewö, mewö mönö Suepkö bujaya akingö osime.”

² Mewö kusum engigerangöra aka anjururuk ahuiga Pol Barnabas yetkön tuarenjon ak engiba könöpnambuk jim engiyohot. Jim engiyohotka urumohot qahö aka keu kewö jöhöba jiget, “Nini mönö Pol Barnabas aka jitnememe tosatni melaim engiinga Jerusalem sitinöj öngöba keu mi memba aposol aka Jerusalem urumelenj könagesögö jitnememe yengöreñ anda jime.”

³ Keu mewö jöhöba jigetka urumelenj könagesö yeñön i melaim engigetka könanöj anget. Anda mala Fonisia aka Samaria prowins yahöt mi kutuba könanöj könagesöni könagesöni engekot. Engeka kian kantri tosatni yeñön uruñini melenjerangö buzupni jiba urumelenj kambu yengöra sösongai ketani al engiget.

⁴ Al engiba anda mala Jerusalem sitinöj angotket. Angotketka aposol aka jitnememe yeñön urumelenj könagesö yembuk köl öröm engiget. Köl öröm engigetka kösohotni kewö jiget, “Anutunöj nam köl neñgii misin nup meinga nembuk mala angöletot ketani ketani aka memba malök.”

⁵ Kösohot mi jigetmö, Farisi (Köna keugö kapanjököl) kambunöhök urumelenj azi tosatnan wahöta kewö jiget, “Kian kantri yeñön uruñini melenjeri, yengöra mönö kewö jim kutubin: Yeñön mönö Anutugö aiwesök silenine yandiba Mosesgöreñ Köna keu pakpak wuatangöba malme.” Mewö.

Jerusalem totoko ala anjururuk keu mindiñgöget.

⁶ Mewö jigetka aposol aka jitnememe yeñön keu mi jim kewötpingö tokoget.

⁷*Tokoba goranora (noragora) keu gwötpuk jiba jitnakölik aket. Mi aketka Pitönöñ wahöta kewö jii mötket, “Azi alaurupni, Anutunöñ mutuhök sut-nine nup mendenäda möwölöhöm niñgiba nöngöra kewö jiyök, ‘Gi mönö kian kantrinöñ anda Ölöwak Buña keu jim asarim enjinöñga yeñön uruñini melenäda Kembu möt narime.’ Injini keu mi mötze.

⁸*Anutunöñ ambazip pakpak urunini möt kutuzawañön könajamñi kondela Uña Töröñi Juda ambazip nenğöra melaiiga eröhi, miangö dop mönö kian kantri ambazip yeñğöra mewöñanök i melaii uruñine geyök.

⁹ “Melaii geiga mewö mianñön Juda ambazip qahö engek soriba kantri tosatñi qahö qepureim engiyök. Qahöpmö, yeñön Anutu möt narigetka sinğisöndokñini mosöta uruñini sanğonñiga sarakñi aket.

¹⁰ Miangöra injini mönö wuanöñğöra Anutu esapesapnöñ al wañgibeak? Wuanöñğöra gwarek dölökñi yeñğö qakñine tem könjöñ toroqeba alinga anğubeak? Tem könjöñ mewöñi mi nanine ambösakoninan me naninak mewöyök anğubingö dop qahö akmalin.

¹¹ Mewö qahöpmö, kewö möt narizin: Kembu Jisösgö kalem möriamñan mönö Anutu nam köl wañgiiga amöt qem nenğiiga Suepkö buñaya akin. Kian kantri yeñön mewöyök köna mohot miyök wuatangöba letota Suepkö buñaya akingö möt narimakze.”

* 15:7: Apo 10.1-43 * 15:8: Apo 2.4; 10.44

¹² Mewö jiiga kambu yeñön lökñanök keu jaruba bök tatket. Tatketka Pol Barnabas yetkön keu kösohotñiri kewö jiyohot, “Anutunöñ nam köl netkii kian kantrinöñ anda sutñine misin nup meziga aiwesök aňgöletot ketañi ketañi asuhuget.” Mewö jiyohotka kezap ala mötket. Mewö.

Bisop Jeimsnöñ keu jii mötket.*

¹³ Pol Barnabas yetkön kösohotñiri jim teköyohot mötketka Jeimsnöñ keu kewö jiyök, “Azi alaurupni, nöñön keu jibi kezap ala mötket.

¹⁴ Anutunöñ nalö mutukñi kian kantri ambazip mesohol köl eñgiba sutñineyök ambazip nanñangöra möwölöhöm eñgiiga qetñi bisiba könagesöñi toroqeget. Anutunöñ mewö aka könañamñi kondel neñgiyöhi, Saimon Pitönöñ miangö keuñi jii mötzin.

¹⁵ Keu mewöñi mi kezapqetok ambazip yeñön mewöyök nanğöba jize. Yeñön keu kun kewö ohoget ahöza,

¹⁶ *Miangö andöñe nöñön lilingöba kaba kiñ Deiwidkö kantri tohoñi kunbuk memba wahötmam. Yanñon mutuk jakömbuak kounñi qeba amböskonini galöm köl eñgiiga kounñan buratiba tiñgita erökmö, nöñön mi kunbuk möhamgöba kuñgubiga kantrinöñ ölöwaka kinma.

* **15:12:** Bisop, Grik keunöñ episkopos, nanine keunöñ jegalöm me inspekta. Yanñon zioz nup pakpakö mindimindiri galömñi akza. Jeims kianñon Jisösgö gwarekñi qahöpmö, Jisösgö munñi. * **15:16:** Amos 9.11-12

17 Mi kewö asuhumapköra akɲam: Ambazip kambu tosatɲi pakpak yeɲön Kambu jarume.

Kian kantri pakpak nani buɲani akɲegöra eɲgoholali, yeɲön Kambu ni göraim ningime. Kambu nöɲön mewö jizal aka mianğö dop kantriɲini mem ölöwakɲam.

18 Mewö ahakzali, mi mönö möpɲaɲgö möpɲeyök möta kota malje.'

19 "Mianğöra Jeims nöɲön keu mi kewöta mötmötnan kewö möta jizal: Kian kantri ambazip uruɲini Anutugöreɲ melenjei, neɲön mönö lömböt könjön ketanɲi yeɲgö qakɲine alinga qahö dop kölma.

20 *Mewö qahöpmö, yeɲgöra kimbi kewö ohoinga dop kölma: Yeɲön sömbup busuɲi bem lopionğö naluk buɲa qeba könaɲine algetka ösumɲinan walöɲnöhi, mi kude neme. Sero yoɲgorö kude akɲe. Sömbup jölɲi qeqeɲaɲgö busuɲi aka sep mi kude neme. Yuai 4 mi mosötmegöra jim köhöibinak.

21 Mosesgö Köna keu mi mönö möpɲaɲgö möpɲeyök miri dop jim asariba kota maljin. Mi Sabat kendon dop köuluk mirinine oyonda mörakzin. Mianğöra keu 4 mi ölop qahö mosötpin." Mewö.

Jerusalem totokonöɲ kian kantri yeɲgöra kimbi ohoget.

22 Jeimsnöɲ mewö juiga aposol aka jitɲememe yeɲön könagesö pakpak yembuk keu mi mötket dop kölök. Mötket dop kölīga sutɲineyök azi tosatɲi

* 15:20: Eks 34.15-17; Lew 17.10-16; 18.6-23

möwölöhöm engiba Pol Barnabas yetpuk mohotŋe Antiokia sitinöŋ melaim engibingöra jiget. Mewö jiba azi qetŋi Judas qetŋi alaŋi Barsabas aka Sailas möwölöhöm etkiŋet. Azi yahöt mi urumelen kambugö jitŋememe azia ahot.

²³ Azi mi melaim etkibin jiba kimbi kun kewö ohoba böröŋjire alget,

“Mötnaripkö kian alaurupnini, Antiokia siti aka Siria aka Silisia gölmenöŋ maljei, neŋön engö jölöŋini jizin. Aposol neŋön mötnarip könagesögö jitŋememe yembuk engö urumelen alaurupŋina akzin. Mewö embuk keu eraum mötpingöra kimbi al engizin.

²⁴ Nanine ambazip tosatŋi qahö jim kutum engiinga nanŋinök neŋgömosöta engöreŋ kaba uruŋini kuŋguba keu murutŋi kekelolo engigetka uru mötmötŋini siksauk aiga mörin.

²⁵ Miangöra nini körekŋanök totoko ala urumohot ahin dop kölök. Dop köliga azi yahöt meköba melaim etkiinga wölböt alayahöt Barnabas Pol yetpuk engöreŋ kame.

²⁶ Barnabas Pol yetkön nanine Kembu Jisös Kraistkö qetŋangöra aka malmalŋiri köleŋnohotka tosatŋan etkuget kömumbitkö ahot.

²⁷ Nini Judas Sailas melaim etkiinga kaba keu miyök toroqeba jitnöŋ jiyohotka mötme.

²⁸ Uŋa Töröŋi aka neŋön keu kewögöra urumohot ahinga dop kölja: Engö qakŋine lömböt könjöŋ qahö toroqeba albin. Keu bohonŋi 4 miyök wuatangöme. Mi ongitketka jul-

binbuk.

29 Keu 4 mi kewö: Sömbup busunji bem lopiongö naluk buña qeba kōnañine algetka ösumñinan walöñnöhi, mi kude neme. Mewöyök sep me sömbup jölñi qeqeñangö busunji mi kude neme. Sero yongorö kude akñe. Yuai 4 mi mosöta andö qegetka urumohot ahinga Anutunöñ kötuetköm enğiiga ölöwaka malme. Mönö uru böñjöh malme.” Mewö.

Keu memba angetka Antiokia siti yeñön söñgaiget.

30 Kimbi mewö ohoba melaim enğigetka anget. Kōna anda geba Antiokia sitinöñ angotket. Angota urumelen kōnagesö köl öröm enğigetka tokoget. Tokogetka kimbi mi enğigetka oyonget.

31 Mi oyongetka miangöra amqeba urukölalep möta söñgaiget.

32 Judas Sailas yetkōn nanñirak kezapqetok azia mala goro keu gwötpuk enğiba urugö nanğōnanğō keu jiba mem köhöim enğiyohot.

33 Mem köhöim enğiba nalö tosatñi miangören toroqeba malohot. Malohot tekōiga urumelen alaurup yeñön “Luaibuk anmahot,” jiba melaim etkiget. Jerusalem malohotka melaim etkigeri, Judasnöñ mönö yeñgören lilingöyök.

34 (-)†

35 Pol aka Barnabas yetkōn toroqeba Antiokia sitinöñ mala ambazip tosatñi gwötpuk yembuk

† 15:34: Tosatñan toroqeba jabö v 34 kewö alje: Lilingöyökmö, Sailasnöñ keunji jöhöba toroqeba miangören malök.

Kembugöreŋ Buŋa keu kusum engiba uruŋini kuŋgum engiba malget. Mewö.

Pol aka Barnabas yetkön deŋnohot.

³⁶ Mewö malgetmö, nalö tosatŋi teköiga Polnöŋ Barnabasgöra kewö jiyök, “Netkön taon miri pak-pak liliköba Kembugöreŋ Buŋa keu jim asariba maliri, mönö miangöreŋ lilingöba urumelen alaurupniran denöwö maljei, mi ölop anda eka mötpit.”

³⁷ Mewö jiiga Barnabasnöŋ Jon qetŋi alaŋi Mak qetkeri, i mewöyök waŋgita mohotŋe anbingö mörök.

³⁸ *Mewö mörökmö, Jonöŋ mutuk Pamfilia taonöŋ löwöriba etkömosöta yetpuk toroqeba nup qahö meyök. Miangöra Polnöŋ i waŋgita anbingö möri qahö dop kölök.

³⁹ Qahö dop köliga aŋgururuk aka uruŋiri könöp jeiga deŋnohot. Deŋda Barnabasnöŋ Mak waŋgita geba waŋgenöŋ öngöyohotka opo seri öröba möröreŋgögetka luhutnöŋ naŋgöi gölme jölanni Saiprus miangöreŋ anohot.

⁴⁰ Anohotmö, Polnöŋ azi qetŋi Sailas meköiga urumelen alaurup yeŋön Kembugö böröŋe al etkiba kalem möriamŋan sel jöhöm etkimapköra jigetka mosöta anohot.

⁴¹ Anda mala Siria aka Silisia prowins yahöt mi kutuba liliköyohot. Liliköba Polnöŋ urumelen könagesöŋi könagesöŋi engeka mem köhöim engiba malök. Mewö.

16

Timotinöŋ Pol aka Sailas yetpuk toroqeyök.

* 15:38: Apo 13.13

¹ Polnöj liliköba anda mala taon qetjiri Derbe aka Lистра mianğöreñ anğorök. Lистра anğota mianğöreñ gwarek kun qetji Timoti miwikñaiyök. Namñan Juda urumelen ambia ahökmö, iwiñan Grik azia.

² Polgö azi alaurupñan Lистра aka Aikoniam malgeri, yeñön Timotigö könani jim ölöwaka jiget mörök.

³ Mewö jiget möta wañgiri mohotje anmamgö mörök. Mi mörökmö, Timotigö iwiñan Grik azia malöhi, mi körekñan möt teköget aka miri gölme mianğöreñ Juda ambazip gwötpuk malget. Mianğöra yeñön Pol jim wañgibepuköra Timoti wañgita Anutugö aiwesökñi silene yandiyök.

⁴ Yandiiga anda taon aka miri dop anğotkeri, mianğöreñ Jerusalem mindimindiri totokogö keunji jiget. Aposol aka Jerusalem urumelen könagesögö jitlememe yeñön keu jöhöm köhöigeri, mi wuatañgömegöra jim kutum enjiget.

⁵ Mewö lilikögetka Jisösgö könagesöñi könagesöñi miri dop malgeri, yeñgö mötnaripñinan köhöiyök. Mewö köhöiba Buña keu jigetka tosatñan uruñini melenđa wehön dop kam toroqegetka kambuñinañgö jañgöñan qariba öngöyök. Mewö.

Anutunöj Pol gaunöj kutum wasöriğa Yurop anget.

⁶ Liliköba mala “Eisia prowinsnöj anda Buña keu jim asaribin,” jigetmö, Uña Töröñan soñgo ala anğön köl enjyök. Mianğöra yeñön toroqebe anda Frigia aka Galesia prowins yahöt mi öne kutuba etkonğita anget.

⁷ Anda mala Misia gölme görane anğota Bitinia prowinsnöj anğotpingö mötketmö, Jisösgö

Uña Töröñan mianğoreñ anmegö urumohot qahö ahök.

⁸ Urumohot qahö aiga mosöta anda Misia gölme öne kutuba köwet jitñe geba Troas taonöñ anğotket.

⁹ Troas anğota sunğem gaun ahögetka Anutunöñ Pol kutum wasöriga imut kun kewö ehök: Yurop azi kunñan Masedonia likepñe kinda ohola kewö jiba köuluköm wanğiyök, “Gi mönö köwet kutuba Masedonia gölmenöñ kaba bauköm neñgiman.”

¹⁰ Polnöñ jemelen imut mi ehiga nini mianğö könañi kewö möt kutuba jiin, “Anutunöñ mönö neñgohola köwet kutuba Yurop uruñe anda Ölöwak Buña Masedonia prowinsnöñ jim asarim enğibingöra jiza.” Mewö jiba mianğoreñök mosöta anbingö mötmöriba amqein. Mewö.

Filipai ambi Lidianöñ uruñi meleşnök.

¹¹ Neñön amqeba geba wangenöñ öngöinga opo seri öröba möröreñğögetka luhutnöñ nanğöi Troas siti mosöta anda diñdiñanök Samotres gölme jölanñe anğorin. Anğota ahöba miri gianjiiga toroqeba anda Neapolis sitinöñ anğorin.

¹² Mianğoreñ anğota wangenöhök eta köna anda Filipai sitinöñ anğorin. Rom ambazip yeñön mönöwök kaba Filipai siti mi memba mianğoreñ malmal tatatñini algetka Masedonia prowinsgö siti ketañi ahök.* Nini Filipai anğota wehön tosatñi mianğoreñ malin.

* **16:12:** Masedonia prowinsgö siti bohonñi mi Tesalonaika. Distrik mutukñanğö siti bohonñi mi Amfipolis aka siti keta bölökñi kun Filipai. Rom yeñön Filipai mi Itali ewö galöm köl enğiget. Grik miri toñi yeñön nanñine gölmenöñ kian ewö aka malget.

¹³ Mianğöreñ mala Sabat kendonöñ siti kiripo yaigepñe anin. Mianğöreñ anda Juda yeñön o sakñe tokoba Anutu köulukömakzei, mewö mötmöriba geba rowoñqege kunöñ anin. Anda ambi tokoba tatkeri, i engeka tata eraum möta Anutugöreñ Buña keu yeñğöra jiinga mötket.

¹⁴ Mötkeri, yeñğö sutñine ambi kun qetñi Lidia malök. Yañön Taiataira sitinöhök Filipai kaba opo pisikñi gugakgugak aködamunñambuk tokoba bohonñi memegöra ala malök aka Anutu waikñi memba möpöseiba malök. Kembunöñ uruñi mem amqeiga Polnöñ keu jiyöhi, mianğöra sihimñan ahui kezap ala möta anğön kölök.

¹⁵ Anğön köli nanñi aka saiwaurupñi o melun mem enğiinga qesim neñgiba kewö jiyök, “Inini nöngöra ‘Kembu möt narizal,’ jize ewö, mönö ölop kaba nöngö mire öngöba tata nene nemba ahöme.” Mewö jiba kapan köla qesim neñgiyök. Mewö.

Pol Sailas yetkön kösö mire tarohot.

¹⁶ Nini nalö kunöñ köuluk rowoñqegeñe gebingö köna namñe aninga welenqege ambi kunöñ miwikñaim neñgiyök. Amba mi andö lawönñambuk mala ambazip könañini aukñe jim miwikñaimangö mörök. Mi möta kezapqetok keu asambötñi jim miwikñaiba mewö mianğön moner yuai mi gwötpuk öröba mali tourupñi yeñğö böröñine geyök.

¹⁷ Yañön Pol aka nini neñgeka neñğö andöñine kaba kewö jiba qerök, “Azi kienöñ Anutu öngöngöñi ketanğö welenñi qeba Suepkö buñaya akingö könañi jim asarim enğimakze.”

18 Mewö jiba sömaŋi gwötpuk qeta malök. Mi malökmö, Polnönj tököba mianğöra sihimbölo mörök. Mi möta nalö kunönj lilingöba ömeŋi kewö jim kutum waŋgiyök, “Ni Jisös Kraistkö qetŋe jizal: Gi mönö ambi kianğö uruŋeyök kota anönj.” Mewö jim kutum waŋgi mianğoreŋök kota mosöta anök.

19 Mi anökmö, ambi tourupŋan mi möta monen yuai öröbingö könaŋi jöpköyöhi, mi miwikŋaiba irimŋini seholiyök. Irimŋini seholiiga Pol Sailas etkömembra jöhöba maket sombemŋe öröm etkiba galöm azi yeŋgö jeŋine etkuangita anget.

20 Etkuangita anda keu jake galöm yeŋgö jeŋine al etkiba silenire keu kewö ala jiget, “Nini siti kianğoreŋ luainönj maljinmö, azi yahöt kietkön kaba eŋololonj ak neŋgimakzahot. Yetkön Juda azia akzahot

21 aka Juda silikŋini kusum neŋgimakzahot. Nini Rom mindimindiri kantrigö tohoŋ tonj akzin. Mianğöra nini silikŋini mi ölop qahö möt aŋgön kölbin. Mi membra wuatangöbingö soŋgo ahöi osizin.”

22 Silenire keu mewö aka jim etkigetka ambazip kambu yeŋön mewöyök wahöta mindiriba qetal etkim köhöiget. Qetal etkim köhöigetka galöm yeŋön kuŋgum eŋgigetka sileötaŋiri öröba munjukunjuritket aka jim kutum eŋgigetka arawambu kömbinönj etkuget.

23 Gwötpuk etkum teköba kösö mire al etkibingö etkuangita wahibuknönj ölopŋanök galöm mem etkimapkö jim kutum waŋgiget.

24 Mewö jim kutum waŋgigetka möta etkömembra kösö miri bibiŋe miri uruŋi kunönj anda

könayahötñiri ip özöpañ† sutñire ala kösönöñ jöhöba miri uruñi miangö nanñuñi yahöt mi ki misigetka tarohot. Mewö.

Kösö miri galömñan uruñi meleşnök.

25 Pol Sailas yetkön mewö tarohot. Tata mala sunğem bibiñi aiga miangören Anutu köuluköba liñet köla möpöseiba malohotka kösö azi körekñan kezap ala mötket.

26 Mewö aketka miangörenök wölañ kenöñ (nan) ketañi giliga kösö mirigö tandöñi pakpak an-jañanjanñ kölget. Mewö kölgetka miangörenök nanñu pakpak talgetka kösö azi pakpak yeñgö ain tapeññinan (munğamuñga) lolohoba erök.

27 Mewö asuhuiga kösö miri galöm yañön gaun uruñeyök wahörök. Wahöta kösö mirigö nanñuñi pakpak tal tekögeri, mi eka jiyök, “Kösö azinöñ an teköze me denöwö?” Mewö jiba mötmöriba jönömñi unduiga bingö sou ketañi mi kupinñeyök öröba nanñi aumangö ahök.‡

28 Nanñi aumangö ahökmö, Polnöñ paunpaun teriñgöba kewö jiyök, “Nini körekñanök ki tatzin. Mönö nangi silegi öne kude ayuhuman.”

29 Mewö jii möta kiwa wañgimegöra qesii wañgigetka ösumñan kösö miri uruñe anda jönömñi unduiga Pol Sailas yetkö kösutñire anda simin köl etkiyök.

30 Simin köl etkiba kösö mireyök etkuangita eta kewö qesim etkiyök, “Azi ketañi yahöt, ni mönö

† 16:24: Ip özöpañnöñ könañiri yöhöraköiga osiba tarohot. Imutñi ekñan. ‡ 16:27: Kösö azinöñ ölöñ köliga galömñi mi keu jakeñe ala qegetka salupñe sihimbölö möta kömuzapma. Nanñi gamuñi möta aubawak, mewö amqeba kömumbawak.

denöwö akiga Anutunöŋ amöt qem niŋgiiga letot-pileŋak?”

³¹ Qesim etkiiga jiyohot, “Mönö urugi melenŋa Kembu Jisös möt narim waŋginöŋga gi aka saiwaurupkan mewöyök letota Suepkö buŋaya akŋe.”

³² Mewö jiyohotka miriŋe angetka könagesöurupŋi pakpak yembuk tokogetka Anutugöreŋ Buŋa keu jiyohot mötket.

³³ Jiyohot möta suŋgemgö aua miangöreŋök etkuangita anda uziŋiri saŋgoŋnök. Saŋgoŋniga miangöreŋök i aka saiwaurupŋi pakpak mi o melun mem enŋiyohot.

³⁴ O melun mem enŋiyohotka etkuangiri nene mire öŋgöba nene ohoba ala etkiyök. Etkiba nanŋi aka saiwaurupŋi yeŋön körek Anutu möt narigerangöra sösöŋgai aket. Mewö.

Kösö mireyök közöl etkigetka erohot.

³⁵ Miri gianŋiiga keu jake galöm (majistreit) yeŋön opotöröp melaim enŋigetka kösö mire kaba kewö jiget, “Azi yahöt mi mönö pösat etkinöŋga etmahot.”

³⁶ Mewö jigetka wahibuknöŋ kaba buzup mi Polgöra kewö jii mörök, “Majistreit galöm yeŋön keu kewö alget kaza: Inŋiri mönö kösöŋiri pösatpiga etmahot. Miangöra etkön mönö dölki mosöta eta luainöŋ anmahot.”

³⁷ Mewö jii mörökmö, Polnöŋ opotöröp yeŋgöra kewö jiyök, “Rom mindimindiri gawmanöŋ sel jöhöm netkiba miangö (jimkutukutu) paspot netkigetka maljit. Miangöra yeŋön keuniri qahö kewöta jim teköba töndup aukŋe ambazip jeŋine öne laŋ arawambu kömbinöŋ netkuba kösö mire

al netkiget. Mi gamuṅambuk. Mewö al netkiget tatziga dölki denöwögöra melaim netkiget öne ölöṅ etpirak? Mi qahö dop kölja. Niri qahöpmahöp etpitmö, yeṅön mönö nanṅinak kaba netkömegetka etpirak.”

³⁸ Polnöṅ opotöröp yeṅgöra mewö jiiga keu mi memba majistreit galöm yeṅgöreṅ anda jiget mötket. Mi möta Rom gawmangö (jimkutukutu) paspot memba malohori, mi möta auruba sömbuṅini mötket.

³⁹ Sömbuṅini möta kösö mire kaba ösöṅ susuhuba kelök ala kuṅgum etkigetka geyohot. Geyohotka Filipai siti mosötmahotkö ulet etkiget.

⁴⁰ Ulet etkigetka Pol Sailas yetkön kösö miri mosöta Lidiagö mire anohot. Mianṅöreṅ anda urumeleṅ alaurupṅiri eṅgeka urugö nanṅönanṅö keu jiba eṅgömosöta anohot. Mewö.

17

Tesalonaika nup megetka sesewerowero aket.

¹ Anda mala Amfipolis aka Apolonia siti yahöt mi kutuba Tesalonaika sitinöṅ aṅgotket. Siti bohonṅi mianṅöreṅ Juda yeṅön köuluk miriṅini meget kinök.

² Polnöṅ ahakmemeṅi aka malöhi, mianṅö dop köuluk miriṅine öṅgöba Sabat kendon karöbut mianṅöreṅ yembuk Urumeleṅgö Buṅa Kimbi oyoṅda könaṅi eraum möta malget.

³ Mewö mala Buṅa Kimbigö könaṅi jim asariba kewö jiyök, “Anutunöṅ areṅ ala Amötqeqe Toṅan sihimbölä möta kömumba kömupnöhök wahötmapkö jiyök.” Mewö jiba mianṅö könaṅi

Buŋa Kimbinöhök kondela uruŋini kuŋguba kewö jiyök, “Azi Jisös jim asarim enġizali, yaŋön mönö Amötqeŋe Toŋi Kraist akza.”

⁴ Mewö jiiga Juda könagesö yeŋgöreŋök tosatŋan möt nariba uruŋini melenġa Pol Sailas yetpuk toroqeŋa kinget. Grik ambazip tosatŋan Anutu waikŋi memba möpöseigeri, yeŋgöreŋök mewöyök kambu ketanġi yeŋön yembuk toroqeget aka ambi öŋgöŋgöŋi qetbuŋaŋinambuk yeŋgöreŋök gwötŋukŋan uruŋini melenġet.

⁵ Uruŋini melenġetmö, Juda ipŋi yeŋön uruŋini seholiiga uruŋöŋ mututqutut möta andöqeŋe aket. Mi aketka inġarere ambazip rowoŋqeqenöŋ laŋ malgeri, yeŋgöreŋ anda azi goŋgoŋi tosatŋi enġömeget. Mi enġömemba mindiriba ambazip kambu uruŋini kuŋguba öröm enġigetka tokoget. Tokoba laŋ qetketka qeburuŋ göjupmajup ahuiga siti dop köl teköyök. Laŋ qeta luhuba azi qetŋi Jeison yaŋgö miri töungöba (töwöngöba) Pol Sailas ambazip kambu jeŋine al etkibingöra jarum etkiget.

⁶ Jarum etkigetmö, qahö miwikŋaim etkiba Jeison aka urumelenġ alaurup tosatŋi jöhöm öröm enġiba sitigö galömkölköl azi yeŋgö jeŋine anġota kewö qetket, “Yei! Azi gölmeŋi gölmeŋi liliköba miri dop uru kuŋgum enġigetka kahapmahap aka sohomakzei, yeŋön mönö ki mewöyök kayohot.

⁷ Kiaŋgöreŋ kayohotka Jeisonöŋ i etkömemba anġön köl etkiyök. Ambazip pakpak mienöŋ kewö jimakze, ‘Azi kun qetŋi Jisös yaŋön kiŋ kembunini akza.’ Mewö jiba Rom sisa kiŋgö jimkutukutuŋi qetala memba eta alakze.”

⁸ Mewö qetketka ambazip kambu aka galömkölköl azi yeñön mötketka uruñinan eta raidimbom ewö siksauk ahök.

⁹ Siksauk aiga Jeison aka urumelenj alaurup tosatñi kuñguba qesim engigetka moneñ ala meköm etkiba pösatketka eta anget. Mewö.

Berea angetka Baiböl stadi ala keunñiri kewötket.

¹⁰ Eta angetmö, urumelenj alaurup yeñön Pol aka Sailas miangörenjök melaim etkigetka mosöta sunjem miri qetñi Berea miangörenj anohot. Anda angota Juda yeñgö köuluk miriñine öngöyohot.

¹¹ Köuluk miriñine öngöba Buña keu jiyohori, mi sihim ketañi möta möt anğön kölget. Juda könagesö Berea malgeri, yeñön Tesalonaika könagesö engongita ölop sorokñi aket. Keu törörök jiyohot me qahö, mi wehön dop Buña Kimbigö keunöñ kewöta oyoñda eraum möta malget.* Silik ölopñi mewöñi wuatangöba Juda ambazip Tesalonaika malgeri, mi luhut al engiget.

¹² Buña keu jiyohotka Juda yeñgörenjök jesöngöñan möt nariba uruñini melenget. Grik ambazip yeñgörenjök mewöyök gwötpukñan Jisös möt narigetka sutñine ambi öngöngöñi qetbuñaninambuk mi gwötpuk malget.

¹³ Jisös möt narigetmö, Polnöñ Berea miangörenj mewöyök Anutugörenj Buña keu jim asariba malöhi, miangö buzupñan sehiba Tesalonaika anda Juda jitnememe yeñgö kezapñine geyök. Kezapñine gei möta wahöta Berea kaba mewöñanök ambazip uruñini esiba kuñguget.

* **17:11:** Berea yeñön Baiböl stadi ölopñi alget.

14 Kunjugetka urumelen alaurup yeñon mi möta mianğorenök Pol melaigetka köwet jitje geyök. Geyökmö, Sailas Timoti yetkön toroqeba Berea malohot.

15 Azi Pol umbulgeri, yeñon toroqeba wañgita anda Atens sitinöñ anğotket. Anğotketka kewö jim kutum enğıga mötket, “Inini mönö lilingöba Sailas aka Timoti jigetka ösumok nönğoren kamahot.” Keu mi möta mosöta anget. Mewö.

Polnöñ Atens sitinöñ mala nup meyök.

16 Polnöñ Atens sitinöñ tata Sailas Timoti yetkö mamböta mala liliköyök. Liliköba siti mi tandö lopionji lopionji mienön kokolak qegetka köna töwokñe töwokñe kingetka engeka awöwöliba tembula urunji könöp jeyök.

17 Polnöñ Juda yeñgö köuluk mirinine öngöba Juda kian ambazip aka gölme tonji Anutu waikñi memba möpöseigeri, yembuk kinda eraum mötket. Polnöñ wehön dop rowonqeçe sombemñini dop anda ambazip miwikñaim enğiba yembuk aitonğöba eraum mötket.

18 Eraum mötketka Epikuros aka Stoik mötmöt jake yahöt mietkörenök böhi tosatñan kaba Polbuk keu sinğinñi sinğinñi jiba goranora aka jitnakölik erauget.† Tosatñan toroqeba Polgö keunji möta kewö jiget, “Mötmöt kitipñi kitipñi zezenğok ewö usunđa um jaruba lañ qezaköba mohot yahöt miwikñaim bibihiba memba kaza. Mi memba kaba

† **17:18:** Mötkutukutu böhi qetji Epikuros yañon uruölöwak mötpingö könañi kusum enğiyök. Stoik mötmöt jake (akademi) mianğö böhinji qetji Zeno yañon sihim ölöpnji aka bölönji qömbököba böñ qeba köhöiba kinbingö könañi kusum enğiyök.

seseknai ewö laŋ jizapmö, keuŋaŋgö ölni wania jimamgö mötzawi, mi qahö mötzin.”

Polnön Jisösgö Buŋaŋi jim asariba uruŋini kuŋguba kömupnöhök wahörök‡ jiyök. Miangöra tosatŋan toroqeba kewö jiget, “Bem kianna memba kaba mietkö könaŋiri jim asariza, miangö tandök ewö akza, ekzin.”

¹⁹ Mewö laŋlaŋ jigetka Pol waŋgita maket sombem ketani Areopagus§ miangöreŋ öngöba kaunsöl yeŋgö jeŋine alget kini kewö jiget, “Gi mötmöt areŋ dölökni aukŋe kusum neŋgimakzani, miangö könaŋi denöwö? Mi ölop jinöŋga mötpin.

²⁰ Göŋön kian kantri yeŋgöreŋ keu murutŋi memba kaba jinöŋga kezapnine gei mötzin. Miangöra göhö keu areŋgahö könaŋi mi törörök mötpingö mötzin.”

²¹ Atens toŋi aka kian miangöreŋ malgeri, yeŋön pakpak öne laŋlaŋ mala mötmöt keu dölökni dölökni oŋgitgoŋgit aka jiba möta uruŋini miangöreŋ ala nalöŋini ayuhuba malget. Mewö.

Polnön Areopagus sombemnöŋ kinda keu jiyök.

²² Polnön wahöta Areopagus sombem bibiŋe anda kaunsöl yeŋgö jeŋine kinda kewö jiyök, “Atens aziurup, nöŋön ki kaba yuai pakpak eka könaŋini kewö ahöi mötzal: Inini bemurupŋini göda ölopŋi qeba möpöseim eŋgiba malje.

²³ Nöŋön liliköba eŋgöreŋ miri kömbukŋi kömbukŋi eka miengö sutŋine alta kulemŋambuk

‡ **17:18:** Jisös aka Kömupnöhök wahötwahöt keu yahöt mi qahö möt asariba tönpin kinda kewö jiget, ‘Yaŋön mönö bem azi ambi yahöt yetkö qetŋiri mewö qetza.’ § **17:19:** Areopagus miangö könaŋi mi yarögö bemŋi qetŋi Ares yaŋgö kundunja.

kun miwikŋaiial. Mianğöreŋ kewö ohoget ahöi ehal, ‘Bem könaŋi qahö mötzini, yaŋğöra mein.’ Mianğöra inini bem kun könaŋi qahö möta tøndup waikŋi memba möpöseimakzei, nöŋön mönö yaŋğö könaŋi indela jibi mötme.

24*“Bem Anutunöŋ Suep gölme aka yuai pakpak mietkö uruŋire ahözawi, mi miwikŋaim enğiyök. Yaŋön Suep gölmegö Kembuŋa akza. Yaŋön jöwöwöl jike börönöŋ memenji mianğöreŋ qahö tata malja.

25 Yaŋön nanŋak malmalgö könaŋi akza. Mi aka neŋön gölmenöŋ malbinanğöra sile, uŋa (imut) aka yuai tosatŋi pakpak neŋgiiga söŋğörö ösum örömakzin. Mewö neŋgimakzawaŋğöra aka nanŋak nene me yuai kungöra qahö osiza. Mianğöra ambazip nini gumohom waŋgibingö osizin. Nini börönninan yuai qahö memba naluk al waŋgiin ewö, yaŋön mönö qahö kömuma. Yaŋön azi tandök qahö malja. Qahö.

26 “Yaŋön mutuk azi mohot miwikŋaiiga yaŋğöreŋök sehiba deŋda gwala injaŋi aka sile tosatŋi aka gölmenji gölmenji pakpak dop köla maljin. Yaŋön nalönini pakpak törörök areŋgöm neŋgiiga mianğö dop maljin aka miri gölme denike denike ahöm tat ala maljini, mianğö goraŋi aka aiwesökŋi ala jim kutuiga mianğö dop maljin.

27 Nini mönö Anutu nanŋi möt jarum waŋgibingöra yuai pakpak mi areŋgöba al neŋgiyök. Yaŋön körek pakpak kösutnineyök maljapmö, tøndup mezaŋqezan ala Anutu jaruba mala miwikŋaibin me qahö?

* 17:24: 1 Kiŋ 8.27; Ais 42.5; Apo 7.48

28 Nannini Grik mötmöt ambazipnön keu kötñi arengöba ohogeri, yeñgöreñök yahötñan mewöyök keu kötñi kun kewö jiyohot,

‘Ninia kun yañgö gwölönarökurupñi maljin.’

Azi mewöñi kunñan keu kötñi kun kewö ohoyök,

‘Yañön mönö mem letot neñgiiga yañgö aumñe malmalnini malakzin, könanini anda kamakzin aka ahöm wahötnini ahakzin.’**

29 Keu miengö dop nini mönö Anutugö gwölönarökurupñi mala kösutñeyök kinjin. Kösutñeyök kinjinmö, töndup yañgö könani möt sohoba janjuñ akinbuk. Imut ohoho azi yeñön mötmöt qakñe kinda bem kungö tandökñi mötmöriba goul, silwö me köt jamönjiñ memba urorohoba tandö lopionji söhöba menölöba memakzei, yañön mönö mewö tandök qahö akza.

30 Ambazipnön gukmaulem aka jipjap mala kotketka Anutunön nalö miangöreñ ahakmemenini möt böliiga likepñi qahö melenđa malökmö, nalö kewöñe keuñi indela kewö jiza, ‘Ambazip körek pakpak miriñini dop tat anjei, iñini mönö uruñini melenđa nöñgöreñ kaget.’

31 “Anutunön nalö ketanji ali kam kunguma. Yañön nalö miangöreñ ambazip gölmenji gölmenji pakpak mal anjei, mi tokom neñgiba keunini kewöta törörök jim teköma. Yañön azi kun keunini jim tekömapköra möwölöhöba jimtekötekögö kukösümñi böröñe alök. Yañön azi mi mem gulii kömupnöhök wahöriğa mewö mianön kukösümñi

** 17:28: Mötmöt azi ketanji Pol yañön mötmöt jakeni jakeni öñgöba Grik yeñgöreñ buk murutñi murutñi oyonđa möt kutuba miangöreñök keu kötñi kötñi amqeba memba aukñe jiyök.

ketanji mi ambazip pakpak kondel nenngiiga eka mötzin. Azi kömupnöhök wahöröhi, yanjon mönön jimtekötekö Tonina akza.”

³² ‘Anutunöñ azi kun kömupnöhök mem gulii wahöröhi,’ tosatñan keu mi möta mepaqepaiköget. Mewö aketmö, tosatñan kewö jiget, “Keu jizani, nini mi kunbuk mötpingö mötzin. Mianğöra gi ölop nalö kunöñ keu mi toroqeba jim tuariman.”

³³ Mewö aketka Polnöñ yengö sutñineyök wahöta engömosöta anök.

³⁴ Anökmö, tosatñan kaba Jisös möt nariba yambuk toroqeget. Möt narigeri, yengö sutñine Areopagus kaunsöl kambu yengö jitñememe azi kun qetñi Dionisius malök. Mewöyök ambi ketanji kun qetñi Damaris aka tosatñan yetpuk toroqeba möt nariget. Mewö.

18

Polnöñ Korint sitinöñ ani urunini melenget.

¹ Yuai mi asuhuiga Polnöñ Atens siti mosöta Grik siti kun qetñi Korint mianğöreñ anök.

² Korint anda Juda azi kun qetñi Aqila mi-wikñaiyök. Aqila yanjon Eisiagö prowinsñi qetñi Pontus mianğöreñ ahuba könanğep mindimindiri siti Rom anda malök. Mianğöreñ mali sisa kiñ qetñi Klodius yanjon jimkutukutuñi kewö alök, “Juda ambazip inini mönön körek pakpak Rom siti mosöta denme.” Mewö jiyöhanğöra aka Itali kantri mosöta Grik geba nalö mianğöreñ Korint kanğorök. Kanğoriga Polnöñ miwikñai i aka anömñi qetñi Prisila yetköreñ anök.

³ Malmalñiri nanğöbitkörä opo koumñi koumñi meyohot. Polnön mewöyök opo seri koum meme azia. Mianğöra yetkörëñ ani nupñini öröröñ ahöiga yetpuk mala ahöba opo seri koum nup mohotñe meget.

⁴ Memba malgetka Sabat kendon dop köuluk mire öngöba Juda aka Grik ambazip yembuk Jisösgö könäñi erauba mesinđa uruñini melenmegöra kuñgum eñgiba malök.

⁵ Kuñguba mali alayahötñi Sailas Timoti yetkôn Masedonia prowinsnöhök kañgorohotka Jisösgö Buñani nalö dop jim asariba malök. Mewö mala Jisösnöñ Amötqeçe Tonji Kraist akzawi, mianğö könäñi aukñe kondela keu mianön Juda ambazip uruñini kuñguyök.

⁶ Uruñini kuñguyökmö, Pol tuarenjon aka uruqeçe keu töhöreñ jim wañgigetka böröñan jeñine kuñguba sölburañi tönjörari eriga kewö jiyök, “Nönön köpösihit qahö akiga inini ayuhuba mianğö likepñi mi mönö nönğö qakne albingö osime. Mi nanñinak bisime. Inini Buña keu qetalgetka nönön ölop eñğömosöta merak kinda öngömawi, mianğöreñ kian kantri ambazip yeñğöreñ elenđa anmam.”

⁷ Mewö jiba eñğömosöta köuluk miri gorañe azi kun qetñi Titius Jastus yanğö mire öngöba malök. Yanön Juda azia qahöpmö, tondup Anutugö waikñi memba möpöseiba malök.

⁸ Gorañe anökmö, köuluk mirigö galöm qetñi Krispus aka yanğö anöm-moröñi yeñön körek uruñini melenđa Kembu möt nariget. Mewöñanök Korint ambazip tosatñi Polğöreñ keu mötkeri, yeñğöreñök

gwötpukñan Jisös möt nariba uruñini melengetka o melun mem enġiget.

⁹ Polnönj sunġem kunönj gaun ahöiga Kembunönj kutum wasöriġa imut ehiga kewö jii mörök, “Gi kenġötki kude mötmanmö, Buña keu mönö köhöiba jiba malman.

¹⁰ Siti kianġoreñ ambazip kambu gwötpuk yeñön nöngö buñaya akze. Mianġöra nöñön göbuk malbiga kunñan yuai kun qahö könahiba mem bölim gihima.”

¹¹ Mewögöra Polnönj nalöñi mem köriba yeñgö sutñine (yara) yambu mohot aka köiñ 6 mianġö dop mala Anutugöreñ Buña keu kusum enġimalök.

¹² Kusum enġimalökmö, Rom yeñön azi Galio kuñgugetka Akaia prowinsgö kiap gawönö malöhi, nalö mianġöreñ Juda jitñememe yeñön mindiriba Pol tuarenjonñ ak wañgiba öröba keu jakeñe al wañgiget.

¹³ Keu kewögöra al wañgiget, “Azi kianön ambazip enjololoñ ak enġimakza. Rom yeñön jimkutukutuñini alget ahözawi, yañön ambazip köna mi qösököba Anutugö waikñi memba möpöseimegöra uru kuñgum neñgimakza.”

¹⁴ Keu mewö silene ala jigetka Polnönj keu jimamgö aiga kiap gawönö Galio yañön Juda ambazip yeñgöra jiyök, “Juda ambazip enġö sutñine kunñan azi qei kömumbawak me pinjit bölöñi kötökñi kun akawak ewö, mianġöra nöñön ölop keuñini kezap ala mötpileñak.

¹⁵ Mimö, enġö sutñine mötnaripkö keu asuhuiga qet murutñi murutñi qeta anġururuk aka jimkutukutuñini denöwö akñei, mi mönö nanñini

lömbötņina. Nöņön yuai mewöņi mi kewöta jim tekömamaņgö dop qahö akzal.”

¹⁶ Mewö jiba keu jakeņeyök eņguataņgöiga etket.

¹⁷ Eta nanņinök mindiriba mohotņe luhuba köuluk mirigö galöm qetņi Sostenes mi qeraköba memba kaba keu jakeņangö köna numbuņe ala qeget. Qegetka kiap gawönö Galionöņ mi eka miangöra möriga öļņi kun qahö ahök. Mewö.

Polnöņ nanņi miriņe Antiokia sitinöņ lilingöyök.

¹⁸ *Polnöņ töndup toroqeba Korint sitinöņ silim gwötpuk malök. Mal teköba urumelen alauruņņi yaizözkök keuņņi jiba eņgömosöta Prisila aka Aqila etkömamba köwetnöņ geba waņgegöra mamböta tatket. Mutuk Anutugö jeņe kewö jiyök, “Nöņön Anutugö nupuņi pöndaņ kapaņ köla memam.” Keu mewö jiba mi jöjopaņ keunöņ jöhöba malök. Nalö mi teköiga köwetnöņ miri qetņi Senkria miangöreņ geba jöjopaņ keuņangöra jiiga nörop juņņi mitiget. Waņge kun Siria prowinsnöņ anmamgö ahöhi, mi miwikņaiba miangöreņ öņgöba opo seri öröba möröreņgögetka luhutnöņ nanņöi aņget.

¹⁹ Anda Efesus taonöņ aņgota Polnöņ Prisila aka Aqila etkömosörökmö, nanņak köuluk mire öņgöba Juda yembuk Jisösgö könaņi eraum mötket.

²⁰ Eraum möta kewö qesim waņgiget, “Gi ölop nalö köröpuņi nembuk malman.” Mewö qesim waņgigetmö, Polnöņ miangö urumohot qahö ahök.

²¹ Miangöra yaizözkök kewö jiyök, “Anutunöņ miangö Oņ! jima ewö, mönö ölop lilingöba eņgöreņ kamam.” Mewö jiba waņge kunöņ öņgögetka opo

* **18:18:** Jaņ 6.18

seri öröba mörörengögetka luhutnöŋ nanŋöi Efesus mosöta anget.

²² Anda taon kun qetŋi Sisaria mianŋöreŋ aŋgota waŋge mosöta gölme köna Jerusalem öngöyök. Öngöba lilingöba urumelen könagesö jölöŋini jiyök. Mi jiba tata wahöta geba Antiokia sitinöŋ anök.

²³ Antiokia sitinöŋ anda mali sonda tosatŋi teköiga engömosöta könanöŋ anök. Könanöŋ anda Galesia aka Frigia prowins yahöt mi onŋita miri dop liliköba gwarek pakpak engeka köl gulim enŋii köhöiget. Mewö.

Apolosnöŋ Efesus aka Korint nup meyök.

²⁴ Nalö mianŋöreŋ Juda azi kun qetŋi Apolos mi Efesus kayök. Apolos yaŋön Ijptkö taon qetŋi Aleksandria mianŋöreŋ ahuba mala mötmöt mire öngöi teköiga Buŋa Kimbi Walŋaŋö keuŋi ölöpŋanök möt kutuyök. Mi möt kutuba könaŋi jii keuŋi tandökŋi mianŋöra ambazip miri dop sihim gwötpuk möta söŋgaiget.

²⁵ Kembugö könaŋi wuatangöbingö könaŋi kusum waŋgigetka Anutugöreŋ könöp bölamŋan uruŋe jeyök. Jisösgö könaŋi törörök diŋdiŋi kusum enŋiba Jonöŋ o melun mem enŋiyöhi, mianŋö könaŋi ölöp möt sölöngöba jiyök. Mi jiyökmö, mianŋö likepŋi kun mosörök. Uŋa Töröŋan melun mem nenŋizawi, mi qahö mörök.

²⁶ Yaŋön kaba köuluk miri uruŋe könahiba keu ösum-mumuŋambuk jiyök. Jiiga Prisila Aqila yetkön keuŋi möta kinda waŋgirohotka yetkö mire anget. Anda Anutugö könaŋi ölöpŋanök toroqeba jim asariba jiyohotka mörök.

27 Apolosnön Grik kantrigö bahöni qetnji Akaia miangörej anmamgö möriga Efesus urumelen alaurup yeñön kötöngöm wañgiget. Kötöngöm wañgiba Akaia gwarekurup yeñgöra kimbi kewö ohoget, “Azi ki mönö köl öröm wañgime.” Apolosnön kimbi mi memba Akaia prowinsnön anda ambazip Anutugö kalem möriamñi môt asariba uruñini melenjeri, mi gwötpuk bauköm enjyök.

28 Bauköm enjgiba “Jisösnön Amötqege Tonji akza,” jiba miangö könani mi Buña Kimbigö keuñi keuñi oyoñda miangön kondel enjii mötket. Juda yeñön keu mi möta jitnakölik aketka goranora (noragora) ahuyökmö, Apolosnön Anutugö kukösum qakñe kinda keuñini aukñe qeapköiga etket. Mewö.

19

Polnön Efesus mala nup meyök.

1 Apolosnön Korint sitinön maliga Polnön Antiokia siti mosöta prowins tosatñi* oñgita mala mala köwet görañe Efesus sitinön añgorök. Añgota miangörej gwarek tosatñi miwikñaiba enjehök.

2 Engeka kewö qesim enjyök, “Inini möt nariba uruñini melenjeri, Uña Töröñan mönö nalö miangörej uruñine geyök me qahö?” Mewö qesim enjigiga kewö melenja jiget, “Uña Töröñan maljawi, nini miangö keuñi qahöpmahöp mörin.”

3 Melenja jigetka kewö jiyök, “Inini mönö wani o melun mem engigerawa malje?” Mewö jiiga

* **19:1:** Gölme mi nalö kewöñe kantri qetnji Töki (Turkey) miangö uruñe ahöza.

melenget, “Nini Jonöŋ o melungöra jiba malöhi, mönö mi mem nenget mein.”

4 *Mewö melengetka Polnöŋ jiyök, “Jonöŋ Jisösgöra keu jiba ambazip kambu uruŋini kuŋguiga kewö mötket, ‘Nöŋgö andöne azi kun kamawi, inini mönö i möt nariba uruŋini melenget.’ Mewö jii möta uruŋini melengeri, Jonöŋ i o melun mem enŋiba malök.”

5 Mewö jii mötketka Polnöŋ Kembu Jisösgö qetŋe o melun mem enŋiyök.

6 Mem enŋiba böröŋi nöropŋine aliga Uŋa Töröŋan uruŋine geiga kantri tosatŋangö keu murutŋi murutŋi könahiba jiba kezapqetok keu jiget.

7 Azi mi mindiriba 12 miangö dop malget.

8 Polnöŋ köuluk mire öŋgöba kinda Anutugö bemtohoŋangö könäŋi eraum möta awösamkakak kinda suahö ewö uruŋini kuŋgui keuŋi qeapköbingö osiba malget. Mewö malgetka köiŋ karöbut teköyök.

9 Qeapköbingö osigetmö, tosatŋan yangisen aka qahö möt nariba Kembugören könaŋi aukŋe jim böliba ambazip jeŋine luasö jiba kinget. Mewö jiba kingetka Polnöŋ kewöta menden enŋiba enŋömosöta gwarekurupŋi enŋuangiriga tikep anget. Tikep anda azi qetŋi Tiranus yangö qenjarök mötmöt jakenöŋ silim dop (aua 5 tokoba) kusum enŋiiga eraum-mötmöt aka malget.

10 Mewö aka malgetka Kembugö Buŋa keuŋan sehiiga (yara) yambu yahöt teköyök. Mi teköiga Buŋa keu mi Eisia prowins uruŋe miri toni aka

* 19:4: Mat 3.11; Mak 1.4, 7-8; Luk 3.4, 16; Jon 1.26-27

Juda ambazip pakpak yengö kezapñine gei môt teköget. Mewö.

Sewa nahönurupñan öme közölbängö osiget.

¹¹ Anutugö kukösumñan Polgöreñ angoriga nup memba böröñi ambazip nöröpñine ali Anutunöñ angöletot murutñi murutñi meiga asuhuget.

¹² Mewö mali ambazip kawöl engöhöi malgeri, tosatñan Polgö sileneyök nöngöp mitimiti aka opo johannñi tosatñi mewöyök memba anda kaba qakñine algetka kawölñini engömosöri ömenjini kota angetka ölöwaket.

¹³ Juda sile galöm tosatñan liliköba öme enguatanögöba anda kaba malgeri, yeñön mewöñanök könahiba ömenöñ kölköljinjin mem engigeri, yengö qakñine Kembu Jisösgö qetñi qeta ösumñi köl öröbingö esapköget. Esapköba kewö jiget, “Polnöñ Jisösgö qetñi qeta uru kuñgum neñgimakzawi, nöñön mönö Kembu miangö qetñe öme kota kesalmegöra jim kutum engizal.”

¹⁴ Jisösgö qetñi mewö qetkeri, yengö sutñine Juda jike nup galöm bohonñi qetñi Sewa yangö nahönurupñi 7 yeñön mewöyök malget.

¹⁵ Yeñön ömewöröme kun mewö jim kutum wangigetmö, yeñön melenja kewö jim engiyök, “Ni Jisös môt wangizal aka Pol môt wangizalmö, injini mönö niñia?”

¹⁶ Mewö jim engiba azi uruñe kinöhanöñ mönö luhuba qakñine öngöba qeraköba engömeyök. Mewö körek pakpak luhut ala yaijapaleleñ mem engiba silenjini kutumutuba opo malukuñini munjukunjurariyök. Munjukunjurariga nanñik nanñik silenjine sepgwörörök eta kini tököba kesala

miri uruñi mi mosöta silenini gwamönñi aukñe eta angaiget.

17 Mewö asuhuiga Juda kian aka gölme toni Efesus malgeri, körek yeñön miangö buzupñi möta gwötpuk auruba awöwöliget. Awöwöligetka tosatñan Kembu Jisösgö qetñi kapan köla möpöseigetka aködamunñambuk ahök.

18 Möt nariba uruñini melençeri, yeñgöreñök gwötpukñan anda siñgisöndokñini indela jim köleñget.

19 Tosatñan qarösoñgo amötqeçe memba malgeri, yeñgöreñök gwötpukñan buk papiañini memba kaba tokoba ambazip pakpak yeñgö jeñine kinda aukñe könöpnöñ gilget jeyök. Buk papia miengö söngöröñini oyonça mindirigetka mindimindiri jañgöñini mi silwö moner (Kina) 50.000 miangö dop ahök.

20 Tandök mewö aketka Kembugö Buña keuñan mönö ösum-mumuñambuk sehiba köhöiba anök. Mewö.

Polnöñ nupñangö areñi alök.

21 Yuai pakpak mi asuhum teköiga Uña Töröñan Pol sölölohöm wañgi keuñi jöhöba kewö jiyök, “Ni köwet kutuba Grik kantrigö likepñi yahöt Masedonia aka Akaiia miangöreñ liliköbi teköiga mosöta Jerusalem sitinöñ anmam.” Mewö jiba toroqeyök, “Miangöreñ anda tata Jerusalem mosöta Rom siti mewöñanök anda ekñam.”

22 Mewö jiba neñakñi yahöt Timoti aka Erastus melaim etkiiga Masedonia anohotka nanñak toroqeba nalö tosatñi Eisia prowins uruñe malök. Mewö.

Efesus yanön bim karim aket.

23 Efesus sitinöŋ Kembangören köna wuatängögetka miangöra nalö miangören enjololon göjupmajup keta bölökŋi asuhuyök.

24 Silwö nup meme azi kun qetŋi Demitrius yanön silwö ohoiga kolkolgöiga qekötahöba bem ambi qetŋi Artemis yangö jöwöwöl jikegö dop imut morömorö memba malök. Mi meiga bohonŋi memba malgetka monen öngöngöŋi öröi kölköl-örörö alaurupŋan mendenŋa meget.

25 Megetka Demitrius aka kambu tosatŋan nup mewöŋi memba malgeri, mi mohotŋe engoholi kaba tokogetka kewö jii mötket, “Azi alaurup, nini nup ki meinga bohonŋi ölopŋi asuha kamakza, mi mötzin.

26 Mi mötzinmö, Pol azi mianön Efesus kiangören kangota ambazip uruŋini esiba ki aka Eisia prowins pakpak dop köla ambazip kambuŋi kambuŋi kuŋum engii janjuŋ akzei, mi nalö kewöŋe ölop eka mötze. Yanön kewö jimakza, ‘Bem börönöŋ memenŋi mi bem ölnŋi qahö.’

27 “Mewö jiba maliga nini kölköl-örörö nup-nini memakzini, miangö qetŋi mem bölii jijiwilit akepukö urulömböt akza. Aka miyöhök qahöpmö, urulömböt kun kewö ahöza: Ambazip pakpak Eisia prowins uruŋe aka gölmenŋi gölmenŋi pakpak miangören bem ambi öngöngöŋi Artemis waikŋi memba möpöseimakzei, yangö bem qetbuŋaŋi ketanŋan ayuha ösumŋan etpapuk aka jöwöwöl jikenangö qetŋan böliba ambazip jenine eta omanŋi akapuk. Urulömböt mewö ahöza. Miangöra waimanjat möta keu ki jizal.”

28 Demetriusnõj mewö jiiga sunğurum alaurupñan mi möta irimñini seholiiga kewö jiba qet gigilahöget, “Efesus neñğoreñ Artemis mi öñğöñğöñi!”

29 Qet gigilahögetka enjololõj göjupmajup mianñõn sehiba sehiba siti körek dop kölok. Mewö aiga Masedonia azi yahöt qetñiri Gaius aka Aristarkus Polgö sunğurumyahötñi mi qeraköba etkömemba örörahöm etkiba qezakqezak mirinõj anda totoko alget.

30 Totoko algetka Polnõj mewöyök ambazip kambuleleme yenğö sutñine anmamgö mörökmö, urumelen ambazipnõj i anğön köl wanğiget.

31 Eisia prowinsgö galömkölköl azi tosatñan Polgö alaurupñi akeri, yenñõn mewöyök kolek ala kewö ulet wanğiget, “Qezakqezak mirinõj totoko aljei, gi mönö nangi mianğoreñ kude kondel enğiman.”

32 Totoko algeri, mianğoreñ ambazip gwötpukñan kinda tokogeranğö könani kun qahö mötkeranğöra nanñik nanñik lanlan qet gigilahöba siksauk enjololõj ketanji megetka sehiba anök.

33 Mewö ani Juda yenñõn azi qetñi Aleksander kuñguba nanğögetka kambu yenñõn öröba köna algetka qaikñe eu öñğöba kinök. Öñğöba kinda ambazip jemesoholñine keu likepñi meköba jimamgö möta börö pözõj misiba aiwesök mem enğiyök.

34 Aiwesök mem enğiyökmö, Juda azia akzawi, mewö möt kutuba mianğoreñök numbuñini mindiriba körekñan könahiba keu kewö qetket, “Efesus neñğoreñ Artemis mi öñğöñğöñi!” Mewö qeta mala aua yahötkö dop silata qeta kinget.

³⁵ Qeta kingetka siti pomñan ambazip kambu uruñine memba eta ali göröñ algetka kinda kewö jiyök, “Efesus ambazip, nini nanine siti kianğoreñ Artemis öngöngöñi mi möpöseiba maljin. Nini yangöreñ jöwöwöl jike aka köt imutñi kömbukñi Suepnöhök eröhi, mi galöm köla maljin. Keu mi inini körek ölop mötze.

³⁶ Mi kunñan qañ kölmawañgö dop qahö. Mianğöra inini mönö uruñini ösöñ memba eta ala böñjöñ malme. Kezapjupjup yuai kun kude akñe.

³⁷ Azi ki jöwöwöl jikenöñ öngöba yuai kun qahö kiom qeba mem böliyohot. Bem ambinini qahö ilit wañgiyohot. Inini töndup i etkuwañgitketka ki kinjahot.

³⁸ “Demitrius aka yangö kölköl-örörö alaurupñan tosatñi yembuk añgururuk aka keu jim añgubeak ewö, kiap mönö ahöze aka keu jakegö totokoñi totokoñi mi keu mindiñgöbingöra alakze. Mianğöra mönö ölop mianğoreñ anda keu jakeñe al añguba aröñda kingetka dop kölma.

³⁹ Inini yuai kun toroqeba jibingö mötpeak ewö, siti kianğö toñan mönö ölop könagesö öröm eñgiiga qenjarök sombemnöñ tokoba keu kewöta jim teköme.

⁴⁰ Merak eñololon göjupmajup ketañi ki könañi qahöpmö, töndup imbisölöm asuhuzawi, mi Rom gawman yeñön möta kewö jibepuk, ‘Efesus yeñön Rom mindimindiri gawman qetala bim karim akze.’ Mewö jiba keu jakeñe al neñgibepuk. Mianğö urulömbötni akza, mi mötzal. Keu jakeñe al neñgiba karim kianğö könañangöra qesim neñgibeak ewö, nini mönö likepñi gagabe köla

jibinanğö dop qahö mötzin.”

⁴¹ Efesus siti pomñan keu mewö jiba ambazip kambu köndenğ enğıiga sörörauba denđa anget. Mewö.

20

Polnön Masedonia aka Grik anda nup meyök.

¹ Efesus miangörenğ göjupmajup miangön sörauba teköiga Polnön gwarekurupñi enğoholi kagetka urugö nanğönanğö keu qambañ enğiba yaizözkök jiba enğömosöta Masedonia prowinsnönğ anök.

² Masedonia anda gölmeñi gölmeñi kutuba liliköba miangörenğ qambañ keu gwötpuk jiba mala Grik kantrinönğ kayök.

³ Grik kaba köiñ karöbut malök. Mi mal teköiga wañge memba köwet kutuba Siria an-mangö mörök. Mewö mörökmö, Juda jitñememe yeñön könanönğ qebingö anğönañi algetka kezapñe gei mörök. Mi möta miangöra Masedonia prowins kutuba gölme köna miriñe lilingömamğö keuñi uruñan jöhöyök.

⁴ Keuñi jöhöi sunğurumurupñi kewöñan yambuk anget: Berea azi qetñi Sopater Pirusgö nahönñi, Tesalonaika azi qetñiri Aristarkus aka Sekundus, Derbe azi qetñi Gaius, Timoti aka Eisia prowinsgö azi qetñiri Tikikus aka Trofimus.

⁵ Yeñön qeljine Troas anda miangörenğ neñğöra mamböta malget.

⁶ Troas anda malgetmö, Luk ni aka tosatñi neñön beret yistñi qahöpkö kendon mi Filipai sitinönğ tarin. Mi tarin teköiga wañgenönğ öngöinga opo seri öröba möröreñğögetka luhutnönğ nanğöi anda

wehön 5 aiga Troas yeᅅgöreᅅ aᅅgorin. Troas aᅅgota miangöreᅅ wehön 7 toroqeba malin. Mewö.

Polnöᅅ nalö kondikᅅi Troas malök.

⁷ Wehön 7 malin teköiga Polnöᅅ wehön 8 miangöreᅅ eᅅgömosöta anmamgö mörök. Mi möta suᅅgem kondikᅅi Sondagie miangöreᅅ tokoba Jisös mötmöriba beret mindipköbingöra tarin. Mewö taringa Polnöᅅ yembuk eraum möta keuᅅi jim köriba mali mali suᅅgem bibiᅅi ahök.

⁸ Nini miri uruᅅi kungö qakᅅe eu öᅅgöba tokoba taringa lambe gwötpukᅅan jeba asariget.

⁹ Tokoba taringa azi gwabö kun qetᅅi Yutikus yaᅅön jeᅅgenanᅅöᅅ tarök. Tari Polnöᅅ keu jiba mali möri nalö köriiga gaunᅅanᅅö möta ahöba gwörörök öröba könakembayök tala imbiᅅi qahö möta miri uruᅅi karöbut oᅅgita gölmenöᅅ geba qeyök. Geba qeiga luhuba geba memba wahöringa kömuyöhi, ehin.

¹⁰ Mewö ehinmö, Polnöᅅ geba kepölaköba jiyök, “Kunbuk söᅅgöro ösum ala guliza. Miangöra kude awöwöliget.”

¹¹ Mewö jiba kunbuk eröhanᅅöreᅅ öᅅgöba beret mindipköba neyök. Nemba yembuk nalö köröᅅᅅi keu jiba mala mala miri gianᅅigun eᅅgömosöta könanöᅅ anök.

¹² Aniga azi gwabö mi waᅅgitketka guliba malöhi, mi eka urukölalep ketanᅅi möta anget. Mewö.

Polnöᅅ Troas mosöta Miletus anök.

¹³ Yeᅅön angetmö, Polnöᅅ nanᅅak gölme köna anmamgö möta kewö jim kutum neᅅgiyök, “Inini mönö qelᅅiᅅe köwet köna miri qetᅅi Asos

miaᅅgöreᅅ angetka aitongöba noaᅅgitketka waᅅgeᅅöᅅ öᅅgöbin.” Miaᅅgöra neᅅön mosöta waᅅgeᅅöᅅ öᅅgöinga opo seri öröba möröreᅅgögetka luhutnöᅅ naᅅgöi anda Asos miaᅅgöreᅅ aᅅgorin.

¹⁴ Asos aᅅgota nembuk aitongöba Pol waᅅgiringa waᅅgeᅅöᅅ öᅅgöba miri qetᅅi Mitilini miaᅅgöreᅅ anin.

¹⁵ Mitilini anda miaᅅgöreᅅ opo seri kunbuk öröba möröreᅅgögetka luhutnöᅅ naᅅgöi anda mala ahöba wahöta gölme jöhanni qetᅅi Kios miaᅅgö kösutᅅe aᅅgorin. Aᅅgota toroqeba kutuba anda ahöba wahötagun miri qetᅅi Samos miaᅅgöreᅅ geba kunbuk anda ahöba wahöta miri qetᅅi Miletus miaᅅgöreᅅ kewögöra aᅅgorin:

¹⁶ Polnöᅅ “Yambu döläkᅅi (Pentekost) mi esapköba Jerusalem sitinöᅅ tatmam,” jiba nalö ayuhubinbuköra ösumok anbingö mörök. Miaᅅgöra Eisia prowinsnöᅅ nalö köröpᅅi ayuhubinbuköra möta waᅅgeᅅöᅅ öᅅgöba Efesus siti oᅅgitpingö keuᅅi jöhöi malin. Mewö.

Polnöᅅ Efesus yeᅅgöra keu kondikᅅi jiyök.

¹⁷ Miletus aᅅgoringa Polnöᅅ Efesus yeᅅgöra kolek ala urumeleᅅ köᅅnagesögö jitᅅememeurup yeᅅön eta kamegöra köᅅ öröm eᅅgiyök.

¹⁸ Köᅅ öröm eᅅgii miri qetᅅi Miletus miaᅅgöreᅅ kaᅅgotketka eᅅgeka kewö jii mötket, “Nöᅅön nalö mutukᅅi Eisia prowinsnöᅅ kayali, miaᅅgöreᅅök köᅅnahiba nalö pakpak embuk mala kota nup meali, iᅅini miaᅅgö tandökᅅi öläp möt yaköze.

¹⁹ Nöᅅön Kembugö jeᅅe uruni mem et al aᅅgum teköba nupᅅi denöwö memba kota malali, iᅅini mi öläp mötze. Nupᅅi memba ambazip eᅅgöra sahöta

imbilni eriga malal. Juda yeñön uruñini qahö melenjeri, yeñön nalö tosatñi miangöreñ silenöñ alal aket aka nunğubingöra areñ asa-asambötni ala malget. Mi ala malgerağgöra aka esapesap murutñi murutñi miwikñaiba sihimbölö möta malal.

²⁰ “Nöñön Buña keu mem ölöwak engimakzawi, mi jim asarim engiba malal. Mi qenjaröknöñ tokoba aka miriñi miriñi miangöreñ öngöba kusum engiba malal. Nöñön miangöra poraiba nup qahö mosöral.

²¹ Nup qahö mosöralmö, Juda kian aka gölme toni engöra mewöyök keu kötni kewö nağgöba jiba malal, ‘Inini mönö uruñini melenđa Anutugöreñ qekötahöba Kembunini Jisös Kraist möt narim wağgime.’ Inini mi pakpak ölop möt teköze.

²² “Mötket, merak Uña Töröñan ni Jerusalem sitinöñ anmamgö kuğgum niğgiza. Miangöreñ anbi wani yuai asuhum niğgimawi, mi qahö mötzal.

²³ Mohok-kun kewö mötzal: Nöñön taon denike denike anda malali, Uña Töröñan miangöreñ sañep ala kewö nağgöba jii möta malal, ‘Gi mönö ka-hasililiğ möta malnöñga kösö mire al gihigetka tatman.’

²⁴ *Mewö jii möta malalmö, muat. Nöñön toroqeba malbilenjak me kömumbilenjak, mi keu kun qahö ak niğgiza. Mi qahöpmahöpmö, Kembu Jisösnöñ nup al niğgiyöhi, nöñön mönö mia mem yakömamgö möt köhöizal. Yañön nöğgöra kewö jiyök, ‘Anutunöñ kalem möriamñi ambazip engimamgö mötzawi, gi mönö miangö Ölöwak Buñañi jim asariba malman.’ Miangöra gölmenöñ malmami me kömumami, mi mönö yuai omanñi

* **20:24:** 2 Tim 4.7

kötökñi ak niñgiza. Ambazip mönahotkö aonjit akzei, kunñan miangörej kemberje kutuba luhut qahö alma. Nöñön mönö miangö dop nupñi memba kemberje kutuba mosötpileñbuköra ösumni pakpakñan kapan köla anda malmam.

25 “Mewö malmam-mö, mötket, nöñön engö sutñine anda kaba Anutu bemtohoñangö könani jim asaribi mötkeri, iñini nöngö jesöñgöröni mi kunbuk qahö ekñe. Engöreñök kunñan kun qahö nekñawi, merak mewö mötzal.

26-27 Miangöra nöñön iñini Anutugö jitñi pakpak wuatangömegöra jiba uru kungum engiba malal. Mi mönö qahö poraiba mosöral. Miangöra engöreñök kunñan kun siñgisöndokñangöra sohoba kömumba könöp sianöñ gema ewö, iñini mönö ni jim niñgibingö osime. Nöñön mi merak engöra aukñe nangöba jim köhöizal.

28 “Kembunöñ nanñi sepñi mokoba miangön könagesöurupñi bohonñini meiga buñani ak teközei, iñini mönö i lama ewö galöm köla köyan köl engiba malme. Uña Töröñi yañön nanñak nup mi al engiyök. Miangöra iñini mönö nanñini aka Kembugöreñ lama kambu yeñgöra galömñini mem añguba malme.

29 Nöñön anbiga miangö andöñe ambazip kanjamñinambuk mi kiam kalñi ewö engö sutñine asuhume. Yeñön asuhuba lama kambu engöra qahö möta piakñi aka lañ kaba engöhöme, mi mötzal.

30 Nanñini sutñineyök azi tosatñan wahöta kinda Jisös gwarekurupñan göräñe anmegöra öröm engiba muney keu jiba malme.

³¹ Mianğöra inini mönö uruguliguli mala keu ki uru könömñine ala mötmörime: Nöñön (yara) yambu karöbutkö dop sunğem asak qambañ keuñi keuñi mi inini mohot mohot qösösök (qörörök) kusum engiba malbiga imbilni erök.

³² “Nöñön merak inini Anutugö böröñe al engiba kewö jizal: Yangö Buña keuñan mönö kalem möriamñi indela köyan köl engimakña. Anutunöñ köhöiba uruñini nanğöba möhamğöiga ölop köhököhöi miwikñaiba mutulangömakña. Inini Anutubuk lapingögetka alaurupñi pakpak tök kutum enğiiga sarakñi akzei, mönö yenğö sutñine anğota dum tatatñini memba oyaenğoyaen aka malme.

³³ Ni enğörenök kungö guli jalö me moneñ opo mi qahö buña qem anğumamğö möta malal.

³⁴ Ni aka sunğurumurupnan yuaigöra osiba malini, mi mönö nani böröni kianñon nup memba miwikñaiba malal.

³⁵ “Mi pakpak aka memba silik ölopñi kondel enğial. Inini mönö mewöñanök nup memba malme. Mewö mala ambazip löwöriba nup memegö osizei, mi ölop köyan köl engiba malme. Nup megetka ölni ahuiga Kembu Jisösgöreñ keu ki mötmörime: Yanñon nanğak keu kun kewö jiyök, ‘Inap yuai buña qem anğugetka teköba pömsöm qeiga öne malmemö, tosatñi yenğöra yuai kalemñina enğigetka Anutunöñ likepñi melenñiga oyaenğoyaen akña.’ Mewö.”

³⁶ Polnöñ keu mewö jiba eta simin köla körek yembuk Anutu köuluköyök.

³⁷ Köuluköiga körek yenñon amburereñ aka urusahöt qeba anğum wanğiba numbuñi yöhötım

neget.

³⁸ Polnön mutuk keu kun kewö jii mötket, “Injini nönögö jesöngöröni kunbuk qahö ekne.” Keu mewö möta miangöra wösöbirik öngöngöni möta kinda wangita wangenön öngöba yaizözkök jiba umbulget. Mewö.

21

Polnön Jerusalem anök.

¹ Yaizözkök jiba nenömosötketka opo seri öröba mörörengögetka luhutnön nangöi anda gölme jölanni qetji Kos miangören göröken diñdianök anda angorin. Angota ahöba wahöta toroqeba gölme jölanni qetji Rodos miangören anin. Miangörenök toroqeba Lisia prowinsgö mirinji qetji Patara miangören angorin.

² Angota kinda wange kun Fonisia gölmenön anmangö ahiga mi miwikñaiba miangören öngöinga opo seri öröba mörörengögetka luhutnön nangöi anin.

³ Anda mala gölme jölanni qetji Saiprus miangö kösutje kaba eka mösököba Saut görökenök öngita toroqeba luhutnön nangöiga Siria prowins göröken anin. Anda “Wangegö inapni mi Taiö taonön anda wangenhök memba albin,” jigerangöra miangören anin. Miangören anda wange mosöta gein.

⁴ Geba gwarekurup miwikñaim engiba yembuk toroqeba wehön 7 malin. Miangören malinga Uña Töröñan sölölohöm engii Pol Jerusalem sitinön anbabuköra galöm meme keu jiget.

5 Mi jigetmö, nini wehön 7 mi yembuk malin teköiga engömosöta köna anin. Köna anbin jinganga yejön körek pakpak anöm-moröurupñinambuk nengubula taon mosöta sileje kaget. Taon sileje kaba köwet sakje eta simin köla Anutu köuluköin.

6 Köuluköba yaizözköknini jim anginga Jerusalem anbingöra wanjenöj öngöinga yejön mirinjine lilingöget.

7 Pol aka nini yangö sungurumurupñan mewö Taiö mosöta toroqeba anda miri qetji Tolemes miangören angota wange mosörin. Wange mosöta urumelen alaurup jölöjini jiin aka yembuk wehön mohot malin.

8 *Mala ahöba wahöta engömosöta gölme köna anda Sisaria taonöj kangorin. Jerusalem urumelen kambu uruje urukungukungu azi (ewanjelis) sewen meköm engigeri,* yengörenök kun qetji Filip yanön Sisaria malök. Nejön Sisaria kangota yangö mire anda tata ahöin.

9 Filipkö böraturupñi 4 malget. Anutunöj ambi seram miengö urujine kezapqetok keu jijigö mötmöt kalem aliga malget.

10 *Nejön Sisaria taon miangören wehön gwötpuk toroqeba malin. Miangören malinga Juda prowinsnöhök kezapqetok azi kun qetji Agabus erök.

11 Nengören eta Polgören örigit memba mianön nanji köna böröni jöhöba kewö jiyök, “Uña Töröñan kewö jiza, ‘Juda jitnememe yejön örigit kiangö tonji

* 21:8: Apo 6.5; 8.5 * 21:8: Aposol nup meme boñ 6 miangören azi 7 mi meköm engigetka nangönanö nup aka ewanjelis nup mi mindiriba meget. * 21:10: Apo 11.28

mi Jerusalem sitinöŋ kewö jöhöba kian kantrigö galöm† yengö böröŋine alme.’ ”

12 Mewö jii möta nini aka urumelen alaurup miangören malgeri, yeŋön mohot Polnöŋ Jerusalem anbapuköra uleta qetal waŋgiin.

13 Qetal waŋginga kewö melenŋa jiyök, “Inini mönö denöwö akze? Sahöta keu jiba mewö miangön uruni munjuritze. Nöŋön Jerusalem anbi gwaröhöm niŋgimegöra jöjörözal aka miyök qahöpmö, Kembu Jisös qetŋangöra aka nuŋgugetka kömumbilenjak, nöŋön mönö miangöra mewöyök jöjöröba kinjal.”

14 Mewö jiiga mölöwörim waŋgibingö osiba urunini bönjöŋ köliga kewö jiin, “Mi mönö Kembangö jitsihitŋangö dop asuhuma.”

15 Sisaria taonöŋ malin nalö mi teköiga amgöba mözözömgöba engömosöta anda Jerusalem sitinöŋ öŋgöin.

16 Sisaria miangörenök gwarek tosatŋan mewöyök neŋgö köinini kaget. Kaget yeŋön kewö jiget, “Inini Saiprus azi qetŋi Nason yaŋgö mire ahöba malme.” Mewö jiba neŋguaŋgita yaŋgö mire anin. Nasonöŋ mutuhök uruŋi melenŋa Jisösgö gwarekŋi aka mala korök. Mewö.

Polnöŋ Jerusalem sitinöŋ kaŋgorök.

17 Neŋön Jerusalem aŋgoringa urumelen alaurup yeŋön neŋgömemba söŋgaiba jölöŋnini jiget.

18 Jölöŋnini jigetka ahöba wahöta Polnöŋ nembuk bisop Jeims ekingö möta anin. Aninga

† 21:11: Kian kantri yengö böröŋine alget, mi Rom gawman yengöra jiza.

urumelen könagesögö jitnememe yeñön körek pak-pak miangören kanjuta tatket.

19 Tatketka Polnön jölönini jiba kösohotni alök. Anutunön köiput aka nam köl nenngiiga kian kantri yeñgö sutñine anda liliköba misin nup meinga ölni ahuyöhi, miangö kösohotni mesinda mohot mohot mi körekñanök jii mötket.

20 Mi jii möta Anutu möpöseigetka azi ipñi kunjan kewö jiyök, “Pol alanini, Juda ambazip tausenni tausenni yeñön Jisös möt nariba uruñini melenja töndup körek pakpak toroqeba Mosesgö Köna keu mi törörök wuatangöbingö kapan kölje.

21 Mewö kapan köljemö, göhö buzupki mi kewö lañ jiget mötket, ‘Juda ambazip denja kian kantri yeñgö sutñine anda maljei, göñön liliköba i kewö kusum enjiba maljan, jimakze, “Inini mönö Mosesgö köna keu andö qeba Anutugören aiwesök mi azi morosepsep silenine kude yandime aka Juda ahakmeme tosatni mi kude wuatangöme.” ’

22 “Mi jimakzeangöra aka göñön kazani, yeñön mi möta miangörenök öröba kambu ketani köla tokobeak. Miangöra nini waimanjat möta mönö denöwö ahinga dop kölbawak?

23 *Miangöra neñön dölki keu göhöra jibini, göñön mönö miangö dop akñan. Azi 4:ñan yuai akingö keuñini Anutugören jiba jöjöpañ keunön jöhöget.

24 Mi keunön jöhögetmö, monengöra osiba mamböta sutnine ki malje. Miangöra göñön mönö i engömembra yembuk köl könjörat ak anguba yeñgöra aka naluk alnonga dop köli ölop nörop jupñini

* 21:23: Jan 6.13-21

mitigetka keuḡini köhöima. Göḡön mewö aka Mosesgö Köna keu tem köla wuatangöba maljani, körek pakpak göhö könaḡamgi mi törörök eka möt asarime. Mi möt asariba göhöra keu jiget mötkeri, mi ölnḡi kun qahö miwikḡaigetka omanḡi aiga kömuma.

²⁵ *Göhöreḡ keu kömumapmö, kian kantri yeḡön Jisös möt nariba uruḡini melenḡeri, neḡön yeḡöra keu kewö jöhöba kimbi ohoba alin anök, ‘Sömbup busuḡi bem lopionḡ yeḡö naluk buḡa qeba könaḡine algetka ösumḡinan walöḡnöhi, mi mönö kude neme. Mewöyök sep me sömbup jölḡini qeḡeḡi miangö busuḡi mi kude neme. Serowilin kude akḡe. Yuai kanḡamḡambuk 4 mi mönö mosöta andö qegetka dop kölma.’ ”

²⁶ Jitḡememe yeḡön mewö jigetka Polnöḡ azi 4 mi enḡömemba ahöba wahöta yembuk köl köḡjörat ak anḡuget. Ak anḡugetka jöwöwöl jikenöḡ öḡgöba azi mohot mohot enḡöra naluk ala jöwöwöl ohogetka köl köḡjörat nalöḡini tekömawi, miangö nalö buzupḡi jii mötket. Mewö.

Jöwöwöl jikeḡö tohoḡ uruḡe Pol memba jöhöget.

²⁷ Polnöḡ mi jii mötketmö, silim 7 mi tekömamḡö aiga Juda tosatḡi Eisia prowinsnöhök kageri, yeḡön Pol jöwöwöl jikenöḡ öḡgöi eket. Eka ambazip kambu körek uruḡini kuḡum enḡiget wahöri Pol qeraköba meget.

²⁸ Qeraköba memba kewö qetket, “Israel ambazip, mönö bauköm neḡiget! Azi kianḡön mönö gölmeḡi gölmeḡi liliköba miri dop kusum enḡiba uruḡini kewö kuḡum enḡimakza: Inḡini pakpak

* 21:25: Apo 15.29

mönö Israel ambazip kambu qetala mem bölim neŋgime. Nanine Köna keu mosöta jöwöwöl jike-nine laŋ öngöba iwilele aka malme. Mewö kusum eŋgiba malök aka merak Grik azi mi tok waŋgita jöwöwöl jikenöŋ öngöiga miri kömbukŋi kianön mönö töwiba kölköljinjinambuk akapuk.”

29 *Mi kewögöra qetket: Efesus azi Trofimus yaŋön mutuk siti könanöŋ Polbuk ani etkeka kewö mötmöriget: Polnöŋ i waŋgiri mohotŋe jöwöwöl jikenöŋ öngöbahotpuk.

30 Mewö qetketka ambazipnöŋ eŋololoŋ aka ösumŋinan luluŋda kaba tokoba göjupmajup aketka qeburuŋ ketanŋ yöhöi siti körek dop kölök. Mewö aiga Pol qeraköba jöhöba jöwöwöl jikenöhök öröba yaigep eta miangöreŋök jikegö kiripo naŋgunŋi pakpak mi miangöreŋök köla jöhöget.

31 Pol jöhöba qebingö kapanŋ kölgetka buzupŋi sehiba Rom yarö kambugö suahö galöm bohonŋi yaŋgö kezapŋe keu kewö geiga mörök, “Jerusalem pakpak yeŋön karim aka bim qeze.”

32 Mewö möta miangöreŋök yarö azi kambu tosatŋi suahö galömŋinambuk eŋguaŋgita luhuba yeŋgöreŋ geget. Gegetka i eŋgeka Pol qegeri, mi mosötket.

33 Mosötketka suahö galöm bohonŋan sutŋine anda jim kutuiga Pol memba tapep (muŋgamuŋga) yahötnöŋ jöhöget. Jöhögetka kewö jiba qesim eŋgiyök, “Azi ki ninia?” aiga “Wania aiga qeze?”

34 Qesim eŋgiyökmö, ambazip kambunöhök keu murutŋi murutŋi melenŋda laŋlaŋ qetket. Mewö laŋlaŋ qeta göju megeraŋgöra aka könanŋi törörök

* 21:29: Apo 20.4

mötmamgö osiyök. Mi osiba mianğöra jim kutuiga Pol waŋgita yarö azi yeŋgö ain kiripo uruŋe anget.

35-36 Waŋgita angetka ambazip kambu ketani yeŋön könaŋine eŋguataŋgöba kaba kewö qetket, “Mönö qeget kömuma. Yapmakek!” Mewö qetketka yarö azi yeŋgö ain kiripo naŋguŋe aŋgoriga könöpuk anda kaba göjupmajup ketani akeranğöra aka gwötpuk lömböriyök. Mianğöra yarö azi yeŋön Pol memba aŋguba anget. Mewö.

Polnöŋ keuŋaŋgö likeŋi könahiba melenđa jiyök.

37 Aŋguba kaba yarö azi yeŋgö sel uruŋe öŋgöbingö aketka Polnöŋ suahe galöm bohonŋi kewö qesim waŋgiyök, “Ni göhöra keu kun ölop jimam me qahö?” Qesim waŋgiiga möta köŋkuŋ aka jiyök, “O, gi Grik keu mötzan me?”

38 Mianğöra gi Ijpt azia akzan me qahö? Ijpt azi kunŋan uruwale tuarenjoŋ azi timbiŋinambuk 4000 mi eŋololoŋ ak eŋgiiga Rom gawman tuarenjoŋ aka bim karim könahiba aka eŋguaŋgiri gölme qararaŋkölkölŋe anget. Gi galöm azi mia akzan me qahö?”

39 Mewö jiiga Polnöŋ jiyök, “Ni Juda azia. Ni Silisia prowinsgö taon qetŋi Tarsus mötzani, mönö mianğöreŋ ahuba mala koral. Mianğöra qesim gihibi: Gi ölop jinöŋga nöŋön ambazip kambu kienğöra keu jibi mötme.”

40 Mewö jiiga “Ölop jiman,” jiiga Polnöŋ döpnöŋ kinda ambazip eŋgöra böro misiyök. Böro misiiga göju mosöta keu bök kingetka Hibru keunöŋ keu kewö jii mötket,

22

¹ Polnön kinda kewö jiyök, “Azi alaurupni, nönön keugö likepni jimami, mi mönö kezap ala mötket.”

² Hïbru keunön keu jii möta keunini körek bököm teköi kingetka toroqeba jiyök,

³ *³“Ni Juda azia. Ni Silisia prowinsgö taon qetni Tarsus miangören ahubiga Jerusalem siti kiangören galöm köl ningigetka mala qarial. Mala qariba kota böhi qetni Gamaliel yangö keu bapne tatpiga yanön Juda amböskonurupnini yengören Köna keu aka ahakmeme mi törörök kusum ningiiga miangö mötmötni möta malal. Merak enön körek pakpak Anutugö keu bapne angota kapan köla yangöra bim qeba maljei, nönön mönö miangö dop aka malal.

⁴ *⁴Mewö mala ambazip Kembangö könani wuatangöba maljei, mi köndenja sesewerowero ak engibiga sihimbölö möta tosatjan kömuget. Nönön ambazipni ambazipni enguangita tapepnön (mungamunga) jöhöba kösö mire al engial.

⁵ Jike nup galöm bohonni aka jitnememe pakpak yenön mi ölop mötze aka yengören anda qesim engiinga mi ölop nangöba jibeak. Yenön Juda azi ipni Damaskus sitinön maljei, yengöra kimbi ohoba ningiget memba malal. Miangören ambazip Kembangö könani wuatangöba maljei, nönön mönö mi mewönanök ‘Likepni melen engimegöra gwaröhöm engiba Jerusalem ki enguangitmam,’ jiba könanön anal.”

* 22:3: Apo 5.34-39 * 22:4: Apo 8.3; 26.9-11

Polnön nanji urumelenan gö könanji jiyök.

Apo 9.1-19; 26.12-18

⁶ “Könanön analmö, Damaskus siti dopdowibiga mianğoreñ yuai kun kewö asuhuyök: Silim bibiñe mianğoreñ asakmararañ ketanji kun Suepnöhök wölbilik ewö asuhuba wölañ eta turum niñgiyök.

⁷ Turum niñgiiga tala gölmenön eta ahöbiga Suepnöhök keu kun kewö asuhui möral, ‘Sol Sol, gi mönö wuanöngöra sesewerowero qakñe al niñgimakzan?’

⁸ Mi möta melenjal, ‘Kembu, gi dañon?’ Mewö melenbiga jiyök, ‘Ni Nazaret azi Jisös, sesewerowero qakñe al niñgimakzani, nia mönö mi.’

⁹ Azi nömbuk kaba kingeri, yeñon asakmararañ mia eketmö, keu nöngöra jiyöhi, mianğö kourukñi kun qahö mötket.

¹⁰ Mewö jiiga nöñon qesiba jial, ‘Kembu, mönö nöñon denöwö akñam?’ Jibiga jiyök, ‘Gi mönö dölki wahöta Damaskus sitinön anönga Anutunön wani yuaia akñangö jimawi, mi kunñan jiiga mötman.’

¹¹ Asakmararañ mianñon jeni qeiga janjuñ aka kinbiga azi nömbuk malgeri, yeñon böröne memba noañgiketka Damaskus sitinön anin.

¹² “Mianğoreñ azi kun qetñi Ananaias malök. Yañon Anutu göda qeba Mosesğoreñ Köna keu törörök wuatangöba malök. Mianğöra Juda ambazip Damaskus malgeri, yeñon körek gödañi ölopñi ak wangiba malget.

¹³ Yañon nöngöreñ kaba kösutne kinda nöngöra kewö jiyök, ‘Sol alani, jegi mönö kunbuk tohoyök.’ Mewö jiiga aua nalö mianğoreñök jeni tohoiga uba ehal.

14 Ekiga Ananiasnön jiyök, ‘Göñön ahakmeme diñdini solanjanğö Toña eknönga keu jitñan jii könömñi mötnön. Nanine ambösakonini yeñgöreñ Anutu yanön gi möwölöhöm gihiiga yanğö jitsihitñi möt kutuman.

15 Gi wani yuai eka mötzani, mönö mi nanğöba jiba yanğö jitñe memenji aka gölmeñi gölmeñi ambazip jeñine dangunu ewö kinda malman.

16 Mewögöra gi wuanöngöra mambötzan? Mönö wahöta yanğö qetñi qeta köuluköba jinönga o melun mem gihiinga siñgisöndoki sanğoñniga solanima.’ Ananiasnön mewö jiyök.”

Misin nup kian kantri yembuk memamğöra noholök.

17 “Damaskus siti mosöta Jerusalem sitinön lilingöba jöwöwöl jikenön köuluköbiga Kembugö alburupñan (añsumbemñan) nuñgui kinda imut kun ehal.

18 Imut mianğöreñ Jisös ekiga nöngöreñ kaba kewö jiba jii möral, ‘Gi kantri kianğöreñ nöngö könani aka Buña keuni mi kude jiba malman. Mi nanğöba jinönga nesampurek aka andö qeme. Mianğöra Jerusalem siti ki mönö ösumok mosöta anman.’

19 “Mewö jiiga jial, ‘Kembu, yeñön könañamni mötze. Nöñön mutuk liliköba ambazip gi möt narim gihizei, mi köuluk mirinji mirinji mianğöreñ öngöba miwikñaim engiba jöhöba ihilek wahinambuknön tauköm engiba tosatñi kösö mire al engiba malal.

20 *Göhöreñ nupbauk azi Stiwenön könagi nanğöba jiiga qeget sepñi mokoi eri nöñön nalö

* 22:20: Apo 7.58

miaᅅgöreᅅ mewöyök kösutᅅine kinda imbi köla malukuᅅini galöm memba kinbiga qeget kömuyök.’

²¹ Mewö jibiga Kembunöᅅ nöᅅgöra jiyök, ‘Nöᅅön melaim gihizalawa gi mönö körowen kian kantri ambazip yeᅅgöreᅅ anman.’ Mewö.”

Romgö yarö azi yeᅅön Pol galöm kölget.

²² Polnöᅅ keu likeᅅᅅi jiyöhi, mi ambazip kambu yeᅅön kezap ala mötketmö, (Kembunöᅅ kian kantri ambazip yeᅅgöreᅅ anmamgö jiiga jiyöhi,) keu mi möta miaᅅgöreᅅök köhöikᅅanök silata jiget, “Yapmakek! Azi mewöᅅi mi qeget kömuma. Mi gölmenöᅅ nembuk malmawaᅅö dop qahö.”

²³ Mewö jiba qeta opo kereᅅ qeköba gila (könaᅅinan börömböröm tiba) sömsöm urata könakemba lanᅅlanᅅ gilget.

²⁴ Mewö aketka Rom eᅅgö suahö galöm bohönᅅan jim kutuiga yarö azi yeᅅön Pol waᅅgita anda yarö azi yeᅅgö ain kiripo uruᅅe alget. Kiripo uruᅅe algetka Juda yeᅅön i wanigöra aka göju memba qetzei, miaᅅgö könaᅅi mötmamgöra kewö jim kutuyök, “Inini mönö Pol memba ihilek wahinambuknöᅅ qeba qesim waᅅgigetka könaᅅi aukᅅe jii möᅅᅅin.”

²⁵ Mewö jim kutuyökmö, Pol memba jöhöba ihilek wahinambuknöᅅ qebingö aketka Rom suahö galöm kunᅅan kösutᅅe kini Polnöᅅ kewö jiyök, “Rom mindimindiri gawman yeᅅön sel jöhöm niᅅgigetka böröᅅine maljal. Nöᅅön miaᅅgö (jimkututu) paspot memba maljal. Miaᅅgöra inini nöᅅgö keuni qahö möta kewöta lanᅅ jim teköba öne ihilek wahinambuknöᅅ nuᅅgumei, mi mönö

Rom jimkutukutu tonj yengö jeñine dop kölma me qahö?”

26 Polnön mewö jiiga suahö galömnön möta mianğoreñök suahö galöm bohonñi yanğoreñ anda buzup wañgiba kewö jiyök, “Azi mianğon mönö Rom gawmangö (jimkutukutu) paspot memba malja. Mianğöra gi mönö denöwö akñan?”

27 Mewö jiiga suahö galöm bohonñan Polğoreñ anda qesiba jiyök, “Gi ölña Rom gawmangö (jimkutukutu) paspot memba maljan me qahö? Mi jinön mötpi.” Jiiga Polnön meleñnök, “Ölña, nönön mi memba maljal.”

28 Mewö meleñniga jiyök, “Ni monen ketanji gila Rom mindimindiri gawmangö (jimkutukutu) paspot bohonñi membi niñgigetka maljal.” Jiiga Polnön jiyök, “Mi ölöpmö, nönğö iwinan Rom gawmangoreñ paspot memba maliga nönön yanğö nahonñi ahuba mianğoreñök qet mi memba maljal.”

29 Mewö jiiga azi qesim wañgibingö akeri, yeñön mianğoreñök mosöta lilingöba anget. Polnön “Ni Rom gawmangö paspot memba maljal,” jiiga suahö galöm bohonñan mi möta Rom azia gwaröhöm wañgiyöhanğöra aka awöwöliba sömbuñi mörök.* Mewö.

Polnön jike kaunsöl kambu yengö jeñine kinök.

30 Miri gianjiiga suahö galöm bohonñan wahöta Juda yeñön wuanöngöra Pol keunön al wañgiba

* **22:29:** Kun Rom gawmangö paspot memba malöhi, mi kösönön gwaröhöm wañgibepukö sonğo ahöyök. Kunñan sonğo mi walöñnök ewö, i mönö keunön al wañgizema. Mianğöra sömbuñi mörök.

jigeri, mianḡö könani törörök mötmangöra möta jike nup galöm bohonji aka jike kaunsöl kambu pakpak yeñön tokomegöra jim kutum enḡiyök. Mewö tokogetka jiiga Polḡö tapepni (munḡamuḡa) pösatketka waḡgita eta yeḡö jemesoholḡine ali kinök. Mewö.

23

¹ Polnön kinda jike kaunsöl kambu mi uba enḡeka kewö jiyök, “Azi alaurupni, nönön ahakmemeni pakpak mi Anutugö jemesoholḡe aka memba malbiga yañön eka ‘Dop kölja,’ jiiga urunaḡö kezapnan möta ölöwaka kota mala merak ki kinjal.”

² Polnön mewö jiyökmö, jike nup galöm bohonji qetḡi Ananias yañön kösutḡe kingeri, i jim kutum enḡiiga nuḡgulumḡe qekötahöget.

³ *Qekötahögetka Polnön jii mörök, “Anutunön mönö gi qekötahöm gihima. Göñön miri sel tu-atḡaḡö dop akzan. Sileḡi mundanön ohogetka tuatḡi akzapmö, uruḡi sewön memba inḡaḡi akza. Göñön Mosesḡö Köna keu memba mianön kewöt niḡgiba keuni jim tekömangöra tatzanmö, töndup nangak Mosesḡö Köna keu miyök qeba jim kutum enḡinönḡa nuḡguze. Mi qahö dop kölja.”

⁴ Polnön mewö jiiga kösutḡe kingeri, yeñön jiget, “Gi Anutugöreḡ jike nup galöm bohonji mepaqe-paik aka gamu qem waḡgizan me?”

⁵ *Mewö jigetka jiyök, “O alaurupni, yañön jike nup galöm bohonji akzawi, mi qahö möta jizal. Buḡa Kimbigö keu kun kewö ahöza, ‘Gi

* 23:3: Mat 23.27-28 * 23:5: Eks 22.28

mönö könagesö kambugahö azi kembuñi kude qe-suahöman.’”

⁶ *Mewö jiyökmö, jike kaunsöl kambu yengörenök tosatñan Sadyusi (Jike nupkö kapañkölköl) pati qekötahögetka tosatñan Farisi (Köna keugö kapañkölköl) pati azia malget. Polnöñ mi möta miangöra jike kaunsöl kambu yengö jenine keu kewö qerök, “Azi alaurupni, nöñön Farisi azia akzal. Iwinan mewöyök Farisi pati azia. Kömukömuñi yengön guliba wahötmei, nöñön mewö asuhumapkö al mamböta jörömqöröm aka maljal. Mewö maljalañgöra aka keu jakeñe al niñgigetka kewöt niñgiba jize.”

⁷ Mewö jiiga miangörenök Farisi aka Sadyusi pati miengö sutñine anğururuk ahui jike kaunsöl kambu yengön jula kambu yahöt aket.

⁸ *Sadyusi (Jike nupkö kapañkölköl) yengön kewö jizema, “Ambazip kömukömuñi yengön kude guliba wahötme. Suep garata qahö malje. Öme aka uña mi qahö malje.” Mewö jigetmö, Farisi (Köna keugö kapañkölköl) pati yengön keu karöbut miangören qekötahöba miangö dop möt nariba kinjema.

⁹ Kambu yahöt mewö aka qetketka göju ketañi ahuiga Köna keugö böhi tosatñan Farisi kambu yengö sutñineyök wahöta könöpñambuk terengöba kewö jiget, “Nini azi kiangö bölönamñi kun qahö miwikñaizin. Suep garata me uña kunñan keu kutum wasöta yangö uruñe ali jibawak, mi mönö denöwö dop köl engibawak?”

¹⁰ Mewö jigetka anğururuk miangön kunbuk könöwiba qariyök. Qariiga awörañgöba Pol

* **23:6:** Apo 26.5; Fil 3.5 * **23:8:** Mat 22.23; Mak 12.18; Luk 20.27

likeplikep örögetka anda kaiga mesin taköget. Mewö tandök ahök. Mewö aiga suahö galöm bohonnan miangö kenğötņi möta yarö kambu kun jim kutum enğıiga geba Pol sutņineyök öröba wanğita yarö azi yeņgö ain kiripo uruņe alget.

¹¹ Algetmö, sunğem miangören gaun ahöiga Kembunöņ Polgö qöhöröņe kinda kewö jiyök, “Mönö ewebibigabuk aka saitņigit malman. Nöņgö kónaņamni Jerusalem kiangören nanğöba jiba malnöņi, miangö dop mönö Rom sitinöņ mewöyök anda mi nanğöba jim asariba malman.” Mewö.

Pol qebingö anğönaņ meget.

¹² Kembunöņ mewö jiyökmö, miri gianğiga miangören Juda azi tosatņan ölöņ tokoba Pol kömumapkö anğönaņ meget. Yeņön areņ mi alget aka mi jöjopaņ keunöņ jöhöm köhöiba kewö jiget, “Nini Pol kömumapköra mamböta nalö sutņe kiangören nene sinği malbin. Sinği mala qein kömuiga miangö andöņe ölöp nene me o kun kunbuk nembin.”

¹³ Azi 40 aka jaņgö mi onğitkeri, yeņön mindiriba jöjopaņ keu mi jöhöm köhöiba jiget.

¹⁴ Mi jibagun jitņememe aka jike nup galöm yeņgören anda kewö jiget, “Nini Pol kömumapköra mamböta nalö sutņe kiangören nene sinği malbin. Polnöņ qahö kömuma ewö, ambazipnöņ mönö ölņa qesuahöm neņgigetka dop kölma. Miangöra nini mönö mindiriba jöjopaņ keu kewö jöhöm köhöiba maljin: Pol qein kömuiga miangö andöņe ölöp nene me o kun kunbuk nemba malbin.

¹⁵ Miangöra aka inğini mönö dölki jike kaunsöl kambu yembuk mohotņe mindiriba suahö galöm

bohonŋagöreŋ anda keu kewö ala qesime, ‘Nini Polgöreŋ keu kõnaŋi kunbuk qesiŋga jii ölna mötpingö mötzin.’ Mewö tandök aiga qesigetka ölop Pol waŋgiriga engöreŋ etma. Etpawakmö, kõnanöŋ kaba engöreŋ kaŋgotmamgö akŋawi, miangöreŋ mönö i qein kömumapkö jöjöröba malbin.”

¹⁶ Mewö jigetmö, qein kömumapkö aŋgönaŋ algeraŋgö buzupŋi mi Pol behötŋaŋgö kezapŋe gei mörök. Mi möta yarö azi yeŋgö ain kiripo uruŋe anda Pol taröhaŋgöreŋ öŋgöba jii mörök.

¹⁷ Jii möta suahe galöm kun qeri kaiga kewö jiyök, “Azi gwabö kianaŋon keu kun memba kaza-waŋgöra göŋön i ölop waŋgita suahe galöm bohonŋagöreŋ anöŋga keu mi jii mötma.”

¹⁸ Mewö jiiga i memba waŋgita suahe galöm bohonŋagöreŋ anohotka jiyök, “Kösö azi Polnöŋ noholi yaŋgöreŋ anbiga azi gwabö ki waŋgita göhöreŋ kamapköra qesim niŋgiza. Yaŋön göhöra keu kun memba kaza.”

¹⁹ Mewö jiba aniga galöm bohonŋan böröŋe memba waŋgita göraŋe anda qesim waŋgiyök, “Gi wani keuya memba kazan?”

²⁰ Qesim waŋgiiga jiyök, “Juda jitŋememe yeŋön keu kun qesim gihibingöra johöba göhöreŋ kaba kewö jime: Nini Polgö keu kõnaŋi törörök qahö möt kömuzin. Miangöra gi ölop Pol uran waŋgitnöŋga jike kaunsöl kambu yeŋgöreŋ eriga kunbuk qesim waŋginöŋga jii kõnaŋamŋi ölni mötpin. Yeŋön mewö asuhumapköra mötze.

²¹ Mewö kaba jimemö, göŋön keu miangö imbi ölop kude kölman. Juda kõnagesö yeŋgö sutŋineyök azi 40 aka jaŋgö mi oŋgitkeri, yeŋön

mindiriba Polgöra kewö jiba mi jöjöpaŋ keunöŋ jöhöm köhöiget, ‘Nini Pol kömumapköra mamböta nalö sutŋe kiangöreŋ nene sinŋi malbin. Sinŋi mala qein kömuiga miangö andöŋe ölöp nene me o kun kunbuk nembin.’ Mewö jiba göŋön imbi kölmangöra mamböta jöjöröba mönöze.”

²² Mewö jiiga azi gwabö mi melaiba kewö jii mörök, “Buzup ki jinöŋ mötzali, mi kun kude jinöŋ mötma.” Mewö.

Pol waŋgitketka Sisaria taonöŋ anök.

²³ Suahö galöm bohonŋan mi möta suahö galömyahöŋŋi etkoholi kayohotka kewö jii mörohot, “Inŋiri mönö timbi azi 200, hos yarö azi 70 aka linŋip yarö azi 200 mi jim kutum enŋiyohotka merak sunŋgemgö 9 kilok miangöreŋ Sisaria anmegöra jöjöröme.

²⁴ Mewöyök hos tosatŋi meköba möhamgöm enŋiba Pol kungö qakŋe ala köyan kölgetka sunŋgem kiangöreŋök premiö Feliksgöreŋ anma.”

²⁵ Mewö jii mörohotka premiögöra kimbi kun kewö ohoyök,

²⁶ “O Öngöŋgöŋamni sorok premiö Feliks! Klodius Lisias, nöŋön jölöŋgi jizal.

²⁷ “Juda yeŋön azi ki memba jöhöba qein kömumapköra aket. Mewö aketmö, Rom mindimindiri gawmangö (jimkutukutu) paspot memba maljawi, nöŋön mi möta miangöreŋök yarö kambu yembuk kaŋgota sel jöhöm waŋgiba meköba bohonŋi jöhöyal.

²⁸ Wani keugöra keu jakeŋe aljei, nöŋön miangö könaŋi mötmangö möta waŋgita Juda yeŋö jike kaunsöl kambu yeŋö jeŋine al waŋgial.

29 Al waŋgibiga keu jakeŋe ala nannini Kōna keugō kōsawōraŋ keuŋi keuŋi mianŋgōra aŋgururuk aka tuarenjoŋ aka jim waŋgetka miwikŋaijal. Mi miwikŋaijalmō, yuai bōlōŋi kōmumapkō dop me kōsō mire alin tatmawaŋgō dop mi qahō ahök. Yeŋōn keu mewōŋa kun qahō jiget mōral.

30 Mi qahō mōralmō, kunōŋ yaŋgō buzup keuŋi kewō indeli mōral: Tosatŋan ‘Azi mi qein kōmuma,’ jiba aŋgōnaŋ alget ahōza. Buzup keu mi mōta dōlkiaŋgōreŋök melaibiga göhöreŋ kaza. Keu jakeŋe al waŋgibingō mötzei, nōŋōn i mewōyök jim kutum eŋgibiga göhö jemesoholge kaŋgota keuŋini pampak aukŋe jim miwikŋaigetka mötman.”

31 Kimbi mewō ohoiga yarō azi jim kutum eŋgigeri, yeŋōn keu mi wuatangōba Pol memba waŋgita sōŋaupnōŋ miri qetŋi Antipatris mianŋgōreŋ anget.

32 Anda miri giaŋgiiga yarō azi hosŋinambuk yeŋōn Pol waŋgita kōna toroqeba angetmō, timbi azi yeŋōn nanninak lilingōba yarō azi yeŋgō ain kiripo uruŋe kaget.

33 Yarō azi hosŋinambuk yeŋōn Sisaria taonōŋ aŋgota kimbi mi premiō waŋgiba Pol mewōyök yaŋgō jeŋe alget.

34 Algetka kimbi oyoŋda “Pol mi wani prowinsgōra?” jiba qesiyök. Qesiiga “Silisia prowins azia,” mewō jiget mōrök.

35 Mewō jiget mōta jiyök, “Keu jakeŋe al gihibingō mötzei, yeŋōn mewōyök kaŋgotketka mianŋgōreŋ ölop qesim gihimam.” Mewō jiba

jim kutuiga Pol wanḡita kin Herodkö jakömbuak mirigö kiripo uruḡe ala jegalöm mem wanḡiget. Mewö.

24

Pol keunöḡ algetka premiö Filiksgö jeḡe kinök.

¹ Wehön nup memenḡi 5 teköiga jike nup galöm bohonḡi qetḡi Ananaias yaḡön jitḡememe tosatḡi aka loya (Köna keugö mötmöt azi) qetḡi Tertulus yembuk aitonḡöba Sisaria taonöḡ geba premiö Filiksgö jeḡe öḡgöba Pol keu jakeḡe albingö keunḡi jiget mörök.

² Mi möta Pol köl öröi kaḡgori loya Tertulusnöḡ könahiba Polgö silene keu ala premiögö jemesoholḡe keu kewö jiyök, “O Filiks, göḡön galöm köl nenḡiba malnöḡi, nini nalö mianḡörenḡ luai ketanḡi möta guḡböḡjönḡjön malin. Göḡön ölöḡḡanök köyan köla jim kutum nenḡinöḡga malmal tatatnini likep-likep möhamḡögetka kantri kianḡön uteköba wahöri ölöwakzin.

³ O ketanḡamnini Filiks, nini mi miri dop ölöḡḡanök möt kutuba göhöra söḡgaiba kilikalukḡi kun qahö möta saiwap jim gihizin.

⁴ Saiwap jim gihizinmö, nöḡön keu köröḡḡi jibi ölan göhöbapuköra kewö qesim gihizal: Nini keu memba kaḡnga kötoḡanök jimami, mi mönö nenḡöra ak gihüiga kezap ala mötman.

⁵ “Nini azi kianḡö könanḡi kewö eka miwikḡainin: Yaḡön kegwek-kahasililinḡ azi kenḡöt kotkotḡambuk akza. Yaḡön gölmenḡi gölmenḡi liliköba Juda ambazip uruḡini esiba kuḡḡum enḡiiga karimḡi karimḡi miri dop asuhugetka göḡupmajup qeta alakze. Tosatḡan tuaköpek aka

Nazaret azi kungö qetnje pati aljei, yañön mönö yenjö ketanmñina akza.

⁶ Yañön jöwöwöl jike mi mewöyök kapañ köla mem töwiba memba et almangö ahök. Mianğöra nini i memba jöhöin. Nini keuñi kewöta nanine Köna keu wuatañgöba jim teköbingö mörin.

⁷ (Mi mörinmö, suahö galöm bohonñi Lisias yañön yarö azi yembuk kaba kukösum ketanji mi-añön könöpuk börönineyök meköba wañgitket.*

⁸ Wañgita keu silenje ala jim wañgizei, i göhö jemesoholge kañgotmegöra jim kutum neñgiyök.) Göñön nangak qesim wañginönga könañi indela jima. Mi jiiga keu memba kazini, mianğö ölnji pakkak ölop auknje asuhuiga mötman.”

⁹ Mewö jiiga Juda ambazip yeñön mewöyök “Keu pakkak mi ölnja,” jiba imbi köla mi nañgöba toroqeba silenje ala jim wañgiget. Mewö.

Polnöñ keu likepñi melenñi Filiksnöñ mörök.

¹⁰ Pol jim wañgigetka premiönöñ keu jimapköra böröjöpañ kuñguiga kewö melenña jiyök, “Göñön (yara) yambu gwötpuk ambazip kambu kianğö jimtekötekö tonji aka malnöñ mötzal. Mianğöra nöñön keunangö likepñi mi göhö jege awösamkakak jimam.

¹¹ Nöñön uruwale Anutu waikñi memba möpöseimangöra Jerusalem sitinöñ öngöyal. Mi wehön 12 miyök teköiga merak ki kinjal. Nangak qesim enğibanak ewö, mi ölop nañgöba jime.

* **24:7:** Keu sel urunje ahözawi, mi mötmöt ambazip yeñön kewöta Luknöñ mi könakönahije ohoyök aka tosatan mi qahö ohoyök, mewö jigetka uruyahötñambuk akza.

12 Nöñön jöwöwöl jikenöñ me köuluk miri kungen öñgöba azi me ambi kunbuk goranora (noragora) keu jiba jitnakölik akiga mewö qahö miwikñaim niñgiget. Siti uruñe köna me sombem kunöñ ambazip uruñini kuñgubi öloköba liliköm niñgigeri, mewö qahö neket.

13 “Mewö qahö neka dölki keu silene ala jim niñgizei, yeñön miangö ölni kondel gihibingö osize. Keu omanji jize.

14 Mi osizemö, keu kun mi ölna jim miwikñaim gihimam: Yeñön Nazaret pati qetñi qetzei, nöñön mönö miangö köna wuatangöba mala nanine ambösakonurup yeñgöreñ bem Anutu mi waikñi memba möpöseimakzal aka Mosesgöreñ Köna keu aka kezapqetok yeñgöreñ Buzup Kimbi miangöreñ keu ohoget ahözawi, mi pakpak möt narim köhöizal.

15 Anutunöñ ambazip diñdini aka goñgoñi mi körek pakpak mem gulim enjii kömupnöhök wahötmei, Juda azi kienöñ miangöra mambötze. Nöñön yembuk toroqeba öröröñ kinda mewö asuhumapköra jörömqöröm aka mamböta maljal.

16 Mewö mala Anutu aka ambazip jeñine diñdini kinbiga Anutunöñ keuni nangöba jiiga urunangö kezapñan mörakzal. Jönömnan qahö unduza. Mönö sarakñi aka malmamgöra nalö dop kapan köla köhöiba malakzal.

17 *“Nöñön kungen malbiga (yara) yambu tosatñi teköi lilingöba miri tosatñi yeñgöreñök kalem memba uruwale kayal. Mewö kaba ‘Mi nani könagesöurup wanapñi yeñgöra menden

* 24:17: Apo 21.17-28

engimam,' jiba Anutugö jöwöwöl ohoba naluk al wanġimamgöra Jerusalem öngöyal.

18 Mianġöreŋ öngöba köl könjörat ak anġuba solanġi mala jöwöwöl jikenöŋ öngöyal. Yuai mi ohoba Anutu al wanġibiga miwikŋaim niŋgiget. Miwikŋaim niŋgigeri, mianġöreŋ ambazip tosatŋan qahö kaba liliköba ölököm niŋgiba göju meget.

19 Juda ambazip tosatŋan Eisia prowinsnöhök kaba jikenöŋ öngöba nekeri, yeŋön mönö döлки göhö jege kianġöreŋ kaŋgota kinda keu kun ahöm enġibawak, mi aukŋe silene ala jim niŋgigetka dop kölbawak.

20 “Me jike kaunsöl kambu yeŋö jeŋine kinda keu jiali, mi wani Köna keu oŋgita pinjit akiga keu jakeŋe alalgö keuni miwikŋaiget? Azi ki tatzei, yeŋön mönö mi jigetka dop köлма.

21 *Nöŋön yeŋö sutŋine kinda keu mohok-kun jiba töhöreŋ qetpiga lömböriyök. Köpösihit mewö kun ahal me qahö? Mi denöwö kewötket ahöza? Keu kewö qeta jial, ‘Kömukömuŋi yeŋön guliba wahötmei, nöŋön mewö möt narizalaŋgöra aka keu jakeŋe al niŋgigetka merak keuni kewöta jim teköm niŋgibingö akze.’ ” Mewö.

Polgö keuŋi qahö jim teköba kösö mire alget.

22 Polnöŋ mewö jiiga premiö Filiksnöŋ Jisösgö könaŋi wuatangöba maljei, mianġö könaŋi ölöp möt soroköba Polgö keuŋi kemaŋe kutuba kewö jiyök, “Suahö galöm bohonŋi Lisiasnöŋ kaŋgoriga nalö mianġöreŋ Polgö keuŋi jim tekömam.”

* 24:21: Apo 23.6

²³ Mewö jiba suahö galöm jim kutuiga Pol qahö jöhöba öne jegalöm meiga kösö mire tarök. Tini-tosolomurupñan Pol köyan köla yuai osiyöhi, mi memba wañgimegöra qahö qetal engiyök.

Polnöñ keuñi jüiga Filiks aka Drusila mörohot.

²⁴ Wehön tosatñi teköiga Filiksnöñ anömñi qetñi Drusila, Juda ambi mi wañgita kayohotka Polgöra keu ali kaiga keuñangöra kezap ali Kraist Jisös möt narim wañgingö könañi jim asariiga mörök.

²⁵ Mi mörökmö, Anutugö keu tosatñi toroqeba eraum mötketka lömböriyök. Polnöñ Anutugö jeje solanibingö könañi jim asariba nanine ahak-memenini galöm köl añgubingöra jiyök aka Anutunöñ nalö kun ali miangöreñ kewöt nengiba keunini jim tekömawi, keu karöbut mianön uruñi kuñguyök. Polnöñ keu mewöñi jüiga töwöratiba bök qesinđa jiyök, “Yapmakek! Muat mosötnöñ. Dölki ölop mosöta anönga nalö kun mötpi dop kölmawi, miangöreñ ölop kunbuk köl öröm gihibi kaman.”

²⁶ Mewö jiba töndup toroqeba Pol nanñi töwaya moneñ wañgimapköra mötmöriyök. Mewö al mamböta jörömqöröm aka sömañi gwötpuk köl öröm wañgii kaiga keukeu jiba tarohot.

²⁷ Polnöñ kösö mire tari (yara) yambu yahöt teköyök. Mi teköiga azi qetñi Porsius Festus yañön Filiksgö undumña premiö akñamgö ahök. Mewö aiga Filiksnöñ Juda ambazipnöñ nek sorimegöra möta Pol qahö pösari kösö mire toroqeba tarök. Mewö.

25

Polnöñ premiö Festusgö jeje keu likepñi jiyök.

¹ Festusnöh premiö aka prowins uruñe aņgota tariga wehön karöbut teköiga Sisaria taon mosöta Jerusalem sitinöh öņgöyök.

² Öņgöiga jike nup galöm bohonñi aka Juda jitrjememe yeñön jemesoholñe kaņgota Pol keu jakene albingö jiba aröñda kinget.

³ Aröñda kinda kewö jiba uletket, “O premiö, göñön ölop neñön möringa dop kölmapköra jim tekönöñga keu algetka Pol waņgita Jerusalem sitinöh ki kame.” Yeñön mutuk keu kewö jöhöba jiget, “Polnöh könanöh kaiga miangöreñ mönö qein kömuma.” Mewö jiba jöjöröba mönögeraņgöra kaba uletket.

⁴ Mewö uletketmö, Festusnöh kewö melen engiyök, “Pol mi Sisaria taongö kösö mire tari galöm kölje. Ni nanak nalö kude köriiga miangöreñ lilingöba anmamgö mötzal.”

⁵ Mewö jiba toroqeyök, “Miangöra azi mianön bölöñi kun akawak ewö, ölop engö jitrjememeurup tosatñan nömbuk Sisaria geba miangöreñ keuñini silene ala jim waņgigetka mötmam.”

⁶ Mewö jiba wehön 8 me 10 miangö dop Jerusalem sitinöh yembuk mali teköiga lilingöba Sisaria taonöh geyök. Geba ahöba wahöta miangöreñök keu jimtekötekögö dum tatatñe tata jim kutuiga Pol waņgita kagetka jene kaņgota kinök.

⁷ Polnöh kaņgota kiniga Juda jitrjememe yeñön Jerusalem sitinöhök kageri, yeñön liliköm waņgiba kinda kazik qakñe keu bölöñi gwötpuk silene ala jiget. Mi jigetmö, keuñinaņgö ölni mi kondelbingö osiget.

⁸ Kazik keu öne jiba kingetmö, Polnöh mi

qeapköba kewö jiyök, “Nöñön yuai bölöñi kun qahö ahal. Juda nenğöreñ Köna keu qahö qetalal. Jöwöwöl jike qahö mem töwial aka Rom sisa kiñğöreñ keugöra tuarenjon qahö ahal.”

⁹ Mewö jiiga Festusnön Juda yeñön nanñangö mötket öngömapkö möta Pol kewö qesim wañgiyök, “Silenön alal keu ki jizei, gi ölop miangö likepñi mi Jerusalem öngöba miangöreñ nöngö jemesoholne kinda jiman me qahö?”

¹⁰ Qesim wañgiyökmö, Polnön jiyök, “Rom sisa kiñnön jim kutuiga keu jake ki kuñgugera ki kinbiga kewöt niñgiba keuni jim tekönönga dop kölma. Ni Juda ambazip yeñğöra bölöñi kun qahö ahal. Mia nangak ölop möt yaközan. Mönö Wuanöngöra kunbuk yeñğöreñ anbilenaçak?

¹¹ Bölöñi kun qahö ahalmo, Köna keu kun qösököba yuai kun ak böliba miangöra kömupkö bunaya akilenaçak ewö, ‘Nöñön kömumbilenaçak,’ jiba qahö ölöñ köla anmam. Mi qahöpmö, yeñön kazik keu öne töhöntöhön jiba keuñinañgö könañi kondelbingö osize ewö, keu omanañğöra aka kunñan nömimba yeñgö böröñine almaçkö osima. Rom sisa kiñnön mönö keuni mindiñgöba jim teköi diñgima. Miangöra nöñön mönö yañgö jeñe anmamgö köhöiba qesizal.”

¹² Mewö jiiga Festusnön jembonurupñi yembuk qambañ keu jaruba kewöta kewö melen wañgiyök, “Gi sisa kiñğöreñ anmamgö möta qesizani, miangöra mönö ölop Rom anda yañgö jeñe kinman.” Mewö.

Polnön kiñ Agripagö jeñe kinök.

13 Wehön tosatņi teköiga kiņ Agripa aka nenni Bernaisi yetkön Festus eka gödanjiri kondelbitkörä Sisaria taonöņ kayohot.

14 Kaba miangöreņ wehön gwötpuk malohotka Festusnöņ Polgöreņ keu mi kiņbuk eraum möta kewö jiyök, “Filiksnöņ azi kun qahö pösari kösö mire kiangöreņ tata malja.

15 Nöņön Jerusalem anbiga Juda yeņgö jike nup galöm bohonņini aka jitņememeurupņinan nöņgöreņ kaņgota kewö qesim niņgiget, ‘Nini azi miangö keu memba kainga göņön mönö ölop yaņgö könai kewöta keuņi jim teköman.’

16 “Mewö qesim niņgigetmö, nöņön yeņgöra kewö jibiga mötket, ‘Rom gawman neņgöreņ kōna mi kewö: Kungö silene keu bölöņi ala jizei, nini ambazip kun yaņgö keuņi mi laņ kude jim tekömakzin. Mutuk öröba keu jakeņe alin kazikurupņan kagetka likeplikep öröröņ aröņda kingetka keu silene ala jim waņgigetka likepņi ölop jima. Keu likepņi jüiga mi kewöta öļņi ahuiga miangö dop ölop keuņi jim tekömakzin.’

17 Yeņön ki kaba tokogetka nöņön nalö qahö köriiga ahöba wahöta miangöreņök jimtekötekögö dum tatatņe tata jim kutubiga azi mi waņgita kagetka nöņgö jene kaņgorök.

18 “Kaņgorökmö, keu memba kageri, yeņön liliköm waņgiba aröņda kinda keu silene ala jim waņgiget. Mewö aketka yuai bölöņi kötökņi kun akawak, mewö jimegöra mamböralmö, keu mewöņi kun qahö jiget möral.

19 Mi qahö jiget möralmö, salupņe azi mi qe-tala nanņini mötnaripņinaņgö keu kambaņi tosatņi

aka azi kun qetni Jisös yangöra anğururuk aket. ‘Jisösnöñ kömuyök,’ jigetmö, Polnöñ ‘Guliba malja,’ jiba kapañ köla köhöiyök.

20 Mewö jiba kazik algetka nöñön ‘Keu mewöñi mi denöwö kewötpileñak?’ jiba köna jaruba uruyahöt möral. Mi möta kinda kewö qesim wañgial, ‘Silenöñ alal keu jizei, gi ölop miangö likepni mi Jerusalem öngöba miangöreñ jibanak me qahö?’

21 Qesim wañgialmö, Polnöñ Öngöngöñamninañgö jeñe anmamgö kapañ köla kewö qesiyök, ‘Mönö jinöñga galöm köl niñgigetka sisa kiñgöreñ anbiga keuni mindiñgöiga diñgima.’ Mewö qesiiga wahip azi jim kutum enğibiga galöm kölgetka tatza. Bian melaim wañgibiga sisa kiñgö jemesoholñe anma.”

22 Festusnöñ mewö jiiga Agripanöñ jii mörök, “Nia kun azi mianön keuñi jii mötmamgö sihimñi mötzal.” Jiiga meleşnök, “Urangun ölop keuñi mötman.”

23 Mewö jiiga ahöba wahötketka kantrigö jembon, suahö galöm ketani aka jitñememe öngöngöñi yeñön kaba Agripa aka Bernaisi yetköra jura sorom jöñjire uta sösöñgai liñet köla köl öröm etkigetka keugö jake miri öngöngöñi miangö uruñe anğotket. Festusnöñ jim kutuiga Pol wañgitketka miangöreñ kañgorök.

24 Polnöñ kañgoriga Festusnöñ wahöta kinda kewö jiyök, “Kiñ Agripa aka azi ketani pakpak nembuk ki tatzei, iñini mönö azi ki eket. Juda ambazip kambu pakpak yeñön yangöra aka uruni kuñguget. Sisaria taon kianğöreñ aka Jerusalem siti miangöreñ ölna keunöñ kuñgum niñgiba qet

gigilahöba kewö jiba malget, ‘Azi kianön gölmenön malmawanö dop qahö. Mönö yapmakek!’

²⁵ “Mewö geta malgetmö, nöñön kewötpiga yuai kun kömupkö buña akñawanö dop mi qahö ahök. Nöñön könañi mewö miwikñaiba ehalmö, nanñak Rom Öngöñgöñamninanö jeñe ani keuñi mindiñgöiga diñgimapköra kapan köla qesiyök. Miangöra keu jöhöba melaibiga Rom anma.

²⁶ Rom sitinön anmapmö, yanögoren keu mi denöwö ohoba Rom azi kembunanögöra albi an-bawak? Yanögöra keu lañ jizemö, keu könañambuk kun mi törörök qahö möt asarizal. Miangöra jibi wanğita kaba kiñ Agripa göhö jege aka iñini tosatñi kiñgö andöñe ki tatzei, engö jemesoholñine algetka kinja. Iñini ölop böröjañ memba keuñi kewötketka ölni asuhui mönö mi möta ölop kimbinön ohobilenjak.

²⁷ Azi kun kösönön jöhöba keu jakene alalgö keuñi denöwö jizei, mi aukne jibingö osiba töndup öne melaibinbuk. Silik mi nöñgö mötmötnön kezapjupjup tandök ewö akza.” Mewö.

26

Polnön keuñanö likepñi kiñ Agripagö jeñe jiyök.

¹ Mewö tatketka kiñ Agripanön Polgöra jiyök, “Gi ölop nangahö keu likepñi jinönga mötpi.” Mewö jiga Polnön kinda börö kutum wanğiba nanñi keuñi angön köla kewö könahiba jiyök,

² “O kiñ Agripa! Juda jitñememe yeñön keu silene ala jim niñgizei, nöñön keu pakpak miangö likepñi mi merak ölop göhö jege aukne jimamgö simba-won mötzal.

³ Göñön Juda neñgörenj ahakmeme aka anğururuk keunini pakpak mi törörök möt yaközan. Miangöra nöñön ölna simbawonj mötzal. Mewö aiga qesim gihizal: Keu jimami, mi ölop möta mökösoñda kezap alman.

⁴ “Nöñön Juda ambazip kambu uruñe ahuba könakönahineyök könahiba nani kantri ki aka sitinini Jerusalem miangörenj mala koral. Miangöra Juda ambazip pakpak yeñön malmalni gwaböneyök denöwö kota malali, mi ölop möt kutuze.

⁵ *Yeñön könañamni nalö köröpnji möt kutuze. Sihimñini ahöi mi ölop kewö nañgöba jibeak: Nanine jike nup uruñe Farisi pati neñön asa yeñgörenj jike mötmöt mi törörök kötökñi wuatangöba maljin. Nöñön mutuk yeñgö kambu patinöñ anğota Köna keu kapanj köla wuatangöba malal.

⁶ Anutunöñ ambösakonurupnini yeñgöra jöhöjöhö keu alöhi, nöñön miangö ölni ahumapköra al mamböta jörömqöröm aka maljal. Miangöra aka merak keu jakeñe al niñgigetka kinjal.

⁷ “Nanine Israel ambazip kambu 12 neñön körek pakpak jöhöjöhö keu miangö ölni asuhumapköra mambörakzin. Mi mamböta jörömqöröm aka qösösök (qörörök) suñgem asak Anutu waikñi memba möpöseimakzin. O Öngöñgöñamni, nöñön jörömqöröm mewö ahakzalanğöra Juda jitñememe yeñön keu bölöñi bölöñi silene ala jim niñgimakze.

⁸ Anutunöñ ambazip kömukömunji mem gulim enñji wahötmei, inini mi mönö denöwögöra aka qahö möt narize?

* 26:5: Apo 23.6; Fil 3.5

9 *“Nanak mewöyök kewö mötmöriba malal, ‘Ni Jisös Nazaret azigö qetbuñani sanjolbi qahöwakñapköra bim gwötpuk qemamanğö dop akzal.’ Mewö mötmöriba kazik aka malal.

10 Kazik aka Jerusalem mianğoreñ olña bim qeba malal. Jike nup galöm bohonñi yeñön nam köl niñgiget jim kutubiga Anutugö ambazip sarakñi mi gwötpuk engömembra kösö mire al engiget aka tosatñi kömumegö keu jigetka nöñön mewöyök keu mi kötöngöba imbi köla (wout ala) malal.

11 Nalöñi nalöñi liliköba köuluk miri dop böröjan mem engibiga uruñini melenğeri, mienön asuhuget. Asuhugetka Jisös qañ köla ilit wañgimeğöra kuñguba töhöreñ öröm ureim enğial. Mewö ak engibiga ihileknöñ könöpuk tauköba enğugetka sihimbölö kahasililij möta malget. Urunan könöp jem sölöngöiga sesewerowero ak engimamğöra köröwen kötökñi kian kantrigö sitiñi sitiñi mianğoreñ anda malal.” Mewö.

Polnöñ uruñi melenğoreñ kösohotñi jiyök.

Apo 9.1-19; 22.6-16

12 “Kaisilik mewö aka malbiga nalö kunöñ jike nup galöm bohonñi yeñön nömbuk urumohot aka nam köl niñgigetka Damaskus sitinöñ anmamğöra könanöñ anal.

13 O Öngöngöñamni, nöñön könanöñ anbiga silim bibiñe mianğoreñ Suepnöhök asakmararañ kun wölañ erök. Eta wölbilik ewö asuha wehön jeñi oñgita asariiga ehal. Asak mianjön mönö ni aka azi nömbuk anini, nini turum neñgiyök.

* 26:9: Apo 8.3; 22.4-5

14 Turum nenngiiga körek tala gölmenöŋ eta kölin. Eta köla ahöinga nöngöra keu kun kaiga Hibru keunöŋ kewö jii möral, ‘Sol, Sol, gi wuanöngöra sesewerowero ak niŋgizan? Gi mönö bulmakau aziŋi ewö akanbuk. Toŋan gölme mözö zamgömapköra bulmakau aziŋi kinöŋnöŋ jöhöi ösöŋ öröiga dop köljamö, laŋ öröba könöpuk yaköriba öröm ureiiga kerösuap jitŋan uiga sihimbölö mörakza. Gi mönö miangö dop laŋ luhuba nangi könisemgi öne töhöŋ kutubanbuk.’

15 “Mi möta qesial, ‘O Kembu, gi daŋön?’ Qesibiga jiyök, ‘Ni Jisös sesewerowero qakŋe al niŋgimazani, mönö mia akzal.

16 Mi akzalmö, ölöŋ wahöta kinöŋ. Ni aka yuai ekzani aka könaŋgeŋ toroqeba asuhaba kondel gihimami, mi mönö naŋgöba jiba dangunu ewö kinda nöngö jitŋememeni aka weleni qeba malman. Gi nup mi memba malman. Nöŋön miangöra aka asuhum gihizal.

17 Nöŋön mönö nangi Israel ambazip kambu yeŋgö böröŋineyök meköm gihimam aka kian kantri ambazip yeŋgöreŋ melaim ghibiga anmani, yeŋön guhubepüköra mewöyök galöm mem gihimam.

18 Nöŋön melaim ghibiga anda ambazip jeŋini metohonöŋga uruŋini melenäda söŋaupnöhök asakŋe kaŋgotme. Jeŋini tohoiga imbiŋini melenäda Satangö kukösumnöhök lolohoba Anutugö sel uruŋe kame. Mewö kaba möt narim niŋgigetka siŋgisöndokŋini saŋgoŋda mosötмам. Mosötpiga Anutunöŋ alaurupŋi tök kutum enŋiiga sarakŋi akzei, mönö yeŋgö sutŋine aŋgota dum tatatŋini memba oyaenŋkoyaen aka malme.’ Jisösnöŋ mewö

kutum nuasöta jiyök.”

Polnönj urugö nupñangö kösohotñi jiyök.

¹⁹ “O kinj Agripa, Jisösnönj mewö jiiga nöñön Suepnöhök jemelenj imut eka könañi möta mi köyatiba malmangö mötpiga osiyök. Mianğöra nöñön imut mianğö keuñi mi tem köla nup memba malal.

²⁰ *Mi tem köla liliköba Buña keu kewö jim sehiba malal: Injini mönö uruñini melenđa Anu-tugörej lilingöba kaba uru melenđerangö ölni mi ahakmemenjanan kondela malme. Buña keu mi mutuk Damaskus aka Jerusalem siti yahöt mianğörej maljei, yeğöra jim asariba malal. Mianğö andöñe Juda kantri pakpak yeğöra jial aka kian kantri yeğöra jiba uruñini kuñguba malal.

²¹ Könañi mianğöra aka Juda ambazip tosatñan jöwöwöl jikenönj öngöba mianğörej qeraköba nömimba kapan köla köhömuñi nuñgubingö aket.

²² “Mewö aketmö, uruni melenñnalangörejök mala kotpiga Anutunönj bauköm niñgiba maliga nalö kewöñe toroqeba ölop maljal. Baukbauk mianğöra aka ki kinda öngöñgöñi aka eretñi engö jeñine keuni ki jizal. Moses aka kezapqetok ambazip yeñön yuai asuhumapkö jigeri, nöñön mönö yeğö keuñini miyök törörök wuatangöba keu kewö nanğöba jizal:

²³ *Anutunönj areñ ali Amötqeqe Toñi Kraist yañön sihimbölö möta kömumba azi mutukñi kömupnöhök wahötma. Wahöta Anutu asakñangö könañi mi Juda kambu neñğöra aka kian kantri

* **26:20:** Apo 9.20, 28-29 * **26:23:** Ais 42.6; 49.6; 1 Kor 15.20

yengöra indela jim tuarim engiba malmamgö jiyök.”

²⁴ Polnön keuñangö likepñi mewö jiiga premiö Festusnön tereñgöba keu kemañe kutuba jiyök, “Pol, gi kahapmahap akzan. Papia miriñi miriñi miangörej öngönöñga mötmötkan sehiba nöröpsohop mem gihii maljan.”

²⁵ Mewö jiyökmö, Polnön melenök, “O kembu sorokni Festus, nönön nöröpsohop qahö akzal. Keu jizali, mi mötkutukutu keu ölna akza.

²⁶ Kiñ Agripanön keu kiangö könani möt soroköza, mewö mötzal. Yuai pakpak mi tölapñe wangöm kunön qahö asuhuyök. Miangöra keu buzupñi pakpak mi mönö kiñgö kezapñe gei möt teközawi, mewö möt köhöizal. Miangöra nönön keuni ki ölop awösamkakak qakñe kinda jibiga mötzan.

²⁷ O kiñ Agripa, Juda azi gi kezapqetok yengörej Buzup Kimbigö keuñi möt narizan me qahö? Mi möt narizan, mewö mötzal.”

²⁸ Polnön mewö jiiga Agripanön melenða jiyök, “O Pol, göñön nalö töröptökñi kiangörej uruni kuñgunöñga nönön uruni melenða Kraistkö alañi akilenakgö mötzan me? Mewö mötmörizan me?”

²⁹ Mewö jiiga Polnön melenök, “O kiñ, keu köröpñi me kötoni jibilenak, mi muatmö, göñönök qahöpmö, dölki keuni kezap ala mötzei, körek enön mewöyök Kraistkö alaurupñi akñegöra urusihimnan möta kewö köuluközal: O Anutu, uruñini melen enginöñga nönön ki maljali, mönö miangö dop akñe. Tapep (muñgamuñga) miyök al engimapköra qahö köuluközal.”

³⁰ Mewö jiiga kiñnönj wahoriga premiö aka Bernaisi yetkön mewöyök wahörohot aka yembuk tatkeri, yeñön körek wahötket.

³¹ Wahöta mosöta angetka azi ipñan nanñinök eraum möta kewö jiget, “Azi kianjön bölöñi kun qahö aiga wuanöngöra mönö gwaröhöm wañgiget? Yañön kömupkö buña akñawañgö dop qahö akza, mi mötzin.”

³² Mewö jiba eraum möta Agripanönj Festusgöra jiyök, “Sisa kiñgöreñ anbiga keuni mindingöi diñgimapköra qahö kapan köla qesiba jibawak ewö, mönö ölop pösaringa gebawak.” Mewö.

27

Pol wañgenönj algetka könahiba Rom anök.

¹ Azi ipñi yeñön neñgöra keu kewö jöhöget: Nini wañgenönj öngöinga luhutnönj nañgöi Itali kantrinönj anbin. Keu mewö jöhögetka Pol aka kösö miri azi tosatñi mi suahö galöm kun qetñi Julius yañgö böröñe al eñgiget. Julius yañön yarö kambu bahöñi kun qetñi “Rom sisa kiñgö yarö kambu” qetkeri, miangöreñ yarö azi 100 yeñgö galömñina malök.

² Miri kun qetñi Adramitium miangöreñök wañge kun kaba Eisia prowinsgö köwet jitñi mötöteiba wañge döpnj mohot mohot miangöreñ anmapkö aka jöjöröyöhi, miangöreñ öngöin. Öngöinga opo seri öröba möröreñgögetka luhutnönj nañgöi köwetnönj anin. Masedonia prowinsgö siti qetñi Tesalonaika miangöreñök azi kun qetñi Aristarkus yañön sunğurumnini aiga mohotñe anin.

³ Anda ahöm wahöta miangörenj Saidon mire angorin. Anjoringa Juliusnönj Pol ala ak wanjiba jim teköiga wanje mosöta alaurupni yengörenj anda engehiga wani yuaigöra osiyöhi, mi bauköm wanjiget.

⁴ Miangörenjök kunbuk köwetnönj aninga luhutnönj köna anbin jiini, miangörenj görökenök qeba gilöhanjöra lömböriiga toroqeba gölme jölanji qetnji Saiprus miangö tölapnje geba qöhöröngöba mötöteiba anin.

⁵ Aninga luhutnönj nanjoi köwet kutuba Silisia aka Pamfilia prowins yahöt mi etkonjita Lisia prowinsgö siti qetnji Maira miangörenj angorin.

⁶ Anjota miangörenj suahö galömninan wanje kun miwiknajiyök. Wanje mianjön Ijptkö siti qetnji Aleksandria miangörenjök kaba Itali kantrinönj an-mangö aka jöjöröyök. Mi miwiknaiba jim kutum nenjiiga miangörenj öngöin.

⁷ Öngöba köwetnönj aninga luhutnönj ölop qahö nanjoi wehön gwötpuk mi ösönösönj anda malin. Mewö malin teköiga miangörenj kupuk-kapak aka köwet miangörenj Nidas taon kösutnje angorin. Kösutnje anjoringa luhut köhöiknanök gila miangörenj göröken toroqeba anbinanjö könanji jöhöyök. Jöhöiga lömböriiga Krit gölme jölanjanjögö jitnji köröpni qetnji Salmone mi onjita anda gölme jöhanjanjögö tölapnje geba qöhöröngöba mötöteiba anin.

⁸ Köwet jitnji dowe mötöteiba osikosibuk anda mala Lasea taon kösutnje miri qetnji “Wanje sururunji eksihimjambuk, Fair Hafens” qerakzei, miangörenj angorin.

⁹ Miangörenj anjota nalö köröpni mösöhöba

malin. Mewö malinga siŋgisöndok saŋgoŋsaŋgoŋgö kendonŋi qetŋi Yom Kippur* miangö nalöŋan teköiga luhutqeŋe nalöŋan lök kam kuŋgui aŋgorin. Luhutqeŋe nalöŋe ambazip köwetnöŋ anda “Ayuhubinbuk,” jiba waŋgenini jöhözema. Miangöra Polnöŋ galöm meme keu kun kewö jii mötket,

¹⁰ “Aziurup, nini köwet qakŋe toroqeŋa anbinbuk. Mönö kupuk-kapak qakŋe anda ayuayuhu miwikŋaibinbuk. Waŋgenini raidimbomnöŋ qei jömgöiga sukinapŋi geŋmororoŋ öŋgöŋgöŋi aiga naninak mewöyök kömumbinbuk. Miri tandökŋan mewö ahiga ekzal.”

¹¹ Galöm meme keu mewö jiyökmö, suahö galömninan Polgöreŋ keu mi qetala waŋge toŋi aka stia (möŋaqöŋai lökuat) galömŋi yetköŋ “Ölöŋ anbin,” jiyohori, suahö galömninan keuŋiri mi möt nariyök.

¹² Miri qetŋi “Waŋge surusuruŋi eksi-himŋambuk” miangö waŋge döpnŋi mi luhutqeŋe nalö tatatkö dop qahö ahök. Miangöra aka azi gwötpukŋan anbingö keu kötöŋgöba kewö jiget, “Ki tatpingö ölan neŋgöhöza. Ölöŋ opo seri öröba möröreŋgögetka köwetnöŋ anbin. Anda kapan köla mala köna ahuiga Finiks waŋge döpnöŋ aŋgotpinak. Miangöreŋ aŋgota luhutqeŋe nalö ki ölöŋ tata malin teköma.” Waŋge döŋ qetŋi Finiks mi Krit gölme jölannŋi miangö jitŋe wehön gegenŋi göröken ahöza. Mewö.

Raidimbomnöŋ köwet meiga böliyök.

* **27:9:** Yom Kippur sösoŋgai kendon mi Septembe teteköŋe me Oktobe könakönahiŋe alakze.

13 Anbingö keu mewö jigetka luhutnöŋ ösöŋösöŋ könahiba Saut görökenök gilök. Giliga “Ölöp anda areŋnini wuatangöba Finiks ekin,” jiba mötmöriba kinda wanŋegö kösö mendanŋi musulgetka korök. Koriga wanŋenöŋ lolohoiga luhutnöŋ nanŋgöi ösöŋ nenŋuanŋiriga Krit gölme jölanŋanŋö jitŋi mötöteiba dowe anin.

14 Mewö aninmö, nalö kude köriiga luhut ösumŋi köhöikŋi qetŋi mura (yoware, Not Istkö raidimbom (piwi)lilililikŋi) mianŋön mönö gölme jölanŋi mianŋö qakŋeyök qeba gila nenŋuba kayök.

15 Nenŋuba kaiga wanŋenini galöm köl wanŋibingö mem bibihigetka luhut qeba kayöhanŋöreŋ göröken anmamŋö osiyök. Osiiga mosötketka luhutnöhök wanŋe kuŋguba memba wanŋiriga nanŋak öne ani utuköm nenŋiiga lanŋ malin.

16 Utuköm nenŋiiga mala gölme jölanŋi moröŋi kun qetŋi Kauda mianŋö tölapŋe Saut göröken anin. Mianŋöreŋ anda gomba kösönöŋ jöhögetka wanŋe andöŋe o kutuba kayöhi, mi aum-möriba köwetnöhök öröinga gwötpuk lömböriiga töndup kapŋ köla öröinga korök.

17 Gomba mi öröin koriga wanŋe ketanŋe alin. Wanŋenöŋ utuköba jömgöbapüköra möriŋga kösö memba wanŋe köpeiba jöhöm köhöiget. Mewö anda mala sak qetŋi Sirtis[†] mianŋöreŋ köwet röndumŋi köröpŋi qahö ahözawangöreŋ kuŋguba qaköbinbuköra kenŋötŋini mörin. Mewö möriŋanŋöra aka wanŋegö opo seri yuaiŋi mi

[†] 27:17: Sirtis mi Afrika kantri qetŋi Libia mianŋöreŋ göröken ahöza. Sirtis mianŋöreŋ köwet dutŋe sak kukundu ahöza.

meköba eta ala wanje galömkölköl mosötket. Mi mosötketka luhutnöñ wanje kunjuba neñgömiisiiga öne lañ anin.

18 Öne lañ aninmö, raidimbom mianjön mönö könöpñambuk toroqeba gila utuköm neñgiyök. Mewö utuköm neñgiiga miri gianjiiga miangören könahiba wanjegö sukinap tosatñi memba köwetnöñ gilget geyök.

19 Wehön karöbut aiga miangören wanjegö öröyuai aködamunñambuk mi nanñinak memba gilgetka köwetnöñ geyök.

20 Mewö memenjaliba anda mala sunjem silim gwötpuk miangören wehön me senjelau kun qahö ehin. Raidimbom mianjön mewöyök köhöikñanök toroqeba gila ahöyök. Gilayök ahöiga lömböriiga “Mönö qahöwakin!” jiba malmal jöhöjöhögö möta uruninan eri tötbörömnini tali tarin.

21 Raidimbom uruñe nalö köröpñi kaba mala nene kun qahö nein. Miangöra aka Polnöñ sutñine wahöta kinda kewö jiyök, “Aziurup, nöñön Krit gölme jölannji qahö mosötpingö goro jiali, inini nöngören keu mi wuatangögetka dop kölbawak. Mewö ahinga genmororon aka ayuayuhu kianjön mönö qaknine qahö öngöbawak.

22 Goroni mosötketmö, döлки qamban keu kewö enjizal: Engörenök kunñan kun malmalñi qahö ayuhuma. Mi qahöpmö, wanjeyök ayuhuma. Miangöra inini mönö ewebibiñini möta tatme.

23 “Nöñön bem qetñi Anutu yangö bunaya aka welenñi qeba maljal. Sunjem gaun ahöbiga yanjön Suep garatanji kun melaiiga nöngö kösutne kaba kinja.

24 Kinda kewö jiza, ‘Pol, gi kenğötki kude mötman! Gi ölop Rom sisa kingö jemesoholje anönga kewöt gihima. Mötnöñ! Anutunöñ körö ölöwakñi kondel gihiba ambazip pakpak göbuk wañgenöñ mohotje maljei, yeñgö malmalñini mönö göhö böröge ali göbuk kinda kunñan qahö kömuma.’

25 Suep garatanöñ nöñgöra keu jizawi, mönö miangö dop asuhuma. Nöñön Anutu mewö möt narim wañgizal. Miangöra aziurup, injini mönö eweñini möta tatme.

26 Mewö asuhumapmö, luhutnöñ gila muwutapköm neñgiiga gölme jöhanñi kungö jitje añgotpinañgö dop akza.” Mewö.

Suñgem 14 aiga gölme dopdowiget.

27 Wañgeninan Gölme Sutñire Köwetkö (Mediterranean Sea) bahöñi qetñi Adria Köwet miangöreñ öne lañ aniga suñgem 14 ahök. Mi aiga suñgem bibiñe miangöreñ wañge nup meme azi yeñön “Mönö gölme kun dopdowizin,” jiba uruñinan mewö mötket.

28 Mewö möta kinda kösö kun lömbötñambuk jöhöba gilgetka geba köwet dutñi misiriyök. Misiri-iga köwet röndungö qötöñi ahuyöhi, mi 40 mita (120 fit) miangö dop ahök. Borom kun toroqeba anda tandök mohot miyök aketka qötöñi mianñön 30 mita (90 fit) miangö dop aiga miwikñaiget.

29 Mi miwikñaiba wañgeninan köt törom kemañe kuñgubapuköra kenğötñini mötket. Mewö möta wañgegö kösö mendañi 4 mi wañge andöñeyök pösata ösöñ memba eta alget aka asarimapkö miri qeba mamböta köuluköba tatket.

³⁰ Mewö tatketmö, wan̄gegö nup meme azi yeñön kewö möndöba jiget, “Nini mönö wan̄ge numbun̄e göröken wan̄gegö kösö mendan̄ni tosat̄ni gilinga gema.” Mewö möndöba jiba wan̄ge moröni gomba kun wan̄genöhök meköba mem et algetka köwetnön̄ eri wan̄ge mosöta esapköba tölap̄ne ölon̄ köla anbingö aket.

³¹ Mewö aketmö, Polnön̄ suahö galöm aka yarö azi yeñgöra kewö jiyök, “Yeñön wan̄genön̄ qahö mösölatiba kinme ewö, en̄gö malmal jöhöjöhögö kön̄āni kun qahö ahuma.”

³² Mewö jiiga yarö azi yeñön anda gombagö kösöni yandigetka nan̄jök aniga nup meme azi yeñön ölon̄ köla anbingö osiget.

³³ Wan̄garan̄ suruiga mian̄göreñ Polnön̄ körek pakpak nene nemegö qamban̄ keu jim kutum en̄giba kewö jiyök, “In̄ini lök nalö köröp̄ni uruyahöt mamböta nene kun qahö yöhösöröba malgetka merak wehön 14:ni akza.

³⁴ Mian̄göra kewö jim kutum en̄gizal: Nini malmal jöhöbingö aum-möribini, mian̄göreñ ösumnini etpapuköra mönö köhöiba kinda ölöwahinga dop kölma. Mian̄göra in̄ini mönö nene neme. En̄göreñök kun̄an̄ kun silen̄i qahö qema. Nöröp̄ jup̄ni moröña kun mi qahö kötök̄ni sohoma.”

³⁵ Mewö jiba Polnön̄ beret memba körek pakpak yeñgö jemesohol̄ine Anutugö saiwap jiba mindipköba kön̄ahiba neyök.

³⁶ Mewö neiga eka körek yeñön awösam̄ini geiga mewöyök nene memba neget.

³⁷ Nini wan̄ge urun̄e mindiriba jan̄gö 276 mian̄gö dop malin.

38 Yenön körek pakpak nene nempa nem timbireñ aket. Mewö aka wanğenöñ amqemapkora wit padi toru memba gilgetka köwetnöñ geyök. Mewö.

Wanğenöñ köwet töromnöñ kuğuba qaköba jömgöyök.

39 Miri gianjiiga gölme eka mi qahö möt kutuget. Qahö möt kutugetmö, köwet wanğömñi (bay) kun sakñambuk miwikñaiaba eket. Mi eka “Mönö wanğe melenđa esapköba miangöreñ anğotpinak,” jiba keu jöhöget.

40 Keu mewö jöhöba kinda wanğegö kösö mendanğögö kösöñi yandigetka suliga mosötketka köwet dutñe ahöyök. Mi yandiba miangöreñök likeplikep stia (möñaqöñai) lökuat yahöt ahöyöhi, mietkö kösöñiri pösatketka lolohoyök. Mi pösata wanğe wösöñangö opo serinji öröba möröreñgögetka luhutnöñ nanğöi wanğe möñaigetka saknöñ göröken anin.

41 Mewö aninmö, wanğenöñ köwet töromnöñ anbapükora jöhöbingö osiba mosöta gilgetka anda kuğuyök. Miangöreñ kuğuba wanğe giliñan töromnöñ qeba qaköba anda kamangö osiba tarök. Mewö tariga köwet siriñan wanğegö andö likepñi gila kinda ösum köhöikñi mianön qeba qesiñmesiñnök.

42 Mewö ahiga jiget, “Kösö miri azi yenğöreñök kunñan o qeba kutuba ölöñ köla anbapuk.” Mewö jigetka yarö azi yenön kösö azi nini körek neñgubingö mötket.

43 Mewö jigetmö, suahö galömninan Polgö mal-malñi jöhömangö möta yarö aziurupñan mewö

akepuköra anğön köl enğiyök. Anğön köl enğiba kewö jim kutum neñgiyök, “Denike enjön köwet qeba anangö könani mötzei, inini mönö mutuk luhuba geba köwet qeba anda körokne öngöme.

⁴⁴ Yenjön mutuk angetka tosatnan andöñine kat-apa sahötñi qelanjiba meme me wanğegö kitipñi könani könani miwikñaiba miangö qakne ahöba köwet qeba anme.” Mewö jim kutum neñgiiga tandök mewö aka köreknan malmalnini jöhöba köwet jitne anğot teköin. Mewö.

28

Malta gölme jölanne mamböta malin.

¹ Malmalnini jöhöba köwet jitne kanğota miangören gölme jöhanñi qetñi Malta qetketka mörin.

² Kanğoringa kienöñ könahiba eri miri amöriyökmö, Malta ambazipnöñ ala-ala tandök ölöp kötokñi kondel neñgiba könöp ohoba neñguanğitketka köreknanök könöp kösutne anda jömöta tarin.

³ Polnöñ könöp omajarek qezaköba börangöba könöpnöñ alök. Mi ali jeiga qatö kunöñ könöp umñan kösuiga kota böröñe jöhöba yöhöyök.

⁴ Mokoleñnöñ mewö jöhöba böröñe möndöba eta kiniga gölme jölanñangö toñan eka nanñini eraum möta kewö jiget, “Azi ki köwetnöhök malmalñi jöhöba korökmö, Songoriñnöñ töndup likepñi melenđa malmalñi kutum wanğii kömuma. Miangöra mönö enğui kömukömu azia akza. Mewö möt köhöizin.”

⁵ Mewö jigetmö, Polnön soramen utuköba kinda giliga könöp uruñe geiga sileñe geñmororoñ kun qahö ahuyök.

⁶ Mewö jiba ehiba “Sileñi qariba pisihima me wölañ kömumba gölmenön tala eta kölma,” mewö jiba ek tiba mamböta kinget. Nalö köröpñi mamböta kingetmö, Polgö sileñe yuai bölöñi kun qahö ahuyök. Mewö aiga mötmötñini melenñiga jiget, “O, azi ki mönö bem azia akza.”

⁷ Malta saknön kañgota lañ uba kösutñe nene nup gölme körö jajapñi aka bau bulmakau kambuñi kambuñi ahögetka ehin. Mi gölme jöhanñangö azi kembuñini qetñi Publius yañgö buñaya ahöyök. Gölme toni mianön köl öröm neñgii miriñe öngöinga urukalem qakñe köyan köl neñgiiga yambuk köisirik taringa wehön karöbutkö dop anök.

⁸ Taringa Publius iwiñan silekönöp aka irip suaip sepñambuk kawöl (dysentery) mianön yöhöiga dumnöhök ahöyök. Ahöiga Polnön yañgöreñ anda köuluköba böröñi nöropñe ala mem ölöwahök.

⁹ Mewö asuhuiga miangöreñök kawöl ambazip tosatñi pakpak gölme jöhanñe ahögeri, yeñön mewöyök kañgotketka Polnön Anutu köuluköiga ölöwaket.

¹⁰ Yeñön kalem könañi könañi gwötpuk neñgiba mewö mianön göda qem neñgiba malget. Könañep wañgenön öngöbingö ahini, nalö miangöreñ köwet qakñe köna malmalgö yuainangö osiini, mi memba neñgöra wañgenön alget. Mewö.

Malta mosöta anda Rom sitinön añgorin.

11 Köiη karöbut teköiga waηge kun qetηi “Bem Siwisiwi” miwikηaiget. Waηge miangö nunduje siwisiwi bemyahöt qetηiri Kastor aka Poluks mi-etkö imutηira memba meηölöba alget kinohot. Waηge mianön Ijpt kantrigö siti qetηi Aleksandria miangörenök kaiga gölme jöhanηe jöhöba luhutqeqe nalöηi mi tatket. Mi tatket teköiga öηgöinga opo seri öröba möröηgögetka luhutnön nanöi mosöta anin.

12 Anda mala siti qetηi Sairakyus miangören angota gölmenöη eta wehön karöbut tarin.

13 Tata waηgenöη öηgöinga opo seri öröba möröηgögetka anda Regium sitinöη angorin. Angota ahöm wahöta luhut Saut görökenök könahiba gilök. Gili anda silimηi yahöt aiga miangören Rom likepηe Puteoli taongö waηge döpnöη angorin.

14 Angota miangören urumelen alaurup tosatηi miwikηaiba engehin. Engehinga kewö qesim neηgiget, “Inini ölop nembuk sonda mohot malbeak me qahö?” Qesim neηgigetka “Ölop!” jiba yembuk malin. Malin teköiga enömosöta Rom sitinöη öηgöin.

15 Urumelen alaurupninan Rom siti malgeri, yeηön kainangö keu buzupηi mötket. Mi möta miwikηaim neηgibingöra tosatηan wahöta (köna 43 mail kaba) miri qetηi Apus Forum maket miangören kaget. Tosatηan (33 mail kaba) miri qetηi Kian miri karöbut, miangören kaba miwikηaim neηgiba angehin. Angeka Polnöη “Anutu saiwap!” jiba möpöseiba uruηi amqeiga ölöwahök. Mewö.

Polnön Rom tata Juda ambazip urunji kunğuyök.

¹⁶ Rom sitinön kanğota miangören Polnön miri kunön nannök malmapkö jim teköm wanğigetka yarö azi kunjan galöm memba yambuk malök.

¹⁷ Mewö jim teköm wanğigetka miri miangören tari silim karöbut teköiga Juda ambazip ipni köl öröm engii kaba tokoget. Tokogetka Polnön kewö jii mötket, “Iwi alaurupni, nönön nanine Juda ambazip kambunini qahö qetala kazik ak engial me amböskonurupnini yengörenök ahakmeme möta maljini, mi qahö ak böliäl. Mewö qahöpmö, töndup Jerusalem sitinön qeraköba nömimba jöhöm niñgiba kösö mire al niñgiget tatpiga Rom gawman yengö böröjine al niñgiget.

¹⁸ Al niñgigetka böröjan memba könañamnağö qesiba kewötketka ölöwahök. Nönön yuai bölöñi kun qahö aka kömupkö buñaya akilenjakö dop qahö ahal. Yeñön mewö eka pösat niñgibingö mötket.

¹⁹ *¹⁹“Mewö mötketmö, Juda jitnememe yeñön Judia miangören keu mi qetala tuarenjon aket. Mewö aketka siksauk aka lömböriiga nönön köna jaruba kun qahö miwikñaiba kewö kapan köla qesial, ‘Ni ölöp Rom sitinön anbiga sisa kiñnön keuni mindiñgöi diñgima.’ Mewö qesibiga melaim niñgigetka ki kayal. Nani Juda kambu yeñön kazik al niñgigetmö, töndup yengö silenine keu bölöñi kun ala jim engimangö qahö mötzal. Mewö qahö.

²⁰ Anutunön azi kun asuhumapkö jöhöjöhö keu al neñgiiga Israel neñön keu miangö öñi ahumapköra mamböta jörömqöröm ahakzini, nönön mönö azi sorokñi yañğöra aka gwaröhöm

* **28:19:** Apo 25.11

ningigetka tapep (munḡamunḡa) ki bisizal. Kōnaḡamni mewō. Mianḡōra aka merak enḡeka keukeu eraum mötḡingōra köl örōm enḡigiba ki kaba tokoze.”

²¹ Mewō jiḡa jiget, “Judia ḡōlmenōḡ ḡōhōra keu jiba malḡetmō, neḡōra kimbi kun qahō alget kaiga ehin. Mewōyōk alaurupninan mianḡōrenōk ki kageri, yeḡōrenōk kunḡan ḡōhō keu buzup me kōsohot bölōḡi kun qahō jii mōrin.

²² Mi kun qahō jiget mōrinmō, uruge keu ahōzawi, nini mi ölōp mötḡingō mötzin. ḡōhōren Nazaret pati kambu mianḡō keuḡi mi ḡōlme dop jigetka ambazipnōḡ qetalgetka likeplikep mianḡōren ḡoranora keu ḡwōtḡuk jiba kazik ahakze. Pati kambu mianḡō buzupḡan mewō kezapnine gei mötzin.”

²³ Mewō jiba Polnōḡ keu kunbuk jimapkōra nalō kun areḡōḡet. Mi areḡōḡetka Juda ambazip jesōḡḡōḡan nalō mianḡōren kaba Pol miri malōḡanḡōren tokoḡet. Tokoḡetka sōḡanōk kōnahiba Anutu bemtoḡōḡanḡō kōnaḡi jim asariba mali miri sōḡauyōk. Jisōḡō kōnaḡi möt yakōba möt nariba uruyahōt mosōtmegōra kapaḡ kōla uru kunḡum enḡiba malōk. Mutuk Mosesḡōren Kōna keu aka kezapḡetok ambazip yeḡōren Buzup Kimbi oyoḡda keu mianḡōrenōk kōnahiba Jisōḡō kōnaḡi indela mianḡōn kondela naḡḡōba jiba malōk.

²⁴ Buḡa keu mewō jiba maliga tosatḡan uruyahōt mosōta möt narigetmō, tosatḡan mi qahō möt nariba tōḡpin malḡet.

²⁵ Nannini urumohot qahō ak aḡḡuba sutḡine mötmöt kambu yahōt aka deḡbingō aket. Deḡbingō aketka Polnōḡ keu kewōyōk jii mötket, “Uḡa

Töröñan keu kun kezapqetok azi Aisaiagö uruñe sanjeper ali ambösakonñini jii mötkeri, mi mönö enğöra dopñine törörök jiyök.

²⁶ *Aisaianöñ keu mi kewö jii ahöza,
‘Gi mönö ambazip kambu kienğoreñ anda kewö jinöñ mötme:

Injini mönö kezapñini ala keu ölña mötagun könañi möt bibihiba töndup qahö möt asarime.

Jeñinan uba yuai ölña ekagun könañi ek bibihiba töndup qahö ek kutume.

²⁷ Ambazip kambu kienğö uruñinan mönö köhöiba gwözöñda ahöza.

Kezapñinan keu möt bibihiba jeñini kömaziliköba malje.

Mewö qahö akeak ewö, mönö jeñinan yuai ölop ek kutuba kezapñinan keu möta uruñinan könañi möt asariba uruñini melengetka nöñön i ölop mem ölowak enğibileñak.’ ”

²⁸ Polnöñ keu mi jim teköba kewö jiyök,
“Mianğöra injini mönö keu köñi ki ölop möt yaköme: Anutunöñ amötqeqegö Buña keuñi mi mönö kian kantri yeñğoreñ ali anma. Yeñğoreñ aniga yeñön mi ölop kezap ala mötme.”

²⁹ (Polnöñ mewö jim teköiga Juda yeñön nanñinök könöpuk jitnakölik aka goranora erauget öngöba eriga mosöta anget.) *

³⁰ Polnöñ nanñanğöra miri kun kusuk söñğöröñi memba mianğö uruñe (yara) yambu yahöt

* **28:26:** Ais 6.9-10 * **28:29:** Mötmöt ambazip yeñön Jabö 29:gö keuñi kewöta tosatñan Luknöñ mi könakönahije qahö ohoyök jizemö, tosatñan keu miambuk urumohot qahö akze. Mianğöra jabö 29 mi sel uruñe ahöza.

jömukŋanök ahöm malök. Miangörenj mala ambazip denike yeŋön ekingö kageri, yaŋön mi pakpak ölop köl öröm eŋgiba malök.

³¹ Awösamkakak qakŋe kindä Anutu bemtohoŋaŋgö könäŋi jim asariba uru kuŋgum eŋgiba malök. Kembu Jisös Kraist möt waŋgimegöra Anutu amötqeqegö könäŋi kusum eŋgiba malök. Mewö maliga kuŋŋan kun qahö qetal waŋgiiga mala kota malök. Mewö.

Burum-Mindik Bible
The New Testament and portions of the Old Testament
in the Somba-Siawari language of Papua New Guinea,
also called the Burum Mindik language.
Sampela hap Buk Baibel long tokples Burum Mindik
long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 18 Apr 2025 from source files dated 31 Aug 2023

c0871260-68cc-5a50-953f-52200e105d1e